

Rõmãn Pawre kot Rõm kãm Jejus kôt hkwÿjê hwÿr kagà nẽ mẽn

Kagà ja na pre Pawre hipêx. Kêp Jejus nhÿ hã mẽ ahkre ho pa xwÿnh na pre. Na pre hte mry kà ho ixkre nhÿpêx nẽ mẽ kãm ho wẽnê ho mẽ hkôt pa pẽ mẽ piitã mẽ kãm Tirtũm kapêr jarênh o pa. Tã krĩ pẽ Rõm kamã mẽ kot Jejus kôt amnhĩ xunhwÿr xwÿnhjê hwÿr kagàja nhÿpêx nẽ mẽ hwÿr kumẽ. Kormã ma mẽ hwÿr môr nẽ mẽ omunh kêt ri.

Nẽ Jejus kêp Tirtũm mã tanhmã mẽ pajarênh to xwÿnh ã nhũm pre mẽ kãm harẽ nẽ hã kagà. Jejus kot mẽ pahte amnhĩ tomnuj pãnhã mẽ panê htyk jakamã na hte Tirtũm mẽ pahte hkôt amnhĩ xunhwÿr ã mẽ pahpumu nẽ Jejus kukwak ri mẽ pahte amnhĩ to mex xwÿnh ã mẽ pajarẽ.

Nẽ Tirtũm Karõ nhÿ hã mẽ kot amnhĩ nhÿpêx nyw nẽ hamaxpêr nyw o pa hã nhũm Pawre mẽ kãm karõ nẽ hã kagà. ã na pre mẽ kãm mẽmoj jarẽ nẽ hã kagà anẽ. Nẽ hã kagà ho:

¹ Pa Rõm nhõ xwÿnhjaja? Xà mẽ amex? E ot pa mẽ awÿr kagà nhÿpêx nẽ kumẽ. Tirtũm na pre mẽ akaxyw ixãm. Ixte mẽ amã Jejus kot tanhmã mẽ panê amnhĩ nhÿpêx to hã harênh o ri ixpa kaxyw. Na pre ixpê Pawre hã ixpumu nẽ ixãm. Jakamã na pa ã mẽ awÿr kagà nhÿpêx nẽ mẽn anẽ. Ixte Jejus nhÿ hã mẽ ahkre ho ri ixpa xwÿnh na pa. Na pa hte kãm tanhmã amnhĩ nhÿpêx to ho ri ixpa. Tã ã mẽ awÿr kagà nhÿpêx nẽ mẽn anẽ.

² Amnepêm na pre Tirtûm nhỹ hã kapêr jarênh o ri mẽ pa xwỳnhjaja mẽ pakukamã mẽ panhĩgêjtjê mã Jejus kukamã tanhmã harênh to ho ri pa. Nê mẽ kãm kapêr jarênh o mẽ hkôt pa nê mẽ kãm:

—Koja nhỹrmã Tirtûm mẽ pahpiitã mẽ panê tanhmã kot amnhĩ nhĩpêx to mã xwỳnh mẽ nhũm mẽ hpiitã hprĩ hã harênh ma nê omu. Anê.

Nhũm prem ã Jejus kukamã mẽ kãm harênh anhỹr o ri mẽ hkôt pa. Tirtûm kapêr ã kagà htũm kamã harênh xà hkôt tanhmã mẽ kãm harênh to.

³ Tirtûm Kra Jejus Krisja na pre mẽ kãm harênh o ri mẽ hkôt pa. Mẽ panhõ Pahihti na. Kêp Tirtûm Kra htã na pre mẽ pahpyrà nê ã ho amnhĩ nhĩpêx nê wrỳ nê katorxà nhõxà hkre rũm kato. Jakamã kêp Tirtûm Kra pix kêt mãânên katorxà hkôt kêp higêt Tawi hkanrêhã htãmnhwỳ.

⁴ Kêp Tirtûm Kra htã nhũm prem axtem nê tanhmã hamaxpêr to nê kupĩ. Nom nhũm Tirtûm kêp amnhĩ Kra hã akupỹm ho htĩr. Jakamã na pu htem harênh ma nê kãm pajamaxpêr o:

—Jesús kêp Tirtûm Kraa. Mẽ kot kêp hpĩr tã nhũm akupỹm ho htĩr. Jakamã nhũm Tirtûm pyrà nê hihtỳx o hihtỳx. Anê.

⁵ Tã ã Tirtûm kot Kra nhĩpêx anhỹrja ri na mãânên pa ixto mex nê mẽ akaxyw ixãm. Jakamã na pa hte ma krĩ piitã hkôt mẽ kãm tanhmã Jejus Kris jarênh to ho ri mẽ hkôt ixpa. Ijaew mã nê Ijaew kêt xwỳnhjê mã. Mẽ kot harênh mar nê amnhĩ kaxyw kãm hamaxpêr nê kapêr kôt pix mã amnhĩ nhĩpêx mex kaxyw.

⁶⁻⁷ Nê mẽ apê Rôm nhõ xwỳnhjaja. Na ka prem Jejus kôt amnhĩ xunhwỳ nhũm Tirtûm ja hã mẽ apumu nê mẽ ato hkra nê mẽ apê Jejus mẽ wa

hkwỳ hã mẽ ajarẽ. Mẽ ate hkôt amnhĩ nhĩpêx kaxyw nhũm pre ã mẽ ajarẽnh anẽ.

Tã ot pa kagà nhĩpêx nẽ mẽ awỳr mẽn h kaxyw. Tĩrtũm kot mẽ ato hkra xwỳnhjê hwỳr. Tĩrtũm kãm mẽ ajapêê.

Na pa hte mẽ ato mẽ panhĩpêêxà maati Tĩrtũm mẽ Pahшти Jejus Kris wa hwỳr rãhã ri ixpa. Nẽ mẽ ato wa hwỳr o:

–Kwa kêr ka wa Rôm kamã war akrajê pumunh mex nẽ mẽ kutã anojarêr rãhã nẽ. Kê mẽ hamakêtkati nẽ àmnhĩx ri tanhmã amnhĩ nhĩpêx to ho ri pa. Anẽ.

Pawre kot Rôm nhõ xwỳnhjê pumunh prãm ã amnhĩjarẽnh

Atre 28.15-16; Rômãn 15.22-29

⁸ Nẽ na ka prem amnhĩ kaxyw Jejus Kris mã ajamaxpêr nẽ hkôt amnhĩ xunhwỳ nhũm krĩ piitã hkôt mẽ pa xwỳnhjaja mẽ ajarẽnh ma. Nẽ mẽ ate amnhĩ nhĩpêx nyw ã mẽ ajarẽnh ma nẽ axpên mã tanhmã mẽ ajarẽnh to ho pa. Nẽ mẽ ajarẽnh o:

–Kwa na xep Rôm kãm mẽ hkwỳjaja amnhĩ kaxyw Jejus mã hamaxpêr tỳx nẽ. Nẽ hkôt amnhĩ nhĩpêx mex rãhã ho ri pa. Anẽ.

Pa ã mẽ kot mẽ ajarẽnh anhỳrja ma nẽ ixkĩnh tỳx nẽ. Nẽ Tĩrtũm mã mẽ anhỹ hã ixkĩnh ã amnhĩ jarẽnh o ri ixpa.

⁹ Na pa hte mẽ ato hwỳr rãhã ho ri ixpa. Nẽ nhỹri mẽ kãm Tĩrtũm Kra Jejus kapêr jarẽnh o ri ixpa nẽ mẽ amã ijamaxpêr nẽ mẽ ato kuwỳ. Nẽ tanhmã Tĩrtũm mã amnhĩ nhĩpêx to ho ixpa pẽ mẽ amã ijamaxpêr nẽ mẽ ato kuwỳ. Tĩrtũm kot ja hã ixpumunh mex.

10 Na pa hte tanhmã kãm amnhĩ jarẽnh to kaxyw nẽ mẽ akaxyw amnhĩ to kuma nẽ kãm:

—Pa Tĩrtũm? Na pa ra inhmã ma Rõm wỳr inhmõr nẽ kamã akõt ixkwỳjê pumunh prãm tỳx kumrẽx. Xà kot ka tokyx mẽ hwỳr inhmẽ nà? Anẽ.

11 Na pa ra inhmã mẽ awỳr inhmõr prãm tỳx nẽ. Na pre Tĩrtũm Karõ tanhmã ixkrà hto pa ý hã kapêr ã kagà mar tỳx nẽ. Nẽ hkõt mẽmoj mex pumunh rax nẽ. Tã ra inhmã ma mẽ awỳr inhmõr nẽ amnhĩ xõ ri mẽ amã harẽnh prãm nẽ. Mẽ ate inhmar nẽ aprĩ hã Jejus Kris kõt amnhĩ xunhwỳr tỳx nẽ hkõt amnhĩ nhĩpêx mex rãhã ho ri apa kaxyw.

12 Kot paj nhỹrmã ma mẽ awỳr mõ. Nẽ mẽ awỳr pøj pu mẽ axpẽn pumu nẽ pahkĩnh nẽ. Mẽ pahte amnhĩ kaxyw Jejus Kris mã pajamaxpêr mex o papa hã axpẽn pumu nẽ pahkĩnh nẽ. Nẽ mẽ pahpiitã hkõt amnhĩ nhĩpêx mex o ri papa.

13 E ixkwỳjaja. Xatã ixte mẽ awỳr ixkrà htã nhũm mẽmoj xatã tanhmã ixpê àmtàr to pa kormã jar ixpa. Nom kot paj nhỹrmã ma mẽ awỳr mõ. Mẽ ate ja hã inhmar kaxyw na pa ã Tĩrtũm noo mã mẽ amã amnhĩ jarẽnh anẽ. Na pa pre krĩ hkwỳ kamã mẽ apê Ijaew kêt xwỳnh kwỳjê hwỳr ixpa. Nẽ mẽ kãm Jejus kot mẽ panê tanhmã amnhĩ nhĩpêx to hã harẽnh o ri mẽ hkõt ixpa. Nhũm mẽ hkwỳjaja inhma nẽ hkõt amnhĩ xunhwỳ. Ja kaxyw na pa inhmã ma mẽ anhõ krĩ hwỳr inhmõr prãm nẽ. Mẽ akwỳjaja kot ixkapêr mar nẽ mẽ apyrà nẽ Jejus kõt amnhĩ xunhwỳr kaxyw.

14 Na pre ra Tĩrtũm ixte kapêr o mẽ ajahkre ho ixpa kaxyw mẽ piitã mẽ kaxyw ixãm. Tanhmã ri mẽ kute xwỳnhjê kaxyw. Mẽ kãm ma ho mẽ pa

xwỳnhjê mẽ mẽ kãm ma hkêt o mẽ pa xwỳnhjê mã. Nễ mẽ kot kagà pumunh xwỳnhjê mẽ mẽ kot kagà pumunh kêt xwỳnhjê mã. Mễ piitã mẽ kaxyw na pre ixãm. Ixte mẽ kãm Jejus kot tanhmã mẽ panê amnhĩ nhĩpêx to hã harênh o ri mẽ hkôt ixpa kaxyw.

¹⁵ Jakamã na pa ra inhmã mẽ apê Rôm nhõ xwỳnhjê hwỳr inhmõr prãm nễ. Ixte mẽ anhõ krĩ kamã mẽ piitã mẽ kãm ja jarênh o ri ixpa nhũm mẽ kot inhmar nễ mẽ pahpyrà nễ Jejus kôt amnhĩ xunhwỳr kaxyw.

Jejus kot mẽ panê htyk ã harênh

Sikũn Ximotre 1.6-12

¹⁶ Nễ Jejus kot mẽ panê htyk ã harênhja ãm hãmri na. Harênhja mex o mex. Na htem kuma nễ kãm hamaxpêr nễ amnhĩ kaxyw hkôt hamaxpêr nễ hkôt amnhĩ xunhwỳ. Hãmri nhũm Tĩrtũm ja hã mẽ omu nễ mẽ nê mẽ kot amnhĩ tomnuj o hapêx pa nễ mẽ ho hkra. Nom mẽ ixpê Ijaew nhõ xwỳnhjê pix kêt. Mãănênh mẽ apê Ijaew kêt xwỳnhjaja nhũm kãm mẽ pajapê ho xpênh pyræk. Jakamã na pu htem Jejus kôt amnhĩ xunhwỳ nhũm Tĩrtũm ja hã mẽ pahpumu nễ mẽ pahto hkra. Ja kaxyw àhpumunh tỳx o àhpumunh tỳx.

¹⁷ ãm mẽ kot amnhĩ kaxyw Jejus mã hamaxpêr xwỳnh pixjaja na hte mẽ ho hkra. Kapêr ã kagà htũm kot tanhmã ja jarênh to nễ harênh kot:

Na hte Tĩrtũm mẽ kot amnhĩ kaxyw Kra mã hamaxpêr ã mẽ omunh xà hkôt mẽ ho hkra nhũm mẽ amnhĩ kaxyw kãm hamaxpêr rãhã ho pa. Jao ra ô ri tãm amnhĩ nhĩpêx o pa. Anễ.

Mě pahpiitã mě pahte amnhĩ tomnuj xwỳnh ã mẽ pajarēnh

Atre 14.15, 17.22-29; Apokarip 9.20-21

¹⁸ Ně mẽ kot amnhĩ tomnuj o ri mẽ pa xwỳnhjaja na hte Tĩrtũm axtem tanhmã mẽ harēnh to. Na htem Tĩrtũm kapēr ma nom amnhĩ tomnuj gryk ã ãm kuma. Ně mẽ hkwỳjaja kot kapēr mar pymaj kapēr õ ho mẽ kēp àmnàr rãhã ho ri pa nhũm Tĩrtũm ja hã mẽ omu nhũm ja kēp omnuj nē.

¹⁹⁻²⁰ Te mẽ kot Tĩrtũm kot amnhĩ nhĩpêx ã omunh kêt pyràk o amnhĩ nhĩpêx tã mẽ kot omunh mex. Tĩrtũm kot mẽmoj to kator krax rũm ra kot mẽ pamã amnhĩ to amnhĩrĩt mex. Pu mẽ pano ho omunh kêt tã no ãm kot amnhĩ nhĩpêx kôt ra kēp Tĩrtũm ã omunh mex nē. Ně kēp mẽmoj piitã ho kator xwỳnh ã omunh mex nē. Ně mex o mex ã omu nē hihtỳx o hihtỳx hã omu. Tĩrtũm kot amnhĩ nhĩpêx kot amnhĩrĩt mex nhũm mẽ kot omunh mex tã hkôt amnhĩ xunhwỳr kêt nē. Ně axtem nē hamaxpēr o:

—Tk. Tĩrtũm kot inhmã amnhĩ to amnhĩrĩtre hã kot pa kêt ri hkôt amnhĩ nhĩpêx. Kot pa inhno ho omu nē rĩ kormã hkôt amnhĩ nhĩpêx japēr. Anē.

Ra mẽ kot amnhĩ nhĩpêx ã omunh mex tã ri ã hamaxpēr anē. Jakamã nhũm Tĩrtũm tee ri ja hã mẽ omu nhũm ja kēp omnuj tỳx nē.

²¹ Mě kot amnhĩ nhĩpêx ã omunh mex tã amnhĩ kaxyw tanhmã kãm hamaxpēr hto hkêt. Rỳ arĩ hamaxpēr japēr nē kãm:

—Nà Tĩrtũm. ãm hãmri amex kumrêx. ãm amex o amex. Apê Tĩrtũm ã ãm apixi mex kumrêx na ka. ãm hãmri na ka hte mẽ ixto mex o apa.

Anhÿr o amnhĩ kaxyw kãm kapër kêt nê. Nê ãm htÿx tanhmã hamaxpër punuj to pix o ri pa. Te kamàt kô kamã ri mẽ pa xwÿnhjê kot amnhĩ nhĩpêx pyrà nê mẽmoj mex pumunh kêt nê.

²² Mẽ kot àhpumunh tÿx ã amnhĩ to jarkrar o ri pa htã no ãm te mẽ hkrã kanhĩn kêt nê mẽ hamaxpër kêt pyræk o amnhĩ nhĩpêx.

²³ Jakamã na htem amnhĩm mẽmo karõ nhĩpêx. Mẽmo htyk mã xwÿnhjê hõ karõ nhĩpêx. Tanhmãn panhĩ karõ rÿ mẽmo mry karõ rÿ mẽmo kuwênh karõ. Rÿ mẽmo kagã karõ nhĩpêx. Hãmri nê ho õ sãnti nê te ri ho Tĩrtũm nhĩpêx pyræk o hipêx. Jao hpar pê hkõn krã ho rôrøk nê amnhĩ to kuwÿ nê kãm amnhĩ jagrer pê kãm mex o mex ã harê. Tĩrtũmja sãnti rom htĩr o htĩr tã nhũm mẽ axtem nê sãnti gryk ã hkaga nê ã amnhĩ nhĩpêx o pa anê.

²⁴ Jakamã nhũm tee ri ã mẽ kot amnhĩ nhĩpêx anhÿr ã mẽ omu nê amnhĩ pyrà nê mẽ hkaga nê ãm mẽ omu. Jakamã nhũm mẽ ãm amnhĩ krã hkõt tanhmã ri amnhĩ tomnuj to ho pa. Nê axpên kãm ri tanhmã hpijaàm kêt to. ã na htem htÿx ri amnhĩ tomnuj anhÿr o pa.

²⁵ Tĩrtũm kapërja ãm hãmri htã nhũm mẽ axtem nê te amnhĩ pum rênh pyræk o hipêx nê kãm hamaxpër kêt nê. Nê hpãnhã ri mẽ hêx xwÿnhjê kapër pix ma nhũm ja te mẽ kãm mex pyræk. Na htem ã amnhĩ nhĩpêx anê hãmri nê axtem nê Tĩrtũm kot mẽmoj nhĩpêx pix parpê rôrøk nê amnhĩm mex o mex ã harê. Nom kot hipêx xwÿnh Tĩrtũm parpê mãn ã amnhĩ nhĩpêx anhÿr kêt nê. Nom kot mẽmoj nhĩpêx xwÿnhhta mex o mex jakamã koja mẽ kot hkõt amnhĩ nhĩpêx xwÿnhjaja

jajê rom kãm mex o mex ã harênh tũm rãhã ho ri pa.

²⁶ No mẽ kot amnhĩ tomnuj xwỳnhjaja na hte Tĩrtũm amnhĩ pyrà nẽ mẽ hkaga nhũm mẽ htỳx amnhĩ krã hkôt ri tanhmã amnhĩ tomnuj to ho ri pa. Jao mẽni hkwỳjaja axtem nẽ axpẽn gryk ã mjên kaga nẽ axpẽn nhĩõ ho mjên.

²⁷ Nhũm mẽmy hkwỳjaja mãănẽn axtem nẽ amnhĩ kwỳjê my gryk ã hprõ kaga nẽ axpẽn nhĩõ ho hprõ. Na htem ã axpẽn kamã hpiaãm kêt o pa anẽ. Mỳrapê koja mẽ à pix kãm amnhĩ xà htỳx kamã hamak o pa.

²⁸ Na htem amnhĩ tomnuj gryk ã Tĩrtũm mã hamaxpěr kêt nhũm tee ri amnhĩ tã mẽ omu nẽ hamaxpěr o:

—Mẽ kãm amnhĩ tomnuj pix prãm jakamã kwār mẽ mãmrĩ ã amnhĩ nhĩpêx anẽ. Kot paj axte ja nẽ tanhmã mẽ kãm ixkapěr to hkêt nẽ. Anẽ.

Jakamã nhũm mẽ arĩ htỳx ri amnhĩ krã hkôt tanhmã amnhĩ tomnuj to ho ri pa rãhã nẽ.

²⁹ Hãmri nẽ mẽmoj punuj pix mã hamaxpěr.

Nẽ kãm amnhĩ mex pix prãm mã hamaxpěr.

Nẽ kãm axpẽn tomnuj pix prãm.

Nẽ mẽmoj tã axpẽn kãm gryk pix prãm.

Nẽ mẽ kãm axpẽn par pix prãm.

Nẽ mẽmoj tã ri kãm axpẽn mã àkjêr prãm.

Nẽ mẽmoj tã kãm axpẽn mã hêx prãm.

Nẽ kãm axpẽn kaxyw tanhmã hamaxpěr punuj to pix prãm.

Nẽ kãm tanhmã axpẽn to kapěr punuj to pix prãm.

³⁰ Nẽ kãm mẽmoj tã axpẽn to hêx pix prãm.

Nẽ kãm Tĩrtũm prãm kêt o ri pa.

Ně mẽmoj tã axpẽn mã àkjêr o ri pa.

Ně mẽmoj tã amnhĩ to jarkrar rãhã ho ri pa.

Ně tanhmã amnhĩ tomnuj to pix kukamã hamaxpêr. Nhũm mẽ katorxà nẽ mẽ hipêêxà tee ri ja nẽ tanhmã mẽ kãm kapêr to no nhũm mẽ mar kêt kumrêx.

³¹ ã mẽ kot amnhĩ nhĩpêx anhỹr o ri mẽ pa xwỳnhjaja na hte Tĩrtũm kãm mẽmoj mex nhũm mẽ kêp omnuj nẽ nhũm Tĩrtũm kêp mẽmoj omnuj nhũm mẽ kãm mex nẽ. Nẽ axpẽn mã mẽmoj tanhmã ho hã amnhĩ jarênh tã ho anhỹr kêt nẽ. Nẽ axpẽn kãm ukaprĩ ho ri pa hkêt nẽ.

³² Tĩrtũm kapêr ã kagà htũm kot tanhmã mẽ hkukamã mẽ harênh to nẽ mẽ harênh kot:

ã mẽ kot amnhĩ nhĩpêx anhỹr o ri mẽ pa xwỳnhjaja koja mẽ nhỹrmã ty hãmri nẽ amnhĩ xà htỳx kamã hamak rãhã ho ri pa ho pa. Anê.

Nhũm mẽ kot amnhĩ tã ja mar tỳx tã aa amnhĩ tomnuj kaga hkêt nẽ. Arĩ ã amnhĩ nhĩpêx anhỹr o pa rãhã nẽ. Nhũm mẽ hkwỳjaja mẽ kot amnhĩ tomnuj ã mẽ omu nẽ mẽ uràk nẽ ã amnhĩ nhĩpêx anhỹr o ri mẽ hkôt pa nhũm mẽ amnhĩ pyrà nẽ mẽ omu nẽ hkĩnh nẽ. Na htem ã amnhĩ nhĩpêx anhỹrja gryk ã Tĩrtũm kaga nhũm tee ri amnhĩ tã mẽ omu nẽ amnhĩ pyrà nẽ mẽ hkaga nẽ ãm mẽ omu. Jakamã nhũm mẽ amnhĩ tomnuj tỳx pix rãhã ho pa.

2

Mẽ kot amnhĩ tomnuj xwỳnhjê hkukamã mẽ harênh

Matêwre 7.1-5; Sikũn Tesarõn 1.6; Eprêw 9.27; Sikũn Pêtre 2.4, 3.7; Jutre 6-14; Apokarip 6.15, 20.11

¹ Nê kot ka mẽ atõ ã mẽ kot amnhĩ tomnuj anhÿr xwÿnhjê kot amnhĩ nhĩpêx ã mẽ harênh ma nê ã ajamaxpêr anê nê ajamaxpêr o:

—Tk. Mẽ kot amnhĩ tomnuj pix o ri pa xwÿnh kênã. No pa na ã ixte amnhĩ nhĩpêx anhÿr o ri ixpa hkêt. Mẽ kurom ixte tãm amnhĩ nhĩpêx o ri ixpa xwÿnh na pa.

Anhÿr o amnhĩ jarê. Kwa nà mẽ ã ajamaxpêr anhÿr kêt nê. Mẽ pajaxwÿja na pu htem tõiã mẽ urak nê tanhmã amnhĩ tomnuj to. Tã ka mẽ ã mẽ kot amnhĩ tomnuj ã mẽ harênh anê nê te ka ate amnhĩ jarênh pyrak.

² Tĩrtũm kapêr ã kagà htũm kot mẽ kot amnhĩ tomnuj o ri mẽ pa xwÿnhjê jarênh kot:

Mẽ kot amnhĩ tomnuj mÿrapê koja mẽ nhÿrmã amnhĩ xà htÿx kamã hamak rãhã ho ri pa. Anê.

Ãm hãmri ã mẽ harênh kot anhÿr.

³ Mãn ka mẽ atõ tanhmã amnhĩ kukamã ajamaxpêr to nê ajamaxpêr o:

—Nà koja Tĩrtũm nhÿrmã amnhĩ nê kuwy hwÿr mẽ kot amnhĩ tomnuj xwÿnhjê rê. No pa koja hwÿr inhmênh kêt nê. Anê.

Kwa mẽ ã ajamaxpêr anhÿr kêt nê. Kot ka mẽ ã amnhĩ kukamã ajamaxpêr anhÿr tã tõiã mẽ urak nê tanhmã amnhĩ tomnuj to. Jakamã koja Tĩrtũm mẽ urak nê hã tanhmã mẽ ato.

⁴ Kot kaj mẽ atõ tanhmã amnhĩ tomnuj to hãmri nê ãm ja hã amnhĩ pumu nê ajamaxpêr o:

—Ixte amnhĩ tomnuj xwÿnh tã na hte Tĩrtũm ja hã ixpumu nê ãm ixpumu nê hã tanhmã ixto hkêt nê. Kêp mẽ ixkamã ukapřĩ xwÿnh jakamã na hte gryk tokyx anhÿr kêt nê. Jakamã kot paj

arĩ tanhmã amnhĩ tomnuj to ho ri ixpa nẽ aa jam inhũrer kêt nẽ. Tĩrtũm kot ja hã tanhmã ixtore kaxyw hã.

Anhỹr o ajamaxpěr. No ãm ja kot anhỹr kêt. Na hte Tĩrtũm kormã amnhĩ tã mẽ pajamã. Mẽ pahte amnhĩ tomnuj kaga nẽ hpãnhã hkôt amnhĩ xunhwỳr kaxyw na hte kormã amnhĩ tã mẽ pajamã. Jakamã na kormã tanhmã ate amnhĩ tomnuj tota ã tanhmã ato hkêt nẽ.

⁵ Mẽ akrã hihtỳx jakamã mẽ amã hkôt amnhĩ xunhwỳr prãm kêt. Na ka htem tanhmã amnhĩ tomnuj to pix kukamã ajamaxpěr o ri apa. Nẽ gaa nẽ ra anhỹr kumrẽx. Nhũm Tĩrtũm tee ri ja hã mẽ apumu nhũm ja kęp omnuj tỳx o mỗ. Jakamã koja nhỹrmã tanhmã mẽ ajarẽnh to nẽ gryk tỳx kãm tanhmã mẽ atomnuj tỳx to. ãm hãmri na hte mẽ pahte amnhĩ nhĩpêx ã mẽ pahpumunh xà hkôt ahpỹnhã tanhmã mẽ panhĩpêx to.

⁶ Koja nhỹrmã mẽ pahpiitã kormã mẽ pahtĩr ri mẽ pahte amnhĩ nhĩpêx ã mẽ pahpumunh xà hkôt tanhmã mẽ panhĩpêx to. Mẽ kot amnhĩ to mex o ri mẽ pa xwỳnhjaja nhũm mẽ ho mex nẽ. Nẽ mẽ kot amnhĩ tomnuj o ri mẽ pa xwỳnhjaja nhũm mẽ homnuj nẽ. Koja nhỹrmã mẽ pahpiitã mẽ pahto hpimràatã ã mẽ panhĩpêx anẽ.

⁷ Mẽ kot hkôt tãm ri amnhĩ nhĩpêx o pa pê kãm Tĩrtũm kot amnhĩm mẽ mex ã mẽ harẽnh prãm xwỳnhjaja koja nhỹrmã amnhĩm mẽ mex ã mẽ harẽ. Hãmri nhũm mẽ kuri htĩr tũm nẽ hkĩnh nẽ mex kumrẽx nẽ pa ho pa.

⁸ Nom mẽ kot amnhĩ mã pix mã ri hamaxpěr o ri mẽ pa xwỳnhjaja. Nẽ mẽ kot tanhmã amnhĩ

tomnuj to gryk ã Tĩrtũm kapër kaga xwỳnhjaja koja kãm mẽ hkĩnh kêt nẽ tanhmã mẽ homnuj tỳx to.

⁹ Mẽ kot amnhĩ tomnuj xwỳnh piitã koja mẽ nhỹrmã amnhĩ xà htỳx kamã hamak rãhã nẽ pa ho pa. Ijaew kumrẽxjaja nẽ hpãnhã Ijaew kêt xwỳnhjaja nhũm mẽ amnhĩ xà htỳx kamã hamak rãhã nẽ pa ho pa. Mẽ kot amnhĩ tomnuj tỳx o paja mỳrapê.

¹⁰ No kêt tãm mẽ kot amnhĩ nhĩpêx xwỳnhjaja koja Tĩrtũm mẽ ho mex rax rãhã ho pa ho pa. Nẽ amnhĩm mẽ kot amnhĩ to mex xwỳnhjê hã mẽ harẽ. Nẽ tanhmã mẽ ho mex to nhũm mẽ kamã amnhĩ krit nẽ pa ho pa. Hamakêtkati nẽ hkĩnh nẽ àmnhĩx ri pa ho pa. Ijaew kwỳ kumrẽxjaja nẽ mãnẽn Ijaew kêt xwỳnh kwỳjaja nhũm mẽ mex nẽ hamakêtkati nẽ hkĩnh nẽ àmnhĩx ri pa ho pa.

¹¹ Koja Tĩrtũm nhỹrmã ahpỳnhã mẽ pahte amnhĩ nhĩpêx ã mẽ pahpumunh xà hkôt tanhmã mẽ pajarẽnh to pẽ tanhmã mẽ panhĩpêx to. Mẽ ixpê Ijaewjaja nẽ mẽ apê Ijaew kêt xwỳnhjaja nhũm ã mẽ pahpiitã mẽ panhĩpêx anẽ.

¹² Amnepêm na pre finat Mojes mã tanhmã kapër to nhũm kuma nẽ ô ri hã kagà hpa. Mẽ ixpê Ijaew ri na kapër ã kagàja. Ra mẽ ixte mar tỳx jakamã koja mẽ ixtõ ra kapër mar tỳx tã hkôt amnhĩ nhĩpêx kêt hãmri nhũm Tĩrtũm tee ri amnhĩ tã omu nẽ ã amnhĩ nhĩpêx anhỹrja mỳrapê nhỹrmã ma mẽ kot amnhĩ xà htỳx kamã hamak tũm xàta wỳr kumẽ. Kot kapër mar tỳx tã hkôt amnhĩ nhĩpêx kêt mỳrapê nhũm ã hipêx anẽ. No kêt mẽ apê Ijaew kêt xwỳnhjaja mẽ ixkĩnhã mẽ ari Tĩrtũm kapër ã kagà hkêt jakamã koja mẽ ate kapër nhĩrôp mẽ akuhê hã mẽ apumunh kôt tanhmã mẽ anhĩpêx

to hkêt nê. Koja hpãnhã mẽ ate tanhmã amnhĩ tomnuj to ho apa mýrapê mẽ kot amnhĩ xà htỳx kamã hamak o pa tũm xàta wỳr mẽ arê.

13 Na hte mẽ kot kapêr mar ã mẽ omunh xà hkôt amnhĩm mẽ kot amnhĩ to mex xwỳnh ã mẽ harênh kêt nê. Æm mẽ kot kapêr kôt amnhĩ nhĩpêx ã mẽ omunh xà hkôt pix mã na hte amnhĩm mẽ kot amnhĩ to mex xwỳnh ã mẽ harê.

14 No mẽ hkwỳjaja kormã kot kapêr mar kêt tã te ra mẽ kot mar mex pyræk o amnhĩ nhĩpêx. Jao amnhĩ krã hkôt tãm ri amnhĩ nhĩpêx kurê kumrêx. Te kot Ijaew pyrà nê Tĩrtũm kapêr mar tỳx nê hkôt amnhĩ nhĩpêx o ri pata pyræk.

15 Na htem amnhĩ krã hkôt tanhmã amnhĩ nhĩpêx mex to. Te Tĩrtũm kapêr kot mẽ hkrãm gjêx pyræk o amnhĩ nhĩpêx o pa. Jakamã tee ri tanhmã amnhĩ tomnuj to hã amnhĩ pumu nê hkaprĩ nê. Nê tãm amnhĩ nhĩpêx ã amnhĩ pumu nê hkĩnh nê.

16 Tã koja nhỹrmã Tĩrtũm Jejus Kris mã anê nhũm kuma hãmri nê mẽ piitã kormã mẽ htĩr ri tanhmã mẽ kot amnhĩ nhĩpêx to hã mẽ omunh xà hkôt tanhmã mẽ harênh to. Nê mẽ hamaxpêr kôt mẽ omunh mex xà hkôt tanhmã mẽ harênh to. Mẽ papajaja mẽ pahte axpên jamaxpêr kôt axpên pumunh kêt tã Jejus kot mẽ pajamaxpêr kôt mẽ pahpumunh par.

Tã na pa hte mẽ kãm Jejus kot tanhmã amnhĩ nhĩpêx to hã harênh o ixpa pê ã mẽ kãm ixujarênh anhỹr o ri ixpa.

*Pawre kot hkwỳjê mã kapêr
Rõmãn 3.19-20*

17 Nê ixpyrà nê mẽ apê Ijaew kwỳjaja na ka mẽ axtem nê Ijaew kêt xwỳnhjê mã tanhmã amnhĩ to jarkrar o ri apa nê mẽ kãm:

—Nà mẽ ixpê Ijaew ri Tĩrtũm kapêr ã kagà jakamã ãm mẽ papxipixjaja na hte Tĩrtũm amnhĩm mẽ inhmex ã mẽ ijarê. Nê ãm mẽ papxipixjaja na hte mẽ ixto hkra.

18 Nê mẽ papxipixjaja na mẽ ixte Tĩrtũm kãm hprãm xà hkôt mẽmoj pumunh par nê mẽ kot amnhĩ to mex xà pumunh par nê mẽ kot amnhĩ tomnuj xà pumunh par. Mẽ apê Ijaew kêt xwỳnhjê rom mẽ ixte mẽmoj piitã omunh par kumrêx. Anê.

19-20 Nê amnhĩ jarênh o:

—Nà te mẽ ixpê mẽ nohkre xwỳnhjê pa hã mẽ hamỳnh nê ri mẽ ho ixpa xwỳnh pyræk. Jakamã Ijaew kêt xwỳnh pê htỳx ri mẽ pa xwỳnhjaja na pa htem mẽ kãm Tĩrtũm kapêr tũm o mẽ ahkre mex o ri ixpa. Kormã mẽ kot hprĩ hã mar kêt jakamã na pa htem ho mẽ ahkre ho ri mẽ hkôt ixpa. Mẽ kurom mẽ ixte mar par kênã.

21 Anhỳr ã amnhĩ jarênh nê mẽ ate kapêr o mẽ ahkre ho apa htã hkôt amnhĩ nhĩpêx kêt nê.

Nê mẽ ate mẽ kot axpên pê àhkĩnh nê mẽ hkurê htã no ãm mẽ kamjaja axpên pê axàhkĩnh o ri apa.

22 Nê mẽ amã sãnti hkĩnh kêt ã amnhĩ jarênh tã axtem nê hwỳr agjê nê hpar pê kàxpore nhĩkwỳ xwỳnh o axàhkĩnh o ri apa.

Nê mẽ kot axpên prõ ho amnhĩkati nê mẽ hkurê ho apa htã mẽ kamjaja ã ri amnhĩ nhĩpêx anhỳr o ri apa.

23 Nê mẽ ate Tĩrtũm kapêr ã kagà mex o mex ã harênh tã hkôt amnhĩ nhĩpêx hkêt nê.

Jakamã nhũm mẽ akwỳjaja ja hã mẽ apumu
nẽ mẽ apyrà nẽ Tĩrtũm ã hpijaàm kêt o pa.

24 Tĩrtũm kapêr ã kagà htũm kot tanhmã mẽ ate
amnhĩ nhĩpêx ã mẽ ajarênh to nẽ mẽ ajarênh kot:

Mẽ kêp Ijaew kêt xwỳnhjaja na htem Ijaew kot htỳx
ri amnhĩ nhĩpêx o ri mẽ pa hã mẽ omu nẽ
mẽ ỹ hã tanhmã Tĩrtũm o kapêr punuj to ho
ri pa. Anẽ.

25 Mẽ pahpê Ijaew na pu htem mẽ pahkrajaja mẽ
hapôx kôt kormã mẽ hkryre ri pu htem mẽ kêp
mêmy kwryt kà jakà. Finat Mojes kot Tĩrtũm nhỹ
hã mẽ panhĩgêjtê mã hã karô xà hkôt na pu htem
ã mẽ hipêx anẽ. Mẽ pahte Tĩrtũm mã mẽ pahkrajê
nhôr ã amnhĩ to amnhĩrĩt kaxyw. Jakamã na pu
htem arĩ Mojes kapêr kôt ã mẽ hipêx anẽ nhũm
Tĩrtũm kãm ja mex nẽ. Nom kot pu mẽ kapêr kwỳm
ri tanhmã amnhĩ nhĩpêx to ho papa nhũm ja kêp
omnuj tỳx nẽ hãmri pu mẽ tee ri mẽ pahkrajê my
kwryt kà jakàr kaprỳ. Na hte Tĩrtũm ã mẽ pahkrajê
nhĩpêx anhỹr ã mẽ pahpumunh kôt amnhĩm mẽ
pamex ã mẽ pajarênh kêt nẽ. Nom mẽ pahte kapêr
kôt amnhĩ nhĩpêx mex o papa pê mẽmy kwryt kà
jakàrja nhũm kãm mex nẽ.

26 Ijaew kêt xwỳnhjaja kot ã mẽ hkrajê nhĩpêx
anhỹr kêt tã ra mẽ hkwỳjaja Tĩrtũm kapêr ma nẽ
hkôt amnhĩ nhĩpêx o ri pa. Jao te mẽ kot amnhĩ
my kwryt kà jakàr pyràk o amnhĩ nhĩpêx. Jakamã
nhũm Tĩrtũm ja hã mẽ omu nẽ mẽ kãm:

—Nà ãm hãmri. Mẽ ate amnhĩ my kwryt kà jakàr
kêt tã mẽ apê ixkra na ka mẽ. Anẽ.

27 Mẽ kot amnhĩ jakàr kêt tã Tĩrtũm kapêr kôt
amnhĩ nhĩpêx mex o ri pa nhũm amnhĩ tã mẽ omu

nē mē arom amnhīm mē kot amnhī to mex xwýnh ã mē harē. Mē kot amnhī jakàr kêt tãã.

No mē kajaja mē ate Tirtūm nhỹ hã Mojes kapēr ã kagà mar tỳx tã hkôt amnhī nhĩpêx kêt nē. Ja mỳrapê koja ja hã mē apumu nē Ijaew kêt xwýnhjê kĩnhã mē ate amnhī tomnuj xwýnh ã mē ajarē. Ra mē ate amnhī jakàr tã mē ate amnhī tomnuj xwýnh ã mē ajarē.

²⁸ Nē kot ka mē atõ tanhmã amnhī to jarkrar to nē amnhī jarēnh o:

—Nà ixpê Ijaew jakamã na hte Tirtūm mē kot inhmy kwryt kà krãhyr kôt ixto kraa. Anē.

Nom xà na hte Tirtūm ã mē pahte amnhī nhĩpêx anhỹr ã mē pahpumunh kôt mē pahto hkra? Nà kot anhỹr kêt. Na htem ãm htỳx ã amnhī to jarkrar anhỹr kaprỳ ho pa.

²⁹ Nē Tirtūm Karõ kot mē hkarõ mã gjêx xwýnhjaja kêp Tirtūm kra jakamã na htem Tirtūm kãm hprãm xà hkôt amnhī nhĩpêx. Nom ri amnhī krã hkôt tanhmã amnhī nhĩpêx to ho pa hkêt nē. Rỳ htỳx hamaxpēr o:

—Nà kot paj Mojes kapēr ã kagà hkôt amnhī nhĩpêx nhũm Tirtūm ja hã ixpumu nē amnhīm inhmex ã ijarē nē ixto hkra.

Anhỹr o hamaxpēr kêt nē. Na htem hamaxpēr o:

—Nà ra Tirtūm Karõ kot ixkarõm àr jakamã ixpê hkra nhũm amnhīm inhmex ã ijarē. Jakamã kot paj ãm kôt pix mã ri amnhī nhĩpêx o ri ixpa rãhã ty. Kwār mãmrĩ ixkwỳjaja amnhīm inhmex kêt ã ijarē. Anē.

Kêr ka mē ã ajamaxpēr anhỹr o ri pa. ã mē hamaxpēr anhỹr na mex o mex.

3

¹ Nê măn ka mẽ ra tee ri tanhmã amnhĩ kukamã ajamaxpêr to nê ajamaxpêr o:

—Kwa mo kaxyw na pa ixpê Ijaew? Mon pa pre we ixpê Ijaew kêtre hkêt nê? Mẽ kêp Ijaew kêt xwýnhjaja kot amnhĩ jakâr kêt tâ nhũm Tĩrtũm mẽ pahpyrà nê mẽ ho hkra. Anê.

Kwa mẽ ã ri ajamaxpêr anhỹr kêt nê.

² Mẽ pahpê Ijaew na pre Tĩrtũm Ijaew kêt xwýnhjê rom mẽ pahto mex rax nê. Na pre amnepê mã mẽ panhĩgêt mã tanhmã kapêr to. Mẽ pahpiitã mẽ pahte mar nê hkôt amnhĩ nhĩpêx kaxyw. Nom Ijaew kêt xwýnhjê nhĩgêt mã ã kapêr anhỹr kêt nê. ãm mẽ pahpê Ijaew nhĩgêt pix mã kapêr. Jakamã mẽ pahpê Ijaew mã ja mex kumrêx.

³ Nom kot kaj mẽ atõ ja ma nê ajamaxpêr o:

—Nà Tĩrtũm kot mẽ ixto mex mã mẽ ixtã amnhĩ jarênh tâ no nhũm xep mẽ inhĩgêt kwýjaja hkôt amnhĩ nhĩpêx kêt nê. Na xep prem kapêr kwým ri amnhĩ tomnuj o pa. Jakamã ko. Kojã Tĩrtũm mẽ ixpê mẽ hkanrêhã mẽ htãmnhwýjaja tanhmã mẽ ixto mex to japêr ko. Anê.

⁴ Kwa mẽ ri ã ajamaxpêr anhỹr kêt nê. Tĩrtũm na hte mẽ pahpiitã mẽ pakurom mẽmoj tâ amnhĩ jarênh o hêx kêt nê. Tã ra kot tanhmã mẽ pahtã amnhĩ jarênh to xà hkôt kojã ã mẽ pahto mex anê. Kapêr ã kagà htũm kot mẽhõ tanhmã Tĩrtũm mã kapêr to nê harênh kot:

Pa Tĩrtũm. Nà ãm kapxipix na ka hte mẽmoj tâ amnhĩ jarênh xà hkôt amnhĩ nhĩpêx o ri apa. Jakamã na htem ãm axpên mã axêx ã akapêr ã ajarênh kaprý. Anhỹr o harê.

⁵ No kot ka mẽ atõ atýx ajamaxpêr nê ajamaxpêr o:

—Xà koja Tirtūm tanhmā mẽ ixte amnhĩ tomnuj to hã mẽ ixpumu nẽ gryk? Nà koja gryk kêt nẽ. Jakamã kot paj arĩ amnhĩ tomnuj o ri ixpa. Kê mẽ piitã ja hã ixpumu nẽ ixrom Tirtūm tapxipix kot amnhĩ to mex o pa xwỳnh ã harẽnh o pa. Nà ja mex. Jakamã kot paj arĩ amnhĩ tomnuj rãhã ho ri ixpa nhũm mẽ Tirtūm pix mã mãn kot tãm amnhĩ nhĩpêx xwỳnh ã harẽ. Hãmri nhũm Tirtūm amnhĩ tã ixpumu nẽ tanhmã ixto hkêt nẽ. Koja tanhmã ixto japêr hãmri nẽ ixpyrà nẽ amnhĩ tomnuj nẽ. Anẽ.

Kot kaj mẽ ã ajamaxpêr anẽ nẽ ãm amnhĩ krã hkôt ã ajamaxpêr anhỹr kaprỳ. Nom ã ajamaxpêr anhỹrja Tirtūm jamaxpêr kôt kêt.

⁶ Kwa mẽ ri ã ajamaxpêr punuj anhỹr kêt nẽ. Tirtūm kot mẽ pahpyrà nẽ aa kot amnhĩ tomnujre hã. Kop ãm mẽ pahpyrà nẽ tanhmã kot amnhĩ tomnuj to ronhỹx tanhmã kot we amnhĩ to nẽ mẽ pahte amnhĩ tomnuj xwỳnh ã mẽ pajarẽ? Nhỹx mẽ pahpyrà nẽ ã amnhĩ jarẽnh anẽ. Nà ã mẽ ajamaxpêr anhỹrja mex kêt.

⁷⁻⁸ E pa ixprĩ hã mẽ amã ja jarẽ ka mẽ inhma. Kot kaj mẽ atõ amnhĩ kukamã ajamaxpêr o:

—E kot paj mãmrĩ ri mẽmoj tã ixêx o ri ixpa kê mẽ ixêx nhi hã ixpumu nẽ ixrom Tirtūm pix mã mãn kot amnhĩ to mex ã harẽ. Nẽ ãm pix mã mãn hêx kêt xwỳnh ã harẽ. Hãmri nhũm Tirtūm amnhĩ tã ixpumu nẽ mẽ ã mẽ kot harẽnh anhỹrja ma nhũm ja kãm mex nẽ nhũm hkĩnh nẽ. Jakamã ixêx o ri ixpaja ã tanhmã ixto hkêt nẽ. Ra mẽ kot ixrom tãm kot amnhĩ nhĩpêx o pa xwỳnh ã harẽnh jakamã nhũm ixêx nhita ã tanhmã ixto hkêt japêr. Jakamã kot paj ixte amnhĩ tomnuj o ri ixpaja mã inhũrer

kêt nê. Kêr kê mẽ ja hã ixpumu nê ixrom Tĩrtũm tapxipix kot amnhĩ to mex xwỳnh ã harê.

Anhỹr o ajamaxpêr nom mẽ ajamaxpêrja kot anhỹr kêt. Na hte akwỳjaja pa ixpê Pawre ixêx o ixpa hã ri axpên mã ijarê no na pa hte ixêx o ri ixpa hkêt nê. ã mẽ ajamaxpêr anhỹr o ri apa xwỳnhjaja koja Tĩrtũm mẽ atomnuj tỳx nê kãm ga.

*Mẽ mẽ pahte amnhĩ tomnuj xwỳnh ã mẽ pajarênh
Wam Korĩt 6.9; Karatas 3.22; Xitre 3.3*

⁹ Tã tanhmã kot puj mẽ pahpê Ijaew amnhĩ jarênh to? Xà kot pu mẽ pahte amnhĩ to mex o Ijaew kêt xwỳnhjê jakrenh ã amnhĩ jarê? Nà mẽ pahte ã amnhĩ nhĩpêx anhỹỹre hã. Mẽ pahpê Ijaew nê Ijaew kêt xwỳnhjaja. Mẽ pahpiitã mẽ pahte amnhĩ tomnuj o axpên pyræk. Na pa pre ra mẽ amã ja jarê.

¹⁰ Tĩrtũm kapêr ã kagà htũm kot ja jarênh kot: Mẽhõ na we aa kot amnhĩ tomnuj kêt kumrêx nê pa?

¹¹ Nê mẽhõ na we kot mẽmoj mex piitã omunh par? Nê mẽhõ na kãm Tĩrtũm prãm?

¹² Nà amrakati kumrêx. Na mẽ ra piitã hkaga hpa. Nê kapêr kwỳm ri tanhmã amnhĩ tomnuj to ho pa. ãm mẽhõ pyxire nê amnhĩ to mex o ri pa hkêt kumrêx.

¹³ Na htem kapêr punuj pix o ri pa.

Jakamã Tĩrtũm noo mã mẽ kot amnhĩ nhĩpêxja te kot mẽmoj tyk nê hkro punuj pyræk.

Na htem ãm ri hêx pix kukamã ri hamaxpêr o pa. Tanhmã mẽ hêx to xàja te kêp kagã xoprê nhõ wenên xihtỳx pyræk.

- 14 Nê na htem mẽ piitã mẽmoj nhĩxi ho ri axpên mã mẽ hixi jarênh o pa. Nê ri tanhmã axpên japrý hto ho pa.
- 15 Nê tanhmã kapêr mã gêt kãm mẽ kãm kapêr to.
- 16 Nê tanhmã mẽ hkwyjê homnuj to. Jakamã nhũm mẽ piitã ri hkaprĩ nê mex kêt nê pa.
- 17 Nhũm htem ãm axpên mã mẽ gryk xà pix o kapêr o pa.
- 18 Nê Tĩrtũm ã hpijaàm kêt o pa. Na htem kapêr ma nê ãm kuma nê kãm hkĩnh kêt o pa.

Ã na htem amnhĩ nhĩpêx anhỹr rãhã ho pa. Anê.

Ã Tĩrtũm kapêr ã kagà htũm kot mẽ pajarênh anhỹr.

19 Mẽ pahpê Ijaew ra mẽ pahte ja jarênh mar tỳx. Tĩrtũm kapêr ã kagà htũm kwý na. Na hte ã mẽ kot amnhĩ tomnuj xwýnhjê jarênh anê. Nê mããnên mẽ papajaja. Mẽ pahpê Ijaew na hte ã mẽ pajarênh anê. No ãm mẽ papapxipix hkêt. Krĩ piitã hkôt ri mẽ pa xwýnhjaja nhũm ã mẽ harênh kot anhỹr. Ijaew kêt xwýnhjaja nê mẽ pahpê Ijaew. Mẽ pahpiitã mẽ pahte amnhĩ tomnuj xwýnh jakamã mẽmo kaxyw kot pu mẽ pahte amnhĩ tomnuj kêt ã ri amnhĩ to jarkrar o papa? Kot puj mẽ ã amnhĩ jarênh anhỹr kaprý. Jakamã koja Tĩrtũm mẽ pahpiitã mẽ pahte amnhĩ tomnuj mýrapê tanhmã mẽ panhĩpêx to.

20 Mẽ pahtõ koja mẽ pahte kapêr kôt pix mã amnhĩ nhĩpêx o papa hã mẽ pajarê? Nê mẽ pahtõ mã koja mẽ pamã kapêr nê mẽ pamã:

—Nà na ka hte akatàt kôt ixkapêr kôt pix mã amnhĩ nhĩpêx mex nê. ãm hãmri na ka hte ã amnhĩ nhĩpêx anhỹr o apa.

Anhÿr o mẽ pahtõ mã kot we ã kapër anê? Nà aa kot mẽ pahtõ mã kapër anhÿr kêt. Na pu htem ãm kapër ma nê tee ri amnhĩ kukamã pajamexpër. Mẽ pahte amnhĩ tomnuj ã amnhĩ pumunh kaxyw na pre mẽ pamã kapër ã kagà htũmja gõ. Mẽ pahtõ mẽ pahte kapër ã kagà hkõt amnhĩ nhĩpêx mex o papa hkêt kênã kot kêt ri amnhĩm mẽ pahte amnhĩ to mex xwÿnh ã mẽ pajarẽ.

*Tanhmã Tĩrtũm kot mẽ pahto hkra to hã harẽnh
Atre 17.30-31; Karatas 2.16-21; Piripos 3.7-9;
Xitre 3.5; Xiakre 2.10*

²¹ Nê na hte Tĩrtũm mẽ pahte kapër kõt amnhĩ nhĩpêx ã mẽ pahpumunh kõt amnhĩm mẽ pahte amnhĩ to mex xwÿnh ã mẽ pajarẽnh kêt nê. Jakamã mẽhõ kukwak ri koja we ã mẽ pajarẽnh anê? Nà nhãm mẽhõ kot tãm amnhĩ nhĩpêx rãhã ho pa hã omunh pix kukwak ri koja ã mẽ pajarẽnh anê. Tã mẽhõ kukwak ri kot ã mẽ pajarẽnh anhÿr xwÿnhnta na pre ra mẽ pamã ho amnhĩrĩt. Amnepêm Tĩrtũm kapër ã kagà htũm kamã na pre mẽhõ hkukamã tanhmã harẽnh to. Nê Tĩrtũm nhÿ hã mẽ kapër jarẽnh o pa xwÿnhjaja haxwÿja kukamã tanhmã harẽnh to ho pa.

²² Jejus Krisja na prem hkukamã harẽnh o pa. Tãm na pu htem hkõt amnhĩ xunhwÿ nê amnhĩ kaxyw kãm pajamexpër rãhã ho papa nhũm Tĩrtũm ja pix ã mẽ pahpumunh kõt amnhĩm mẽ pahte amnhĩ to mex xwÿnh ã mẽ pajarẽ. Mẽ kot Jejus kõt amnhĩ xunhwÿr xwÿnh piitãã. Mẽ ixpê Ijaew nê mẽ apê Ijaew kêt xwÿnhjaja. Mẽ pahpiitã mẽ pahte axpën pyræk jakamã kot puj mẽ pahtõ Jejus kõt amnhĩ xãm nhũm Tĩrtũm Kra Jejus

kot amnhĩ to mex pix o pa kukwak ri mẽ pahpumu nẽ amnhĩm pajarẽnh o:

—Nà ãm hãmri. Ra kot ixkra Jejus kôt amnhĩ xãm jakamã ra inhmã te Jejus kot amnhĩ nhĩpêx pyrã nẽ amnhĩ to mex o pa. Anẽ.

²³ No mẽ pahtõ na mẽ pahte Tĩrtũm mẽ Jejus wa uràk nẽ amnhĩ nhĩpêx mex rãhã ho ri papa? Nà amrakati kumrêx. Mẽ pahpiitã mẽ pahte amnhĩ tomnuj xwýnh kênã.

²⁴ Tã Tĩrtũm kot mẽmoj tã mẽ pakutã nojarêt rãhã jakamã na hte Jejus Kris kukwak ri amarĩ amnhĩm mẽ pahte amnhĩ to mex xwýnh ã mẽ pajarẽnh o pa. Mẽ pahte Jejus kôt amnhĩ xunhwýr xwýnh piitãã nhũm ã mẽ pajarẽnh anẽ. Ra Jejus kot htyk o mẽ pahte amnhĩ tomnuj piitã hpãnhã amnhĩrer par jakamã na hte Tĩrtũm Jejus kukwak ri amarĩ mẽ pahte amnhĩ to mex xwýnhjê hã mẽ pajarẽ. Te mẽ pahte amnhĩ tomnuj kêt kumrêx pyrãk mẽ pajarẽ.

²⁵⁻²⁶ Na pre mẽ pahwýr Jejus mẽ nhũm mẽ pahwýr wrý nẽ mẽ panê ty nẽ htyk o mẽ pahte amnhĩ tomnuj piitã hpãnhã amnhĩrer pa. Jakamã kot pu mẽ pahtõ amnhĩ kaxyw hkôt pajamexpêr nhũm Tĩrtũm ja hã mẽ pahpumu nẽ Kra kukwak ri amnhĩ katut kôt mẽ pahte amnhĩ tomnuj piitã rẽnh pa. Jao te aa mẽ pahte amnhĩ tomnuj kêt kumrêx pyrãk ã mẽ pahpumu.

No kêt amnepêm kormã Jejus wrýk nẽ mẽ panê htyk kêt ri mẽ pa xwýnhjaja. Tanhmã na pre Tĩrtũm mẽ kot hkôt amnhĩ xunhwýr xwýnhjê nhĩpêx to? Kormã Jejus mẽ panê htyk kêt ri mẽ pa xwýnhjaja tanhmã na pre mẽ hipêx to? Nà na pre mẽ hkwyjaja amnhĩ kaxyw Tĩrtũm kôt hamaxpêr nẽ

hkôt amnhĩ xunhwỳ nhũm amnhĩ tã mẽ omu nẽ amnhĩm mẽ harẽnh o:

—Nà ãm hãmri. Koja nhỹrmã Ixkra ma mẽ hwỳr wrỳ nẽ mẽ nê ty nẽ htyk o mẽ kot amnhĩ tomnuj pãnhã amnhĩrer pa. Jakamã koja mẽ tãmjaja amnhĩ tomnuj pãnhã amnhĩrer kêt nẽ. Anẽ.

Tã nhũm Jejus tãm mẽ pahwỳr wrỳ nẽ mẽ pah-piitã mẽ panê ty. Jakamã nhũm Tĩrtũm ra mẽ pahte hkôt amnhĩ xunhwỳr xwỳnhjaja Kra kukwak ri amnhĩ katut kôt mẽ pahte amnhĩ tomnuj piitã rẽnh pa. No na hte amarĩ ã mẽ panhĩpêx anhỹr kêt nẽ. ãm Jejus tyk pix kukwak ri na hte ã mẽ panhĩpêx anẽ. ãm hãmri na hte ã mẽ panhĩpêx mex anẽ. Na hte tãm mẽ panhĩpêx rãhã ho pa.

²⁷ Jakamã kot puj mẽ ã pajamaxpêr anẽ nẽ pajamaxpêr o:

—Nà na pa hte amnhĩ to mex rãhã o ri ixpa. Amnhĩ to mex o mẽ piitã mẽ hakrenh pa.

Anhỹr o pajamaxpêr kêt nẽ. Koja mẽhõ ã hamaxpêr anẽ nẽ ãm amnhĩ jarẽnh o hêx. Na hte Tĩrtũm mẽ pahte amnhĩ to mex ã mẽ pahpumunh kôt amnhĩm mẽ pahte amnhĩ to mex xwỳnh ã mẽ pajarẽnh kêt nẽ. Mẽ pahte amnhĩ to mex rãhãre hã. Nom na pu htem amnhĩ kaxyw Jejus mã pajamaxpêr nẽ hkôt amnhĩ xunhwỳ nhũm ja hã mẽ pahpumu nẽ rĩ kormã amnhĩm mẽ pamex ã mẽ pajarẽ.

²⁸ E pa axte tanhmã mẽ amã ja jarẽnh to ka mẽ aprĩ hã inhma. Mẽmoj pumunh kôt na hte Tĩrtũm mẽ pahte amnhĩ to mex xwỳnh ã mẽ pajarẽnh wehe? Xà mẽ pahte kapêr tũm kôt amnhĩ nhĩpêx o ri papa hã mẽ pahpumunh kôt? Nà na hte ja hã mẽ pahpumunh kôt ã mẽ pajarẽnh anhỹr kêt nẽ. Mẽ

pahte hkôt amnhĩ nhĩpêx rãhã ho papare hã. ãm mẽ pahte amnhĩ kaxyw Kra Jejus kôt pajamaxpêr nê hkôt amnhĩ xunhwÿr ã mẽ pahpumunh kôt pix mã na hte mẽ pahte amnhĩ to mex xwÿnh ã mẽ pajarê. Ja pix ã mẽ pahpumunh kôt na hte ã mẽ pajarênh anê.

²⁹ Nê xà Tĩrtũm kêp mẽ ixpê Ijaew pix nhõ Tĩrtũm pix na? Nà kêp mẽ ixpìx nhõ Tĩrtũm kêt. Kêp mẽ ixpê Ijaew nhõ Tĩrtũm nê mãânên kêp mẽ apê Ijaew kêt xwÿnhjê nhõ Tĩrtũm.

³⁰ Nê Tĩrtũm ãm pyxi mex. Axtem hõ kêt. Na hte mẽ pahpiitã mẽ panhĩpêx o axpên pyræk. Jakamã na hte mẽ kot amnhĩ kaxyw Jejus kôt hamaxpêr o mẽ pa xwÿnhjê pumu nê mẽ kot amnhĩ to mex xwÿnh ã mẽ harê. Mẽ ixpê Ijaew nê mãânên mẽ apê Ijaew kêt xwÿnhjaja.

³¹ Tã koja mēhõ htÿx hamaxpêr o:

—Nà ixte amnhĩ kaxyw Jejus kôt ijamaxpêr mex o ixpa nhũm Tĩrtũm kot amnhĩm inhmex ã ijarênh jakamã kot paj axte kapêr kôt amnhĩ nhĩpêx kêt nê. Kot paj ãm amnhĩ krã hkôt amnhĩ nhĩpêx o ri ixpa. Ra Tĩrtũm kot ixto hkra kênã.

Anhÿr o ajamaxpêr japêr. Kwa mẽ ã ri ajamaxpêr anhÿr kêt nê. Na htem amnhĩ kaxyw Jejus kôt hamaxpêr hãmri nê kãm hkôt amnhĩ nhĩpêx prãm rãhã nê pa ho pa.

4

*Apraãw kot amnhĩ kaxyw Tĩrtũm kôt hamaxpêr
Karatas 3.6-18; Xiakre 2.23*

¹ Nê mẽ panhĩgêt finat Apraãwja kêp mẽ pahpê Ijaew pàr krax. Tã mẽmoj tã na pre Tĩrtũm omu nê kot amnhĩ to mex xwÿnh ã harê?

² Xà kot kām tanhmā amnhĩ nhĩpêx to hã karõ xà hkôt amnhĩ nhĩpêx mex ã omunh xà hkôt nhũm pre ã harēnh anē? Nà ja kôt kêt. Kop apu ja kôt ã kot harēnh anhỹr ronhỹx Apraãw amnhĩ tã omu nē Tĩrtũm mã amnhĩ to jarkrar nē kām:

—Pa Tĩrtũm? E mǎn ka ixpumu. Na pa hte akapêr kôt amnhĩ nhĩpêx mex o ri ixpa.

Anhỹr o nhỹx pre kām amnhĩ to jarkrar. No na pre tanhmā kām amnhĩ to jarkrar to hkêt nē.

³ Tã mēmoj tã omunh xà hkôt na pre Tĩrtũm amnhĩm mex ã harē? Nà Tĩrtũm kapêr ã kagà htũm kot tanhmā Apraãw jarēnh to kot:

Na pre Apraãw amnhĩ kaxyw Tĩrtũm kôt hamaxpêr nē hkôt amnhĩ xãm nhũm amnhĩ tã omu nē amnhĩm mex ã harē. Anē.

⁴ Mē õ patrãwjaja na htem kām mē àpênh xwỳnhjaja àpênh mex ã mē omunh xà hkôt mē kām amnhĩre.

⁵ No Tĩrtũm na hte ã mē panhĩpêx anhỹr kêt nē. Na hte mē pahte tãm amnhĩ nhĩpêx ã mē pahpumunh kôt amnhĩm mē pahte amnhĩ to mex xwỳnh ã mē pajarēnh kêt nē. ãm mē pahte amnhĩ kaxyw Kra Jejus kôt pajamaxpêr nē hkôt amnhĩ xunhwỳr ã mē pahpumunh kôt pix mã na hte amnhĩm ã mē pajarēnh anē. Ra mē pahte amnhĩ tomnuj o ri papa htã hpãnhã amnhĩ kaxyw Jejus kôt pajamaxpêr xwỳnh pixjaja na hte ã mē pajarēnh anē.

⁶ Jakamã na hte mē pamã amnhĩ jarēnh o:

—Ixte mē amex ã mē ajarēnh tã no ãm mē ate amnhĩ to mex kôt mē apumunh kôt na pa ã mē ajarēnh anhỹr kêt nē. ãm mē ate amnhĩ kaxyw Ixkra mē wa ixkôt ajamaxpêr nē wa ixkôt amnhĩ

xunhwÿr ã mẽ apumunh kôt na pa hte ã mẽ ajarēnh anē. Anē.

Pu mẽ ã kot pamã kapēr anhyr ã amnhĩ tã kuma nē pahkĩnh nē. Pahi finat Tawi na pre haxwÿja ja jarēnh o:

⁷ Na hte Tĩrtũm amnhĩ katut kôt mẽ pahte amnhĩ tomnuj piitã rēnh pa nē axte kãm hamaxpēr kêt nē.

Jakamã pu mẽ ja hã amnhĩ pumu nē pahkĩnh nē.

⁸ Nē amnhĩ kukamã pajamaxpēr o: “Hêxta waa nē. Na pa pre amnhĩ tomnuj o ixpa nē tee ri ja hã amnhĩ pumu nē ixkaprĩ nē.

Hãmri nē amnhĩ to Tĩrtũm wÿ nhũm inhma nē ixte amnhĩ tomnuj o hapêx pa nē axte kãm hamaxpēr kêt nē.

Nã ãm hãmri. Ja mex kumrêx.” Anē.

⁹ Tã mẽ kot ja hã amnhĩ pumunh nē hkĩnh xwÿnhjaja mẽmojaja na mẽ? Xà mẽ kot amnhĩ my kwÿrÿt kã jakàr xwÿnh pix kwÿjaja na pre pahi Tawija ã mẽ harēnh anē nã? Nã mẽ tapxipixjaja kêt. Mããnēn mẽ kot amnhĩ jakàr kêt xwÿnh kwÿjaja. Tanhmã na pre ra Tĩrtũm kapēr ã kagà htũm kot finat Apraãw jarēnh to? Na pre harēnh o:

Na pre Apraãw amnhĩ kaxyw Tĩrtũm kôt hamaxpēr nē hkôt amnhĩ xãm nhũm amnhĩ tã omu nē amnhĩm mex ã harē. Anē.

¹⁰ Xà Apraãw ra kot amnhĩ my kwÿrÿt kã krãhyr nhĩrô pē na pre Tĩrtũm amnhĩm mex ã harē? Nã kormã kot amnhĩ krãhyr kêt ri na pre ã harēnh anē.

¹¹ Kormã kot amnhĩ krãhyr kêt ri kãm kapēr nē kãm:

—E ate amnhĩ kaxyw inhmã ajamaxpêr nê ixkôt amnhĩ xãm ã ixte apumunh kôt na pa amnhĩm amex ã ajarê.

Anhÿr o kãm kapêr hãmri nê rĩ kormã kãm tanhmã amnhĩ krãhyr to hã kãm karõ nhũm kuma nê mar xà hkôt amnhĩ my kwryt kà hkwÿ krãhta. Kot Tĩrtũm mã amnhĩ nhõr ã amnhĩ to amnhĩrĩt kaxyw ã amnhĩ nhĩpêx anê.

Nom kormã amnhĩ krãhyr kêt ri na pre Tĩrtũm amnhĩm mex ã harê. Tã Ijaew kêt xwÿnhjaja kot amnhĩ jakàr kêt tã mẽ hkwÿjaja Apraãw pyrà nê amnhĩ kaxyw Tĩrtũm mã hamaxpêr nê kãm amnhĩ nhõr jakamã Apraãw te kêp mẽ hpàr krax maati pyràk.

¹² Nê mããnên mẽ pahpê Ijaew. Kot puj mẽ pahtõ amnhĩ kaxyw Tĩrtũm kôt pajamaxpêr nhũm amnhĩ tã mẽ pahpumu nê mẽ pamex ã mẽ pajarê. No ãm mẽ pahte amnhĩ jakàr ã mẽ pahpumunh kôt ã mẽ pajarênh anhÿr kêt nê. ãm Apraãw pyrà nê amnhĩ kaxyw Tĩrtũm kôt pajamaxpêr pix ã mẽ pahpumunh kôt na hte mẽ pamex ã mẽ pajarê. Kormã Apraãw kot amnhĩ my kwryt kà krãhyr kêt ri ra kot amnhĩ kaxyw Tĩrtũm mã hamaxpêr jakamã kêp mẽ pahpê Ijaew mẽ pahte uràk nê amnhĩ kaxyw Tĩrtũm mã pajamaxpêr xwÿnhjê hpàr krax maati. Ijaew kêt xwÿnhjê pyrà nê kêp mẽ pahpàr krax maati.

*Tĩrtũm kot Apraãw mã mẽmoj mex jarênh
Karatas 3.22*

¹³ Amnepêm na pre Tĩrtũm Apraãw mã tanhmã kapêr to nê kãm:

—E koja nhÿrmã akanrêhã akra nê atàmnhwÿjaja amÿrpê apyrà nê krÿ piitã hkôt mẽ kêp mẽ õ pahi. Anê.

Tã tanhmã Apraãw kot amnhÿ nhÿpêx to hã omunh xà hkôt na pre ã kãm kapêr anê? Xà kot kãm tanhmã amnhÿ nhÿpêx to hã karõ nhũm kot hkôt amnhÿ nhÿpêx mex ã omunh xà hkôt na pre hkÿnh nê ã kãm kapêr anê? Nà kot anhÿr kêt. Mẽ pahõt kot pu we Tÿrtũm kapêr xà hkôt pix mã amnhÿ nhÿpêx mex rãhã ho ri papa? Mẽ pahpê hihtÿx kênã. Æm kot amnhÿ kaxyw Tÿrtũm kôt hamaxpêr nhũm kot amnhÿ tã omunh nê amnhÿm mex ã harênh kôt pix mã na pre ã kãm kapêr anê.

¹⁴ Kop apu kot kãm tanhmã kapêr to nê kãm:

—E Apraãw. Kot kaj ixkapêr piitã ama nê hkôt amnhÿ nhÿpêx mex rãhã ho ri apa. Hã koja nhÿrmã akanrêhã akra nê atàmnhwÿjaja kêp krÿ piitã hkôt mẽõ pahihiti.

Anhÿr o kãm kapêr ronhÿx ãm kãm ã kapêr anhÿr kaprÿ. Apraãw aa kot kapêr piitã hkôt amnhÿ nhÿpêx mex o pare hã. Kop apu ã kãm kapêr anhÿr ronhÿx pre kuma nê tee ri amnhÿ kukamã hamaxpêr nê hamaxpêr o:

—Kwa nà. Ra ixte Tÿrtũm kôt amnhÿ xãm tã tanhmã kot pa amnhÿ to nê kapêr piitã hkôt amnhÿ nhÿpêx mex rãhã ho ri ixpa? Kot paj tee ri inhmã ã amnhÿ nhÿpêx anhÿr o ixpa hprãm kaprÿ. Jakamã koja nhÿrmã ixkanrêhã ixkra nê ixtàmnhwÿjaja kêp mẽ õ pahi hkêt nê pa. Hêxta waa nê.

¹⁵ Kojã Tÿrtũm ixte kapêr kwÿm ri tanhmã ixte amnhÿ tomnuj to hã ixpumu nê tanhmã ixtomnuj to. No mẽhõ kot we kapêr piitã hkôt amnhÿ nhÿpêx mex rãhã ho pa? Nà amrakati kumrêx.

Anhÿr o nhÿx pre hamaxpÿr.

¹⁶ No na pre Tÿrtÿm ã kãm kapÿr anhÿr kêt nÿ. Ra kot hprÿ hã mÿ pahte amnhÿ nhÿpêx ã mÿ pah-pumunh mex kênã. Na pre ãm kãm:

—E ate amnhÿ kaxyw ixkôt ajamaxpÿr nÿ ixkôt amnhÿ xãm jakamã kot paj amarÿ ato mex nÿ. Anÿ.

Tÿrtÿm na hte mÿmoj tã amnhÿ jarÿnh o amnhÿ to hêx kêt nÿ. Na hte mÿmoj tã amnhÿ jarÿnh xà hkôt tanhmã mÿmoj nhÿpêx to ho ri pa. Jakamã koja mÿ pahte Apraãw pyrã nÿ amnhÿ kaxyw hkôt pajamaxpÿr xwÿnh piitã mÿ pahto mex nÿ.

Nÿ xà na pre ã mÿ pamã kapÿr anÿ nÿ mÿ pamã:

—E kot kaj mÿ ixkapÿr kôt pix mã ri amnhÿ nhÿpêx o ri apa hã kot paj mÿ ato mex rax nÿ.

Anhÿr o mÿ pamã kapÿr? Nà na pre ã mÿ pamã kapÿr anhÿr kêt nÿ. Na pre mÿ pamã:

—Kot kaj mÿ finat Apraãw pyrã nÿ amnhÿ kaxyw ixkôt ajamaxpÿr nÿ ixkôt amnhÿ xunhwÿ hã kot paj mÿ ato mex nÿ.

Anhÿr o mÿ pamã kapÿr. Tã Apraãw kumrêx kot mÿ pakukamã amnhÿ kaxyw hkôt hamaxpÿr jakamã te kêp mÿ pahpiitã mÿ pahte urak nÿ ã amnhÿ nhÿpêx anhÿr xwÿnhjê pàr krax maati pyrak.

¹⁷ Amnepêm na pre Tÿrtÿm tanhmã Apraãw mã kapÿr to. Kot tanhmã kãm kapÿr toja Tÿrtÿm kapÿr ã kagã htÿm kamã na. Na pre kãm:

Kot kaj apê ahpÿnhã ri mÿ urojê hpàr krax. Anÿ. Kormã Apraãw kra hkêt tã nhÿm hkra hkukamã ã kãm kapÿr anÿ. Hãmri nhÿm kuma nÿ hkôt hamaxpÿr kurê kumrêx nÿ hamaxpÿr o:

—Hêxta waa nÿ. Ra ixprô mÿ wa ijamÿ wa ixpigêt tÿx nÿ wa ixkra hkêt kumrêx. Kot paj

wa tanhmã amnhĩ to nẽ tokyx ty. Tã ra Tĩrtũm kot ixkra nẽ ixtãmnhwỳjê hkukamã ã inhmã mẽ harēnh anhỹr kēnã. Jakamã kot pa xep wa ixpigêt tỳx tã tanhmã amnhĩ to nẽ ixkra. Nà kot pa xep wa anẽ. Nẽ koja ixkraja tanhmã amnhĩ to nẽ ixpê htyk japêr tã koja Tĩrtũm akupỹm inhmã ho htĩr. Nà koja inhmã ho anẽ. Ra kot inhmã ixkra nẽ ixkanrēhã ixtãmnhwỳ xohtô jarēnh kēnã. Anẽ.

18-19 Na pre ra hpigêt tỳx nẽ. Ra hã amgrà pê 100 nẽ hkurê kêt nẽ pa. Nhũm hprō määnēn hpigêx tỳx nẽ. Nẽ õhy kamã hkra hkêt kumrêx. Kormã wa hkra hkêt tã nhũm Tĩrtũm Apraãw mã hkra nẽ htãmnhwỳ xohtô hã harẽ. Nẽ kêp mẽ urojê xohtôjê pàr krax ã kãm harẽ. Hãmri nhũm kuma nẽ amnhĩ kaxyw hkôt hamaxpêr tỳx kurê kumrêx.

20 Nẽ ã amnhĩ nhĩpêx anhỹr rãhã ho pa. Na pre war amnhĩ kra hã amnhĩ jarēnh ma nẽ tee ri amnhĩ kukamã hamaxpêr kêt nẽ. ãm Tĩrtũm tãm kot wa kãm wa hkra jarēnh pix mã hamaxpêr pê amnhĩ kaxyw kãm hamaxpêr tỳx o ri wa pa. Nẽ hamaxpêr o:

—Nà ra wa ixpigêt tỳx kumrêx tã koja xep Tĩrtũm wa inhmã wa ixkra hõ gõ. Nà koja wa inhmã kugõ. Hêxta waa nẽ. ãm hãmri Tĩrtũmja mex o mex.

21 Nà kot wa inhmã wa ixkra jarēnh xà hkôt koja wa inhmã kugõ. Ja kaxyw àhpumunh o àhpumunh. Tĩrtũmja hêx kêt. Anẽ.

22 Hãmri nhũm Tĩrtũm ã hamaxpêr anhỹr ã omu nẽ amnhĩm mex ã harẽ. Nẽ kot kãm amnhĩ jarēnh xà hkôt wa kãm wa hkraja gõ.

23 Nom na pre amnhĩm Apraãwja pix mex ã harēnh kêt nẽ.

24 Kot puj mẽ pahtõ uràk nẽ amnhĩ kaxyw hkõt pajamaxpěr nhũm amnhĩ tã mẽ pahpumu nẽ ra kot Apraãw jarẽnhta pyrà nẽ amnhĩm mẽ pamex ã mẽ pajarẽ. Na pre mẽ panhõ Pahihti Jejus ty nhũm Tĩrtũm akupỹm ho htĩr. Tã mẽ papajaja na pu prem amnhĩ kaxyw Jejus kõt pajamaxpěr nhũm Tĩrtũm ja hã mẽ pahpumunh kõt mẽ pahte amnhĩ to mex xwỳnh ã mẽ pajarẽ.

25 Na pre mẽ pahwỳr Kra Jejus mẽ nhũm mẽ pahwỳr wrỳ. Tã nhũm mẽ axtem nẽ kupĩ nom nhũm amarĩ htyk kêt nẽ. Na pre htyk o mẽ pahte amnhĩ tomnuj pãnhã amnhĩrer pa. Ja kaxyw na pre Tĩrtũm mẽ pahwỳr kumẽ. Jakamã nhũm prem kupĩ nhũm akupỹm ho htĩr. Tã mẽmo kaxyw na pre Tĩrtũm ã mẽ pahwỳr Kraja mẽn nhũm mẽ panẽ htyk anẽ nhũm akupỹm ho htĩr? ãm kot kukwak ri amnhĩm mẽ pahte amnhĩ kaxyw hkõt pajamaxpěr xwỳnhjaja mẽ pahte amnhĩ to mex xwỳnh ã mẽ pajarẽn pix kaxyw.

5

Tĩrtũm kot mẽ pahto hkwỳ hã harẽn

Matêwre 5.12; Sikũn Korĩt 4.8, 5.18-21; Xiakre 1.2-4; Wam Pêtre 4.12, 5.9

¹ Nẽ na pu prem amnhĩ tomnuj o ri papa nhũm Tĩrtũm ja hã mẽ pahpumu nhũm ja kęp omnuj nẽ. Jakamã nhũm Jejus amnhĩ grõnh kõt wrỳ nẽ mẽ panẽ ty. Nhũm Tĩrtũm htykja kukwak ri mẽ pahto hkwỳ. Mẽ pahte amnhĩ kaxyw hkõt pajamaxpěr nẽ hkõt amnhĩ xunhwỳr ã mẽ pahpumu hãmri nẽ ã mẽ panhĩpêx anẽ pu mẽ ra pahpê hkwỳ hã papa.

² Na pre Jejus Tĩrtũm mã mẽ pajarẽn o:

—E jajê pumu. Na mẽ ra amnhĩ kaxyw pamã hamaxpêr nê pahkôt amnhĩ xunhwỳ. Anê.

Hãmri nhũm kuma nê mẽ pahto mex nê mẽ pakutã nojarêt rãhã ho pa. Tã kot puj mẽ pahpê hkrajaja nhỹrmã pano ho Tĩrtũm mex o mex xwỳnhja pumu. Jakamã na pu htem amnhĩ kukamã ã pajamaxpêr anhỹr o pahkĩnh nê papa nê pajamaxpêr o:

—Hêxta waa nê. Kot paj nhỹrmã inhno ho Tĩrtũm mex o mex ã omu nê kuri ixpa ho ixpa. Nà ãm hãmri. Inhmã omunh prãm tỳx kumrêx. Anê.

³⁻⁴ Nê na htem Jejus ã mẽ pahptomnuj nê pu mẽ pahpunuj nê ri papa. Pamex kêt nê tã tee ri amnhĩ kukamã pajamaxpêr o ri pahkaprĩ nê papa hkêt nê. Kwãr mẽ mãmri ã mẽ panhĩpêx anê. Pu mẽ pahpunuj kurê Jejus kôt amnhĩ xunhwỳr tỳx o kormã mỗ. Nê mẽ umaj hkaga hkêt nê. Arĩ amnhĩ wỳr kamã pajamak o papa. Jao amnhĩ kaxyw kumã pix mã kãm pajamaxpêr tỳx rãhã pahkĩnh nê ri papa.

Kot puj mẽ ã amnhĩ nhĩpêx anhỹr o ri papa nhũm Tĩrtũm ja hã mẽ pahpumu nhũm ja kãm mex nê. Hãmri nhũm ja kaxyw tanhmã mẽ pahto paxihtỳx to pu mẽ pahpunuj tã hkôt pajamaxpêr tỳx rãhã nê.

⁵ Nê ra mẽ kot Jejus ã tanhmã mẽ panhĩpêx to htã pu mẽ amnhĩ kaxyw tee ri kãm pajamaxpêr kaprỳ hkêt nê. Ra kot mẽ pamã amnhĩ Karõ nhõr nhũm kot mẽ pahkarõ mã gjêx kênã kot pu kêt mẽ ri tee ri amnhĩ kaxyw kãm pajamaxpêr kaprỳ. Na hte Karõja mẽ pahkarõ kamã mẽ pamã Tĩrtũm kapêr jarênh o amnhĩrĩt nê kãm mẽ pajapê htỳx ã harênh o amnhĩrĩt rãhã nê.

⁶ Amnepê mã na pre mẽ piitã amnhĩ tomnuj o ri pa nê tee ri kãm amnhĩ to mex rãhã hprãm kaprÿ. Mẽhõ kot we ja kaxyw tanhmã mẽ hkrã hto? Jakamã nhũm Tĩrtũm ja hã mẽ omu hãmri nê mẽ kaxyw Kra Jejus mã kãm:

—E inhma. Ka kot kaj mẽ kot tanhmã amnhĩ tomnuj to ho paja ã ma mẽ hwÿr wrÿ. Ixte mẽ nê atyk kaxyw agrõnh kõt mẽ hwÿr amẽnh jakamã kot kaj wrÿ nê mẽ kãm ixkapêr jarẽnh o ri mẽ hkõt apa. Rãhã nhũm mẽ hkwÿjaja apĩ ka mẽ piitã mẽ nê ty. Anẽ.

Hãmri nhũm kuma nê kãm:

—Tõe. Nà kot paj amã hprãm xà hkõt ã amnhĩ nhĩpêx anẽ. Anẽ.

Hãmri nê man amnhĩ grõnh kõt mẽ pahwÿr wrÿ.

⁷⁻⁸ Xà koja mẽhõ kãm axpẽn japê xàj axpẽn nê ty nà? Xà kot mẽhõ tãm kot amnhĩ nhĩpêx xwÿnh tã nhũm mẽ kot hpĩr kaxyw nhũm hkrãmnhwÿja kãm hapê nê. Nê nê amnhĩ grõnh kõt mẽ kãm xa nhũm mẽ kupĩ nhũm nê ty? Nà kot apu nê htyk japêr ko. No mẽ papajaja. Na pu htem mẽhõ hkrãmnhwÿta kĩnhã arĩ amnhĩ tomnuj rãhã ho ri papa htã nhũm Tĩrtũmja arĩ kãm mẽ pajapê nê. Nê kãm mẽ pajapê xàj mẽ pahwÿr Kris mẽ nhũm mẽ panê ty. Arĩ mẽ pahte amnhĩ tomnuj rãhã ho papa tãã. Na pre ã Tĩrtũmja kãm mẽ pajapê hã ã mẽ pahwÿr mẽn anẽ.

⁹ Na pre ty nhũm hkamrô hkwÿ axkapĩ nhũm Tĩrtũm ja hã omunh xà hkõt tãm amnhĩm mẽ pax-unhwÿ. Tã Jejus kukwak ri koja ma mẽ kot amnhĩ xà htÿx kamã hamak tũm xàta wÿr mẽ parẽnh kêt nê. Mẽ pahpê hkwÿ kênã kot kêt hwÿr mẽ parê.

¹⁰ Nom kormã mẽ pahpê hkwÿ hkêt ri na pu prem te ra kutã amnhĩ xunhwÿr pyrãk o amnhĩ

nhĩpêx. Tã nhũm Kra mẽ panê ty pu mẽ hkôt amnhĩ xunhwỳ. Jakamã nhũm Tĩrtũm Jejus tyk kukwak ri mẽ pahto hkwỳ. Nẽ ra akupỹm Kra ho htĩr jakamã kot puj mẽ pahte hkôt amnhĩ xunhwỳr xwỳnhjaja nhỹrmã wa uràk nẽ wa kuri pahtĩr tũm nẽ pamex kumrẽx nẽ papa ho papa.

¹¹ Nẽ mẽ pahpê kuwy rax wỳr mẽ papa mã xwỳnh kêt jakamã na pu htem pahkĩnh nẽ pajamakêtkati nẽ ri papa. Nom ja pix ã na pu htem ã amnhĩ nhĩpêx anhỹr kêt nẽ. Mẽ pahpê Tĩrtũm kràmnhwỳ jakamã na pu htem mããnẽn pahkĩnh nẽ ri papa. Pahihti Jejus Kris kot mẽ panê htyk ã omunh xà hkôt na pre Tĩrtũm mẽ pahte hkôt amnhĩ xunhwỳr xwỳnhjê ho hkwỳ jakamã na pu htem pahkĩnh nẽ pajamakêtkati nẽ ri papa.

Atãw mẽ Kris wa harẽn
Wam Korĩt 15.20-22, 45-49

¹²⁻¹³ Nẽ amnepêm na pre Tĩrtũm finat Mojes mã tanhmã kapêr to. Hãmri nhũm kuma nẽ Ijaew kot tanhmã amnhĩ nhĩpêx to ho pa kaxyw mẽ kãm mẽmojta ã karõ nẽ mẽ kãm hã hkagà. Mẽ kot kamã harẽn nẽ mar nẽ Tĩrtũm kôt amnhĩ nhĩpêx kaxyw. Hãmri nhũm mẽ tee ri ã kot mẽ kãm mẽmoj tã karõja ma nẽ tanhmã axpên mã kapêr to nẽ axpên mã:

—Kwa na pu htem ã amnhĩ nhĩpêx anhỹr kêt nẽ. Na pu htem ãm amnhĩ tomnuj tỳx kumrẽx o ri papa nẽ amnhĩ to mex kêt kumrẽx. Anẽ.

Ãm hãmri na prem ã amnhĩ jarẽn anẽ. Mẽ pahpiitã mẽ pahte amnhĩ tomnuj xwỳnh kênã. My kot wa pê finat Atãwja kumrẽx na pre tanhmã mẽ pahte amnhĩ tomnuj to ho hkrax. Mỳrapê na pre htĩr tũm nẽ ri pa ho pa hkêt nẽ. Na pre ri pa

ně gaa ně rĩ hpigêt tỳx ně ty. Tã mỳr pê ri mẽ papa xwỳnhjaja na pu htem uràk ně tanhmã amnhĩ tomnuj to ho ri papa. Mỳrapê na pu htem ri papa ně gaa ně Atãw pyrà ně pahtyk pa. Tĩrtũm kot mẽ pahã Atãw mã kapêr xà hkôt.

¹⁴⁻¹⁹ Jakamã na prem kormã Mojes kator xwỳj ri pika piitã hkôt ri pa ně gaa ně haxwỳja htyk pa. Mẽ kot amnhĩ tomnuj mỳrapê ty. Atãw pyrà ně Tĩrtũm kot mẽmo xô nê hkurê xwỳnhta krêr kêt tã uràk ně tanhmã amnhĩ tomnuj to ho ri pa. Hãmri ně mỳrapê ty.

Na pre ã Atãwja mẽ pahpiitã mẽ pamã Tĩrtũm kapêr nhĩrôp ãm ně amnhĩ tomnuj o hkrax anê ně mẽmo xôta krê. Jao te mẽ pahpiitã mẽ pahte uràk ně kumê hkur pyràk o mẽ panhĩpêx. Mỳrapê nhũm htem arĩ pika piitã hkôt hapôj ně kormã hprĩre htã ra Atãw pyrà ně tanhmã amnhĩ tomnuj to ho ri pa. Jakamã nhũm Tĩrtũm Atãw kot tanhmã amnhĩ tomnuj to hã omunh xà hkôt mẽ pakukamã hamaxpêr o:

—Nà koja mẽ Atãw pyrà ně amnhĩ tomnuj o ri pa. Mỳrapê kot paj ma mẽ kot amnhĩ xà htỳx kamã hamak tũm xàta wỳr mẽ rênh pa. Anê.

Tã Jejus Kris mẽ Atãw wa harênhja kot axpên pyràk jakamã na hte Atãw kanrêhã hkra ně htãmnhwỳjaja Atãw kot amnhĩ nhĩpêx kôt amnhĩ nhĩpêx o ri pa rãhã ně. Uràk ně amnhĩ tomnuj rãhã ho ri pa. Nhũm axtem Jejus kôt mẽ kot amnhĩ xunhwỳr xwỳnhjaja Jejus kôt amnhĩ nhĩpêx rãhã ho ri pa. Te mẽ kêp hkanrêhã hkra ně htãmnhwỳjê pyrà ně uràk ně tãm amnhĩ nhĩpêx. Na htem ã ahpỳnhã amnhĩ nhĩpêx anhỳr o ri pa. Na pre Jejus mẽ pahte amnhĩ tomnuj pãnhã amnhĩrer par

kaxyw mẽ panê ty. Jakamã mẽ pahte hkôt amnhĩ xunhwỳr xwỳnhjaja na hte Tĩrtũm ja hã mẽ pah-pumunh kôt mẽ pahto hkra. Kot puj mẽ nhỹrmã pahtyk tã nhũm akupỹm mẽ pahto mẽ pahtĩr pu mẽ wa kuri pahtĩr tũm nẽ papa ho papa.

Atãw kot Tĩrtũm kapẽr nhĩrôp ãm jakamã na hte Tĩrtũm mẽ pahpiitã mẽ pahte amnhĩ tomnuj xwỳnh ã mẽ pajarẽ. Nom nhũm Jejus Atãw rom kot Tĩrtũm kapẽr mar nẽ hkôt amnhĩ nhĩpêx rãhã jakamã na hte Tĩrtũm mẽ pahte hkôt amnhĩ xunhwỳr xwỳnhjaja amnhĩm mẽ pahte amnhĩ to mex xwỳnh ã mẽ pajarẽ.

Nhũm Atãw kot Jejus kĩnhã Tĩrtũm kapẽr nhĩrôp ãm mỳrapê na hte mỳr pê mẽ pa xwỳnhjaja ohtô nẽ pa nẽ gaa nẽ Atãw pyrã nẽ htyk pa. Hãmri nẽ kormã htĩr ri amnhĩ to mex o pa hkêt mỳrapê ma mẽ kot amnhĩ xà htỳx kamã hamak tũm xàta wỳr ma hapêx. Tã nhũm Tĩrtũmja mex o mex jakamã na hte Jejus Kris mẽ wa mẽ pakamã ukaprĩ nẽ. Jakamã na pre mẽ pahwỳr Jejus mẽ nhũm mẽ pahwỳr wrỳ hãmri nẽ htyk o mẽ pahte amnhĩ tomnuj pãnhã amnhĩre. Nhũm Tĩrtũm ã kot amnhĩ nhĩpêx anhỹr kukwak ri mẽ pahte hkôt amnhĩ xunhwỳr xwỳnhjaja amarĩ tanhmã mẽ pahto mex to ho ri pa. Atãw kot amnhĩ tomnuj pix pumunh kôt na pre Tĩrtũm mẽ pahpiitã mẽ pahte amnhĩ tomnuj xwỳnh ã mẽ pajarẽ. Tã nhũm Jejus mẽ pakamã ukaprĩ nẽ mẽ panê ty nhũm Tĩrtũm ja hã omunh xà hkôt ra mẽ pahte amnhĩ kaxyw hkôt pajamaxpẽr xwỳnhjaja te mẽ pahte aa tanhmã amnhĩ tomnuj to hkêt pyrãk o mẽ panhĩpêx. Na hte amarĩ ã mẽ panhĩpêx anẽ.

Ně Atãw kot amnhĩ tomnuj mỳrapê na htem piitã ri pa ně tanhmã amnhĩ to ně ty rỳ ri pa ně gaa ně wejre ně ty. No na pre Jejus Krisja aa kot amnhĩ tomnuj kêt kumrêx tã amarĩ mẽ panê ty. Jakamã nhũm Tĩrtũm ra kukwak ri mẽ pahte hkôt amnhĩ xunhwỳr xwỳnhjê kutã nojarêr rãhã ně mẽ pakukamã hamaxpêr o:

—Nà mẽ kot Ixkra hkôt amnhĩ xunhwỳr xwỳnhjaja na pa mẽ omunh pa. Tã kot paj Ixkrata kukwak ri tãm mẽ unhwỳ nhũm mẽ nhỹrmã wa ixri mex ně htĩr tũm ně pa ho pa. Aně.

²⁰⁻²¹ Ně na pre Tĩrtũm tanhmã finat Mojes mã kapêr to. Mẽ piitã mẽ kot amnhĩ tomnuj o ri mẽ pa hã amnhĩ pumunh kaxyw. Hãmri ně mẽ kot kapêr mar ně hkôt amnhĩ nhĩpêx o pa kaxyw tanhmã mẽ kaxyw Mojes mã kapêr to. Nhũm kuma ně amnhĩ xô ri mẽ kãm hã kagà ně mẽ kãm harênh o ri mẽ hkôt pa. No nhũm prem kapêr ma ně ãm kuma ně hkwỳm pix mã ri tanhmã amnhĩ tomnuj to ho pa. Ně pika piitã hkôt ja arĩ rãhãã. Ja mỳrapê koja mẽ nhỹrmã ty ně ma mẽ kot amnhĩ xà htỳx kamã hamak tũm xàta wỳr ma pa. Nom Tĩrtũm arĩ kãm pika piitã hkôt mẽ papa xwỳnhjê japê ně. Mẽ pahte amnhĩ tomnuj o papa tã nhũm kãm mẽ pahto mex prãm ně. Jakamã na pre mẽ pahwỳr Kra Jejus Kris mẽ nhũm mẽ pahwỳr wrỳ. Mẽ panê htyk o kot mẽ pahte amnhĩ tomnuj pãnhã amnhĩrer kaxyw. Tã kukwak ri kot puj mẽ pahte amnhĩ kaxyw hkôt pajamaxpêr xwỳnhjaja nhỹrmã Tĩrtũm mẽ wa kuri pahtĩr tũm ně pa mex ně papa ho papa.

*Mě kot mě pahkrã kumrã ã mě harěnh
Sikũn Korĩt 5.17; Karatas 2.19-20, 5.24, 6.14;
Epes 4.17-24; Korosě 3.1-11; Wam Pêtre 4.1-6*

¹ Ně mě pahte arĩ tōhã tanhmã amnhĩ tomnuj to htã nhũm Tĩrtũm arĩ kãm mě pajapê ně. Ně arĩ mě pakutã nojarêr rãhã ně. Jakamã xà kot kaj mě atō ã harěnh anhỹrja ma ně atyx ri ã ajamaxpěr aně ně ajamaxpěr o:

—Nà Tĩrtũm kãm ijapê ně kot ixkutã nojarêr rãhã ho ri pa jakamã mo kaxyw kot pa Jejus kôt amnhĩ nhĩpêx o ri ixpa? Nà kot paj ho anhỹr kêt ně. Aně.

Ka ã mě atō atyx ri ajamaxpěr anhỹr japêr. Kwa xà ajamaxpěrja mex? Nà mex kêt.

² Æ ajamaxpěr anhỹrja mě hamaxpěr mex xà hkôt kêt. Ra mě pahte Jejus kôt amnhĩ xunhwyr ně mě pahte amnhĩ tomnuj kaga jakamã nhũm mě pahte amnhĩ tomnujja te ra mě pahpê hapêx pyrãk. Jakamã kot puj mě arĩ tanhmã amnhĩ tomnuj to ho ri papa hkêt ně.

³ Měmo kaxyw na htem Tĩrtũm mã mě pahkrã kumrã? Nà mě pahte ra Jejus kôt amnhĩ xunhwyr ã amnhĩ to amnhĩrĩt kaxyw. Te Jejus htyk nhũm mě pahte amnhĩ tomnujja haxwýja hkôt htyk ně hapêx par pyrãk o amnhĩrĩt kaxyw. Jakamã na pu htem pajamaxpěr o:

—Nà kot paj axte tanhmã amnhĩ tomnuj to ho ri ixpa hkêt ně. Aně.

⁴ Na htem Tĩrtũm mã gôx kãm mě pahkrã kumrã nhũm mě pahte amnhĩ nhĩpêx tũmja te mě kot Jejus kôt haxwýja haxàr pyrãk. Hãmri nhũm mě akupým mě pahto api. Te Tĩrtũm hihtyx o hihtyx o kot akupým Kra Jejus ho htĩr pyrãk. Te mě

pahtyk tä nhũm akupỹm kot mẽ pahto mẽ pahtĩr pyræk. Pãnhã mẽ pahte amnhĩ nhĩpêx nyw o amnhĩ nhĩpêx kaxyw.

⁵ Nhũm mẽ pahte amnhĩ nhĩpêx tũmja te Jejus kôt htyk nẽ hapêx par pyræk. Nẽ mẽ pahte amnhĩ nhĩpêx nywja te Jejus akupỹm htĩr pyræk o amnhĩ nhĩpêx.

⁶ Amnepêm na pu pre htem amnhĩ tomnuj rãhã ho ri papa. Te mẽ kãm mẽ àpênh xwỳnhjaja kot mẽ õ patrãw mã àpênh rãhãta pyræk. Tã nhũm Kris mẽ panê ty. Kot mẽ panê mẽ pahte amnhĩ tomnuj pãnhã amnhĩrer nẽ ho hapêx par kaxyw mẽ panê ty. Jakamã te mẽ pahte amnhĩ tomnuj mẽ pajamxpêr punujja te pĩ kahpa hã Jejus kôt harir nẽ htyk nẽ hapêx par pyræk. Pãnhã mẽ pahte amnhĩ nhĩpêx nyw pix o amnhĩ nhĩpêx kaxyw. Nẽ mẽ pajamxpêr nyw pix o pajamxpêr papa kaxyw.

⁷ Na hte mẽ htyk xwỳnhjaja axte tanhmã amnhĩ tomnuj to hkêt nẽ. Tã kêr pu mẽ uræk nẽ axte ã amnhĩ nhĩpêx anhỹr kêt nẽ.

⁸ Na pu prem Jejus kot mẽ panê htyk ã harênh ma nẽ pajamxpêr o:

—Nà ra Jejus kot mẽ panê htyk jakamã kot paj ixte amnhĩ nhĩpêx tũm kaga hpa nẽ hpãnhã kot amnhĩ nhĩpêx kôt pix mã ri amnhĩ nhĩpêx o ri ixpa. Te ra ixtyk nẽ axte tanhmã ixte amnhĩ tomnuj to ho ri ixpa hkêt pyræk. Jao amnhĩ nhĩpêx nyw pix o amnhĩ nhĩpêx o ri ixpa. Anẽ.

⁹ Nẽ Jejus htyk nhũm Tĩrtũm akupỹm ho htĩr jakamã koja axte htyk kêt nẽ. Ra mẽ pahte ja mar mex.

10 Na pre ãm htyk tipxi htã htykja o mẽ pahpiitã mẽ pahte amnhĩ tomnuj pãnhã amnhĩre. Tã ra akupỹm htĩr o htĩr nẽ kaxkwa kamã Tĩrtũm mã tanhmã amnhĩ nhĩpêx to ho ri pa.

11 Tã mẽ papajaja kot puj mẽ ã kot amnhĩ nhĩpêx anhỹrja ma nẽ ã pajamaxpêr anẽ nẽ pajamaxpêr o:

—Nà ãm hãmri. Te ixte Jejus pyrã nẽ ra ixtyk pyrãk jakamã kot paj axte amnhĩ tomnuj o ri ixpa hkêt nẽ. Te ixte Jejus pyrã nẽ akupỹm ixtĩr nẽ ãm Tĩrtũm kôt pix mã amnhĩ nhĩpêx o ri ixpata pyrãk o kot paj hpãnhã amnhĩ nhĩpêx o ri ixpa. Anẽ.

12 Jakamã kot ka mẽ atõ nhỹrmã tanhmã amnhĩ kukamã ajamaxpêr punuj to japêr hãmri nẽ ajamaxpêr o:

—Nà inhmã ã amnhĩ tomnuj anhỹr prãm nẽ. Omnuj tã kot paj ho anẽ. Nà ixte ho anhỹr mã kênã.

Anhỹr o ajamaxpêr japêr tã kwa mẽ ã ajamaxpêr anhỹr kêt nẽ.

13 Kêt Tĩrtũm mã mãn amnhĩ gõ nẽ hkôt amnhĩ nhĩpêx o ri apa. Hãmri nẽ amnhĩ krã kamã mẽmoj mex pix mã ajamaxpêr nẽ tãm akapêr. Nẽ mẽ kot amnhĩ to mex xwỳnhjê kôt pix mã mãn ri apa.

Na ka pre htem akapêr punuj nẽ.

Nẽ ajamaxpêr punuj nẽ.

Nẽ mẽ kot amnhĩ tomnuj o mẽ pa xwỳnhjê hkôt ri apa.

Nẽ kagôxỹhti japrô nẽ ho akôm o ri mẽ hkôt apa.

Tã ra hpãnhã Tĩrtũm mã amnhĩ gõ nẽ axte ã amnhĩ nhĩpêx anhỹr kêt nẽ.

14 Amnepêm na pu prem tanhmã mẽ pahte amnhĩ nhĩpêx to ho papa hkukamã pajamaxpêr nẽ pajamaxpêr o:

—Nà kot paj Tĩrtũm kapẽr kõt pix mã mãn ri amnhĩ nhĩpêx o ri ixpa nẽ amnhĩ to mex o ri ixpa nhũm Tĩrtũm ja hã ixpumu nẽ amnhĩm inhmex ã ijarẽ. Nà kot paj anẽ.

Anhỹr tã no ãm tee ri mẽ pamã hkõt amnhĩ nhĩpêx o ri papa hprãm kaprỹ nẽ arĩ ri kapẽr kwỹm tanhmã amnhĩ nhĩpêx to ho ri papa. Tã ra hpãnhã axtem pajamxpẽr o:

—Nà Tĩrtũm kot ixkutã nojarêt rãhã ho pa xwỹnh. Tã ra ixte hkõt amnhĩ xãm jakamã koja tanhmã ixto pa hkõt amnhĩ nhĩpêx mex o ri ixpa. Nà koja ixto anẽ.

Anhỹr jakamã ra amnhĩ kaxyw kãm pajamxpẽr tỳx o mẽmoj punuj kutã amnhĩ to htỳx nẽ.

Mẽ pahte Tĩrtũm mã tanhmã amnhĩ nhĩpêx to hã mẽ pajarẽnh
Juãw 8.34

¹⁵ Tã ã kot anhỹr jakamã tanhmã kot puj wem pajamxpẽr to? Xà kot pu mẽ ã pajamxpẽr anẽ nẽ pajamxpẽr o:

—Nà na hte Tĩrtũmja ixte kapẽr kõt amnhĩ nhĩpêx o ixpa hã ixpumunh kõt amnhĩm inhmex ã ijarẽnh kêt nẽ. ãm kêp ixkutã nojarêt rãhã nẽ amarĩ amnhĩm inhmex ã ijarẽnh xwỹnh jakamã kot paj arĩ amnhĩ tomnuj rãhã nẽ aa ja kaga hkêt nẽ.

Anhỹr o kot puj mẽ pajamxpẽr? Nà kot puj mẽ ã pajamxpẽr anhỹr kêt nẽ. Á mẽ pajamxpẽr anhỹrja mex kêt.

¹⁶ Koja mẽhõ nhỹri kot amnhĩ tomnuj tỳx xwỹnhjê hõ pumu nẽ kãm amnhĩ jarẽnh japêr nẽ kãm:

—E inhma. Kot paj ãm akôt pix mã tanhmã amnhĩ nhĩpêx to ho ri ixpa. Jakamã e inhmã mẽmoj tâ karõ pa ama nẽ amã tanhmã ho ho ri ixpa.

Anhỹr o kãm kapêr japêr. Hãmri nẽ ã amnhĩ nhĩpêx anhỹr tâ amnhĩ tomnuj pix o ri pa. Tã ã mẽ kot amnhĩ nhĩpêx anhỹr o mẽ pa xwýnhjaja koja nhỹrmã ty hãmri mẽ kot amnhĩ xà htýx kamã hamak tũm xàta wýr ma hapêx.

No koja mēhõ Tĩrtũm mã amnhĩ jarēnh nẽ kãm:

—Pa Tĩrtũm. E kot paj ãm akapêr kôt pix mã ri amnhĩ nhĩpêx o ri ixpa.

Anhỹr o kãm amnhĩ jarē nẽ hkôt amnhĩ nhĩpêx mex o pa. Nẽ tãm amnhĩ nhĩpêx o ri pa. Hãmri nẽ nhỹrmã ty nẽ ma õ krĩ hwýr api nẽ Jejus mẽ Tĩrtũm wa kuri htĩr tũm nẽ mex rãhã nẽ pa ho pa.

¹⁷ Tã mẽ kajaja na ka xep prem tee ri mẽ amã mẽ ate amnhĩ tomnuj mã anhũrer prãm tâ nhũm te tãm kot amnhĩ tâ mẽ ato htýx pyrãk o mẽ anhĩpêx ka mẽ tee ri kãm anhũrer prãm kaprý. Tã nhũm Tĩrtũm tanhmã mẽ akrã hto ka mẽ kapêr ma nẽ amnhĩ kaxyw hkôt ajamaxpêr týx nẽ ãm hkôt pix mã amnhĩ nhĩpêx. Pa ja hã mẽ ajarēnh ma nẽ mẽ anhỹ hã ixkĩnh nẽ. Nẽ Tĩrtũm mã ixte mẽ ajarēnh mar nẽ mẽ anhỹ hã ixkĩnh ã amnhĩ jarē.

¹⁸ Na pre Tĩrtũm tanhmã mẽ akrã hto ka mẽ amnhĩ tomnuj mã anhũrer pa nẽ hpãnhã hkôt pix mã amnhĩ nhĩpêx.

¹⁹ E kot paj ixprĩ hã tanhmã mẽ amã ja jarēnh to. Te ixte ixkrajê jahkre pyrãk o kot paj mẽ amã awjarē. Nà amnepêm na ka prem ajamaxpêr punuj kôt amnhĩ tomnuj o ri apa. Nẽ gaa nẽ ra amnhĩ tomnuj pix kukamã ajamaxpêr. Tã kêr ka

mê arĩ ã amnhĩ nhĩpêx anhÿr kêt nê. Pãnhã tãm ri ajamaxpêr o ri apa. Jao gaa nê ra Tĩrtũm kãm hprãm xà hkôt tãm amnhĩ nhĩpêx mex nê.

²⁰ Na ka prem tee ri amã amnhĩ tomnuj mã anhũrer prãm kaprÿ. Te tãm kot amnhĩ tã mẽ ato htÿx nê amnhĩ kôt mẽ ato pa pyræk o mẽ anhĩpêx.

²¹ Xàn ka prem ã amnhĩ tomnuj anhÿr o apa nê akĩnh nê ajamakêtkati nê ri apa? Nà na ka prem akĩnh nê apa hkêt nê. Tã na ka prem Jejus kôt amnhĩ xunhwÿ nê tee ri ate tanhmã amnhĩ tomnuj to hã amnhĩ pumu nê akaprĩ nê apijaàm nê. ã mẽ kot amnhĩ tomnuj anhÿr o pa xwÿnhjaja na htem ja mÿrapê ty nê ma mẽ kot amnhĩ xà htÿx kamã hamak tũm xàta wÿr pa.

²² No na pre ra Tĩrtũm tanhmã mẽ akrã hto ka mẽ amnhĩ tomnuj kaga hpa. Te Tĩrtũm tãm kot hpãnhã amnhĩ tã mẽ ato htÿx nê amnhĩ kôt mẽ ato pa pyræk ka mẽ ra ãm hkôt pix mã amnhĩ nhĩpêx mex o ri apa. Nê hpãnhã amã kapêr kôt pix mã amnhĩ nhĩpêx mex prãm. Nê hkôt pix mã amnhĩ nhĩpêx hprãm. Jakamã kot kaj mẽ nhÿrmã kuri amex kumrêx nê atĩr tũm nê ri apa ho apa.

²³ Na hte mẽ kãm àpênh o ri mẽ pa xwÿnhjaja mẽ kãm mẽmoj tã apê nê àpênh pa nê hpãnhã amnhĩrer xà jamÿ. Ja pyrà nê koja mẽ kot amnhĩ tomnuj xwÿnhjaja nhÿrmã ty hãmri nê ma mẽ kot amnhĩ xà htÿx kamã hamak tũm xàta wÿr ma pa.

No mẽ pahte amnhĩ kaxyw Jejus Kris kôt pajamaxpêr xwÿnhjaja na hte Tĩrtũm ja hã mẽ pah-pumu nê mẽ pajarênh o:

—Nà ãm hãmri. Jajaja koja nhÿrmã Ixkra mẽ wa Ixkuri mex kumrêx nê htĩr tũm nê pa ho pa. Hêxta

waa nê. Nà ãm hãmri koja mẽ anê. Anê.

Xà tãm mẽ pahte amnhĩ nhĩpêx ã mẽ pahpumunh kôt na hte ã mẽ pajarênh anê? Nà ãm mẽ pahte Kra Jejus Kris kôt amnhĩ xunhwÿr ã mẽ pahpumunh kôt pix mã na hte ã mẽ pajarênh anê.

7

Mẽ pahte amnhĩ tomnuj kot axte amnhĩ tã mẽ pahto htÿx kêt ã harênh

Rômãn 8.2, 10.4; Karatas 4.1; Epes 2.2; Korosê 3.7

¹ E Jejus kôt ixkwÿjaja. Nà Tĩrtũm kot mẽ pakaxyw tanhmã Mojes mã kapêr tota na ka mẽ ra mar tÿx nê. Na pu htem kormã pahtĩr ri hkôt amnhĩ nhĩpêx o ri papa. Tã ty hãmri nê axte hkôt amnhĩ nhĩpêx kêt nê. Ra mẽ ate ja mar tÿx. E pa mẽ amã ja hã ejêp jarê ka mẽ inhma.

² Nà finat Mojes kot Tĩrtũm nhÿ hã mênijaja kot tanhmã amnhĩ nhĩpêx to ho pa hã mẽ kãm karõja. Koja mēhõ ho mjên hãmri nê ãm kôt pix mã ri pa ho pa nê aa hkaga hkêt nê. No koja nhÿrmã mjên kêp ty nhũm ahte ri pa. Hãmri nê kãm axte mēhõ ho mjên prãm nê mãmri axte mēhõ ho mjên. Ja tanhmã kute hkêt.

³ Nom koja wam mjên arĩ htĩr japêr nhũm hprõ tanhmã hamaxpêr to nê hkaga nê hpãnhã nhãm mēhõ ho mjên. Hã koja Tĩrtũm pê ja homnuj nê. Nom koja mjên ra kêp ty nhũm mÿrpê axte kãm mēhõ ho mjên prãm nê mãmri ho mjên. Ja na Tĩrtũm pê homnuj kêt. Ra wam mjênja htyk kênã. ã Tĩrtũm kot Mojes mã mẽ pakaxyw mẽmoj tã karõ kot anhÿr.

4 Tã ja pyrã nẽ na pu prem amnepêm pajamaxpêr o:

—Ixte Tĩrtũm kapêr kôt pix mã amnhĩ nhĩpêx o ri ixpa jakamã nhũm Tĩrtũm ja hã ixpumu nẽ amnhĩm inhmex ã ijarẽ. Anẽ.

Tã pu mẽ ra tanhmã pajamaxpêr to nẽ hpãnhã pajamaxpêr õ ho pajamaxpêr o:

—Nà na xep hte Tĩrtũm mẽ ixte kapêr kôt amnhĩ nhĩpêx ã mẽ ixpumunh kôt amnhĩm mẽ inhmex xwýnh ã mẽ ijarênh kêt nẽ. Mẽ ixte hkôt amnhĩ nhĩpêx mex o ri ixpare hã. Kêt ãm Kris kot mẽ inhnê htyk nhũm mẽ ixte amnhĩ kaxyw hkôt ijaxmaxpêr nẽ hkôt amnhĩ xunhwýr pix ã mẽ ixpumunh kôt na hte mẽ inhmex ã mẽ ijarẽ. ãm ja pix ã mẽ ixpumunh kôt na hte mẽ ixto hkra nẽ mẽ ixkutã nojarêr o pa. Kra Jesus pix kukwak ri na hte ã mẽ inhĩpêx anhýr o pa. Anẽ.

ã mẽ pajamaxpêr nyw kot anhýr. Jakamã te mẽ pahte mẽhõ kot mjên nyw xwýnh gryk ã axte mjên htyk xwýnh mã hamaxpêr kêeta pyrãk o na pu htem amnhĩ nhĩpêx o papa. Jao Kris kapêr kôt pix mã amnhĩ nhĩpêx o ri papa. Nẽ Tĩrtũm noo mã tãm ri amnhĩ nhĩpêx. Nẽ axte mẽ pahte amnhĩ tomnuj kukamã tanhmã pajamaxpêr to hkêt nẽ.

5 Nẽ amnepê mã mẽ pahte amnhĩ krã hkôt tanhmã mẽ pahte amnhĩ nhĩpêx to ho ri papata ã na pu prem amnhĩ tomnuj pix o ri papa. Ra mẽ pahte Tĩrtũm kapêr mar týx tã kuma nẽ ãm kuma nẽ ri papa nẽ ri hkôt amnhĩ nhĩpêx kêt nẽ. Mýrapê nhũm Tĩrtũm tee ri ja hã mẽ pahpumu nẽ mẽ pahtyk nẽ ma mẽ kot amnhĩ xà htýx kamã hamak tũm xà hwýr papa mã xwýnhjê hã mẽ pajarẽ.

⁶ Nē amnepễm na pu pre htem ã pajamaxpễr anhÿr o:

—Nà kot paj Tĩrtũm kapễr kôt pix mã amnhĩ nhĩpễx o ri ixpa nhũm amnhĩ tã ixpumu nē ixte amnhĩ tomnuj kêt xwÿnh ã ijarễ.

Anhÿr o pajamaxpễr no ãm tee ri ã pajamaxpễr anhÿr kaprÿ. Nē arĩ tanhmã amnhĩ tomnuj to ho ri papa. Tã hpãnhã te Jejus Kris kôt pahtyk pyrãk o amnhĩ nhĩpễx nē hpãnhã Karõ nhÿ hã tãm amnhĩ nhĩpễx. Jao ra tee ri mẽ pamã Tĩrtũm kapễr kôt amnhĩ nhĩpễx prãm kaprÿ hkêt nē. Ra Tĩrtũm Karõ nhÿ hã amnhĩ nhĩpễx nyw o amnhĩ nhĩpễx mex o ri papa.

Tĩrtũm kapễr ã kagà htũm kot tanhmã mẽ pajarễnh to

Rômãn 3.20, 5.20; Karatas 3.23-24

⁷ Tã Tĩrtũm mẽ pahte kapễr kôt ri amnhĩ nhĩpễx ã mẽ pahpumunh kôt amnhĩm mẽ pamex ã mẽ pajarễnh kêt jakamã mẽmo kaxyw na kapễr ã kagà htũmja? Nà mẽ pahte mar nē pahprĩ hã Tĩrtũm noo mã mẽ kot amnhĩ tomnuj xà jarễnh mar nē omunh mex kaxyw na. Na hte mẽ pahkwÿjễ kukrễx kĩnh o pamã ho panhõ hprãm nē mẽ pamã karõ. ã kot mẽmoj punuj piitã nē mẽ pamã karõ kot anhÿr. Tã mẽ pahte ja mar kêt ronhÿx pu mẽ Tĩrtũm kêp ja homnuj ã harễnh mar kêt nē.

⁸ Tã ra mẽ pahte harễnh mar nē kêp ja homnuj ã harễnh ma. Mẽ pamã axpễn kukrễx kĩnh o ho pamã panhõ hprãmja mããnên kêp ja homnuj ã harễnh mar tã nom aa hkaga hkêt nē arĩ pamã axpễn kukrễx kĩnh o pamã ho panhõ hprãm tÿx rãhã ho ri papa. Kop ãm Tĩrtũm kapễr kêt ronhÿx

pu mẽ kot amnhĩ tomnuj xàja aa mar kêt kumrêx nhũm te mẽ pamã amrakati pyræk.

⁹ Amnepê mã ixte Tĩrtũm kapêr mar kêt ri na pa pre ixtýx ri amnhĩ kukamã ijamaxpêr o ri ixpa nê ijamaxpêr o:

—E kot paj nhỹrmã Tĩrtũm ri ixtĩr tũm nê inhmex nê ixpa ho ixpa.

Anhỹr tã hpãnhã pamã axpên kukrêx kĩnh o ho pamã panhõ hprãm nê kapêrta ma nê ja hã amnhĩ pumunh kurê kumrêx. Hãmri nê tee ri amnhĩ kukamã ijamaxpêr nê ijamaxpêr o:

—Hêxta waa nê. Nà ã ixte amnhĩ nhĩpêx anhỹr o ixpa jakamã kot paj nhỹrmã ty nhũm Tĩrtũm akupým ixto ixtĩr pa kuri ixtĩr tũm nê ixpa ho ixpa hkêt nê. Hêxta waa nê. Ixte amnhĩ tomnuj xwýnh na pa. Kot paj nhỹrmã ty nhũm Tĩrtũm ma mẽ kot amnhĩ xà htýx kamã hamak tũm xàta wýr amnhĩ nê inhmẽ. Anê.

Hãmri nê ixkaprĩ nê tee ri amnhĩ kukamã ijamaxpêr o ri ixpa.

¹⁰ Tã hpãnhã axtem ijamaxpêr o:

—Nà kot paj Tĩrtũm kapêr kôt pix mã mãn ri amnhĩ nhĩpêx o ri ixpa hãmri nê nhỹrmã ixtyk tã hwýr api nê kuri ixtĩr tũm nê inhmex nê ixpa ho ixpa. Nà kot paj anê.

Anhỹr ã ijamaxpêr tã no ãm tee ri inhmã hkôt amnhĩ nhĩpêx o ixpa hprãm kaprý. Na pa pre xatã kapêr nhĩrôp ixkuhê nê tee ri ja hã amnhĩ pumu nê ijamaxpêr o:

—Kwa tanhmã kot pa amnhĩ nhĩpêx to nê ãm Tĩrtũm kôt pix mã ri amnhĩ nhĩpêx? Nã pa hte tee ri inhmã ã amnhĩ nhĩpêx anhỹr prãm týx kaprý. ãm ixte amnhĩ tomnuj pix o ri ixpa xwýnh jakamã ãm

hāmri koja amnhĩ nê kuwyta wÿr inhmê. Nà koja ixta anê. Hêxta waa nê. Tanhmã kot paj we ja nê kãm ixkapêr to? Anê.

¹¹ No mēhō koja Tĩrtũm kapêr kôt amnhĩ nhĩpêx mex o ri pa? Na pu htem pahpiitã tee ri pamã ho anhÿr prãm kaprÿ. Mē pahpê hihtÿx kumrêx jakamã na pa pre ixtÿx ixte Tĩrtũm kuri ixtĩr tũm nê ri ixpa hã amnhĩ kukamã amnhĩ jarênh kaprÿ. ãm xatã kapêr nhĩrôp ixkuhê nê amnhĩ tomnuj pix o ri ixpaja mÿrapê koja mē kot amnhĩ xà htÿx kamã hamak tũm xãta wÿr amnhĩ nê inhmê.

¹² Kot anhÿr tã tanhmã kot puj mē Tĩrtũm kapêr ã kagà htũmta jarênh to? Nà kot mē pamã mē pahte amnhĩ nhĩpêx ã karõta mex kumrêx. Mex o mex.

¹³ Mex kumrêx tã na htem kuma nê tee ri kãm hkôt amnhĩ nhĩpêx hprãm kaprÿ. Jao nhÿrmã ty nê ma kuwy hwÿr pa. Kêt pa na pa pre ra mar nê omunh mex tã hkôt amnhĩ nhĩpêx mex kêt nê. Jao ra ixte amnhĩ tomnuj xwÿnh ã amnhĩ pumu. Na pa pre tee ri inhmã hkôt amnhĩ nhĩpêx o ri ixpa hprãm tã no ãm xatã kapêr nhĩrôp ixkuhê nê hkwyòm ri amnhĩ nhĩpêx rãhã ho ri ixpa. Tã ra tee ri ja hã amnhĩ pumu nê amnhĩ kukamã ijamaxpêr o:

—Nà na pa hte ãm tee ri inhmã Tĩrtũm kôt amnhĩ nhĩpêx prãm kaprÿ no ãm ho anhÿr kêt nê. ãm ixte amnhĩ tomnuj pix o ixpa xwÿnh na pa. Ja mÿrapê koja Tĩrtũm amnhĩ nê ma kuwy hwÿr inhmê. Nà koja ixta anê. Anê.

*Mē pahte mē pamã amnhĩ tomnuj kaga hprãm kaprÿ hã mē pajarênh
Karatas 5.17*

14 Nê Tĩrtũm kapêr ã kagà htũmta Tĩrtũm kapêr na. Nê Tĩrtũm kĩnhã ãm inhĩ pix na pa ri ixpa jakamã tanhmã kot pa amnhĩ to nê kapêr kôt ri amnhĩ nhĩpêx mex o ri ixpa?

15 Inhmã tãm ixte amnhĩ nhĩpêx prãm tã no ãm amnhĩ tomnuj pix o ri ixpa. Měmoj ixpê omnuj tã pa hte ra hkôt tanhmã amnhĩ tomnuj to ho ri ixpa. Hãmri nê ja hã amnhĩ pumu nê tee ri amnhĩ kukamã ijamaxpêr o:

—Hêxta waa nê. Mon pa hte axtem nê ã amnhĩ nhĩpêx anhỹr o ri ixpa? Měmoj ixpê omnuj nhũm inhmã ho anhỹr prãm kêt tã ra ho anê. Nhũm měmoj mex nhũm inhmã ho anhỹr prãm tã ho anhỹr kêt nê. Mon pa hte axtem nê ã amnhĩ nhĩpêx anhỹr o ri ixpa? Anê.

16 ã ixte amnhĩ nhĩpêx anhỹr o ri ixpa htã ra Tĩrtũm kapêr mexta ma hãmri nê ra ijamaxpêr o:

—Nà Tĩrtũm kapêrja mex kumrêx tã pa tee ri inhmã hkôt amnhĩ nhĩpêx mex hprãm kaprỳ ho ri ixpa. Hêxta waa nê. Anê.

17 Inhmã amnhĩ tomnuj prãm kêt tã arĩ ixkaxwỳnh kãm ijamaxpêr punuj nhỹ hã ã amnhĩ nhĩpêx anhỹr o ri ixpa.

18 Nê inhmã tãm amnhĩ nhĩpêx prãm tã no ãm tee ri ã inhmã amnhĩ nhĩpêx anhỹr prãm kaprỳ. Tanhmã kot pa amnhĩ to nê tãm amnhĩ nhĩpêx o ri ixpa? Na pa tee ri inhmã ja ho anhỹr prãm kaprỳ. Ixte amnhĩ tomnuj xwỳnh na pa. Nê aa ixte amnhĩ to mex kêt kumrêx xwỳnh.

19 Inhmã měmoj mex kôt pix mã amnhĩ nhĩpêx prãm tã no ãm ã amnhĩ nhĩpêx anhỹr kêt nê. Nê ãm hkwỳm ri tanhmã amnhĩ tomnuj to ho ri ixpa.

Měmoj ixpê omnuj tã pa hkôt amnhĩ nhĩpêx o ri ixpa.

²⁰ Ixte Tĩrtũm kapêr kôt amnhĩ nhĩpêx kêt jakamã na pa hte ã amnhĩ tomnuj anhỹr o ri ixpa. Měmoj ixpê omnuj pa inhmã ho anhỹr prãm kêt tã ra hkôt amnhĩ nhĩpêx. Ixte Tĩrtũm kapêr kôt amnhĩ nhĩpêx kêt jakamã ã amnhĩ nhĩpêx anhỹr o ri ixpa.

²¹ Nê mẽmoj mex nhũm inhmã hkôt amnhĩ nhĩpêx prãm tã ra hkwỳm ri amnhĩ nhĩpêx. ã ixte amnhĩ nhĩpêx anhỹr xwỳnh na pa.

²² Nê inhmã Tĩrtũm kapêr mar nê hkôt ri amnhĩ nhĩpêx prãm tã

²³ nom ixte amnhĩ tomnuj xwỳnh jakamã hkôt amnhĩ nhĩpêx kêt nê. Na pa tee ri ja hã amnhĩ pumu nê amnhĩ kukamã ijamaxpêr o:

—Nà kot paj axte amnhĩ tomnuj kêt nê. Kot paj ãm amnhĩ to mex pix kukamã ijamaxpêr o ri ixpa.

Anhỹr tã no ãm arĩ amnhĩ tomnuj o ri ixpa nê amnhĩ to mex kêt. Ixte amnhĩ tomnuj xwỳnh jakamã na pa hte ã amnhĩ nhĩpêx anhỹr rãhã ho ri ixpa nê tee ri inhmã amnhĩ tomnuj kaga hprãm kaprỳ.

²⁴ Hêxta waa nê. Na pa ixkaprĩ htỳx nê ri ixpa. ã ixte amnhĩ nhĩpêx anhỹr o ri ixpaja mỳrapê kot paj nhỹrmã ty nê ma mẽ kot amnhĩ xà htỳx kamã hamak tũm xàta wỳr ma mỗ. Mễhỗ kot tanhmã ixkrã hto pa ã amnhĩ nhĩpêx anhỹrja kaga?

²⁵ Nà mẽ panhỗ Pahihti Jejus Krisja pix. Tãm koja ixte amnhĩ tomnuj kutã tanhmã ixto ixihtỳx to. Jakamã na pa axte tee ri amnhĩ kukamã ijamaxpêr kêt nê. Pãnhã ixkĩnh nê ri ixpa nê Tĩrtũm mã kãm:

—Pa Tirtüm. Nà ãm hãmri amex o amex. Anë.
 Tã ra ixte Jejus Kris kôt amnhĩ xãm jakamã koja
 tãm tanhmã ixto ixihtỳx to pa rĩ kormã Tirtüm
 kapër kôt amnhĩ nhĩpêx mex o ri ixpa. No kot
 pa pam amnhĩ krã hkôt amnhĩ tomnuj rãhã ho ri
 ixpa. Æ ixte anhỳr xwỳnh na pa.

8

*Tirtüm Karõ kot mẽ pahto tãm mẽ pahte amnhĩ
 nhĩpêx xwỳnh ã harẽnh*

Karatas 5.16-26

¹ Nẽ Jejus Kris kêp mẽmoj punuj kutã mẽ pahto
 mẽ paxihtỳx xwỳnh jakamã mẽ pahte hkôt amnhĩ
 xunhwỳr xwỳnhjaja na pu htem ý hã amnhĩ tom-
 nuj o ri papa hkêt nẽ. Jao mẽ pahte kuwy hwỳr
 papa mã xwỳnh kêt.

² Te ra mẽ pahtyk nhũm Tirtüm kot akupỹm mẽ
 pahto mẽ pahtĩr pyrãk jakamã nhũm Karõja mẽ
 pahkarõ mã agjê pu mẽ ý hã tãm amnhĩ nhĩpêx o
 ri papa. Te tãm kot amnhĩ nhĩpêx pyrãk o amnhĩ
 nhĩpêx nhũm Karõ mẽmoj punuj piitã kutã mẽ
 pahto mẽ paxihtỳx. Kêp mẽ pajamaxpêr punuj
 kutã mẽ pahto mẽ paxihtỳx xwỳnh jakamã kot puj
 mẽ nhỹrmã mẽ kot amnhĩ xà htỳx kamã hamak
 tũm xàta wỳr papa hkêt nẽ.

³ Nom kormã mẽ pahte Jejus kôt amnhĩ xun-
 hwỳr kêt ri na pu prem tee ri pamã Tirtüm
 kapër piitã hkôt amnhĩ nhĩpêx prãm kaprỳ nhũm
 mẽ pahpê hihtỳx kumrêx. Jakamã tanhmã koja
 Tirtüm amnhĩ to nẽ amnhĩ mã mẽ pamex xwỳnh
 ã mẽ pajarẽ? Na pre tee ri amnhĩ tã mẽ pajamã
 hãmri nẽ mẽ pahwỳr Kraja mẽ nhũm man mẽ
 pahwỳr wrỳ nẽ mẽ pahpyrà nẽ ì ho mẽ pakamã

kato. Nom mẽ parom aa tanhmã amnhĩ tomnuj to hkêt kumrêx nê ri pa. Tã mẽ kot hpĩr tã nhũm amarĩ htyk kêt nê. Na pre htyk o mẽ pahte amnhĩ tomnuj piitã hpãnhã amnhĩrer pa. Jakamã tãm kêp mẽ pajamaxpêr punuj kutã mẽ pahto paxihtỳx xwỳnh. Na pu htem hkôt amnhĩ xunhwỳ hãmri nê kukwak ri amnhĩ tomnuj o ri papa hkêt nê.

4 Pãnhã Tĩrtũm kot amnhĩ nhĩpêx kôt amnhĩ nhĩpêx o ri papa nê axte mẽ pahte amnhĩ nhĩpêx tũm kôt amnhĩ nhĩpêx kêt nê. Hãmri hpãnhã Tĩrtũm Karõ kot amnhĩ nhĩpêx kôt pix mã amnhĩ nhĩpêx. Nê hamaxpêr kôt pix mã pajamaxpêr. Ja kaxyw na pre Tĩrtũm mẽ pahwỳr Kraja mẽ nhũm wrỳ nê mẽ pahpiitã mẽ panê ty.

5 Nê mẽ kot amnhĩ krã hkôt tanhmã amnhĩ nhĩpêx to ho ri mẽ pa xwỳnhjaja na htem htỳx ri tanhmã hamaxpêr to xà hkôt amnhĩ nhĩpêx o ri pa. No kêt Tĩrtũm Karõ kot mẽ pahkarõ mã gjêx xwỳnhjaja na pu htem mẽ kurom te Jejus jamaxpêr pyràk o pajamaxpêr o papa.

6 Nê mẽ kot amnhĩ krã hkôt amnhĩ nhĩpêx xwỳnhjaja koja mẽ nhỹrmã ty nê ma kuwy hwỳr pa nê kamã pa ho pa. No mẽ pahte Tĩrtũm Karõ hkôt amnhĩ nhĩpêx xwỳnhjaja kot puj mẽ pajamaxpêr nyw o pajamaxpêr nê amnhĩ nhĩpêx nyw o amnhĩ nhĩpêx. Jao paxamnhĩx ri pajamakêtkati nê ri papa. Nê nhỹrmã ty hãmri nê Tĩrtũm mẽ Jejus wa kuri akupỳm pahtĩr tũm nê pamex kumrêx nê papa ho papa.

7 Nê mẽ kot amnhĩ krã hkôt ri amnhĩ nhĩpêx xwỳnhjaja kãm Tĩrtũm kĩnh kêt. Nê kãm kapêr mar prãm kêt jakamã tanhmã kot mẽ amnhĩ to nê hkôt amnhĩ nhĩpêx?

⁸ Koja mēhō amnhī krā hkôt kām hprām xà hkôt pix mā amnhī nhīpêx hāmri nhūm Tirtūm tee ri ja hā omu nē hkīnh kêt nē.

⁹ No mē papajaja na pu htem mē urak nē ā amnhī nhīpêx anhÿr kêt nē. Ra Tirtūm Karō kot mē pahkarō mā gjêx jakamā na pu htem hkôt pix mā amnhī nhīpêx hprām. No koja Tirtūm Karō mēhō kaxwÿnh mā àr kêt nē nhūm kēp hkra hkêt nē.

¹⁰⁻¹¹ Tā mē papajaja. Mē pahte amnhī tomnuj mÿrapê koja mē pakrāhkāja nhÿrmā ty. No nhūm Tirtūm ra kot amnhīm mē pahte amnhī to mex xwÿnh ā mē pajarēnh nhūm Kris Karō kot mē pahkarō mā gjêx jakamā koja mē pahkarōja htyk kêt nē. Mē pakrāhkà pix koja ty nhūm mē pahkarōja ma kaxkwa hwÿr àpir kurê kumrêx. Tā nhūm nhÿrmā Tirtūm akupÿm mē pakrāhkà ho htīr nē akupÿm mē pahkarōja mē pakrāhkām hagiê pu mē wa kuri pahtr tūm nē papa ho papa.

¹² Jakamā e kwa ixkwÿjaja. Kêr pu mē axte ri mē pajamxpêr tūm kôt amnhī nhīpêx o ri papa hkêt nē.

¹³ Kot puj mē arī ā amnhī nhīpêx anhÿr o ri papa hāmri nē nhÿrmā ty nē ma mē kot amnhī xà htÿx kamā hamak tūm xàta wÿr papa. Jakamā kêr pu mē mēmo arīgro hā pamā tanhmā amnhī tomnuj to hprām hāmri nē amnhī kukamā pajamxpêr o:

—Nà inhmā ā amnhī nhīpêx anhÿr prām tā kot paj Tirtūm Karō nhÿ hā ja kutā amnhī to htÿx nē ho anhÿr kêt nē. Anē.

Kot puj mē ā pajamxpêr anē hāmri nē nhÿrmā kuwy wÿr papa hkêt nē. Pānhā Tirtūm mē Jejus wa kuri pamex nē pahtr tūm nē ri papa ho papa.

14 Mě kot Tirtũm Karõ hkõt amnhĩ nhĩpêx xwýnhjaja kêt Tirtũm kraa.

15 Nom amnepêm kormã mẽ pahte hkõt amnhĩ xunhwýr kêt ri. Nê kormã mẽ pamã kapêr mar prãm kêt ri nhũm kot amnhĩ tã mẽ pahpumunh nê tanhmã mẽ pahto pumaj na pu prem pamã uma ho ri papa. Tã hkõt amnhĩ xunhwý nhũm Karõja mẽ pahkarõ mã gjêx jakamã na pu htem ra pamã uma hkêt nê ri papa. Karõ kot mẽ pahpê Tirtũm kra hã mẽ pajarênh jakamã pu mẽ amnhĩ kamã kot tanhmã mẽ panhĩpêx to puma hkêt nê ri papa. Nê paxàmnhĩx pajamakêtkati nê kãm amnhĩ jarê nê kãm amnhĩ jarênh o:

—Pa Inhĩpêxà maati? Ot pa ixpê akra hã amã amnhĩ jarênh kaxyw amnhĩ kaxyw amã ija-maxpêr. Anê.

Jao ra mẽ pamã uma hkêt nê ri papa.

16 Karõ kot mẽ pahkarõ mã gjêx nhũm mẽ pahte amnhĩ tã omunh jakamã na pu htem pajamaxpêr o:

—Nà Tirtũm Karõ kot ixkarõ mã àr jakamã ixpê hkra na pa. Anê.

Nhỹrmã mẽmoj piitã akupým mex par ã harênh

Sikũn Korõt 4.16-18; Korosê 3.4; Wam Pêtre 4.13

17 Nê mẽ kãm Tirtũm prãm kêt xwýnhjaja na htem te mẽ kot Tirtũm Kra Jejus nhĩpêx pyræk o mẽ panhĩpêx pu mẽ pahpunuj nê ri papa. Nom kot puj mẽ nhỹrmã Tirtũm mex o mex xwýnhja kuri pamex kumrêx nê papa. Mẽ pahpê hkra jakamã kot puj mẽ Kra Jejus pyrà nê õ krĩ kamã kuri pamex kumrêx nê ri papa ho papa.

18 Jar Jejus ã mẽ pahpunuj nê ri papa htã kot puj mẽ nhỹrmã kuri pamex kumrêx nê papa ho papa.

Hāmri nē mẽ pamex o pamex ã amnhĩ pumu nē jar pika ja kamã tanhmã mẽ pahpunuj toja mã axte pajamaxpēr kêt kumrēx.

19 Nē pika hkôt Tĩrtũm kot mẽmoj ho kator xwýnhjaja na htem Tĩrtũm kot mẽ pahto mex par jatur xàm mēnh ã arĩgro jamār rãhã ho pa. àk nē mry nē pĩ nē gô nē mẽmoj piitã mẽ pajamār o pa. Te kot mẽ pakukamã hamaxpēr o:

—Kwa mẽmo arĩgro hã koja Tĩrtũm hkrajê piitã ho amnhĩrit nē mẽ ho mex par jatur xàm kumẽ pu mẽ ja hã mẽ omu? Hêxta waa nē. Inhmã tokyx ja hã mẽ omunh prãm tỳx. Koja tokyx ã mẽ hipêx anē pa ixkĩnh tỳx kumrēx.

Anhỹr o hamaxpēr pyræk.

20 Mẽmo kaxyw na hte mryja ã mẽ pakukamã hamaxpēr anē? Nà amnepê mã Tĩrtũm kot mẽmoj piitã ho katorta ã nhũm pre piitã mex o mex. Pĩ nē mry nē gô. Mẽmoj piitã mex kumrēx rãhã nē. Aa grà nē htyk kêt kumrēx. Tã Atãw kot amnhĩ tomnuj mýrapê nhũm ra ý hã mẽmoj piitã homnu par jakamã na hte mẽmoj htĩr nē pa nē gaa nē ty nē hapêx. Nē mẽ pahpur kãm ahkagrôt punuj hapôj. Atãw kot amnhĩ tomnuj mýrapê nhũm Tĩrtũm kapēr xà hkôt ã mẽmoj omnu hpar anē.

21 Nom koja arĩ rãhã ho rãhã hkêt nē. Koja nhỹrmã Tĩrtũm akupỹm mẽmoj piitã ho mex pa nhũm mex o mex nē axte grà rý axte htyk nē hapêx kêt nē. Nē axte omnu nē hikwỹ hkêt nē. Koja mẽ pahpyrà nē mex o mex. Jakamã na htem Tĩrtũm kot mẽ pahto mex par jatur xàm mēnh xà hã arĩgro jamār rãhã ho pa.

22 Te mẽhõ ni hpijagri kaxyw õhy xà htỳx nē

tokyx kām hpijagri hprām xàj àmra ho nōr pyrāk o amnhĩ nhĩpêx pē mē pahto mex jatur xàm mēnh ã arĩgrota jamār o pa.

²³ Nē mē papajaja na pu htem tanhmā pahpunuj to nē jajê pyrà nē te amnhĩ kamnhêr o ri papa pyrāk. Rỳ tanhmā paxà kute nē ri papa. Rỳ pamā prām nē paxàà nē ri papa. Nē tanhmā mē pahpunuj to nē ri papa. Jao te pĩ nē gō nē mryja pyrà nē amnhĩ tā Tĩrtũm kot mē pahto mex par jatur xàm mēnh ã arĩgro jamār rāhã ho ri papa.

Na pre Tĩrtũm mē pahwỳr Karō rē nhũm mē pahkarō mā agjê nē mē pakukamā Tĩrtũm tanhmā kot mē pahto mex to hã mē pamā ho amnhĩrīt nē mē pamā ho amnhĩrīt o:

—Koja nhỹrmā Tĩrtũm mē ato mex par jatur xàm kumē nē mē piitã mē kām mē apê hkra hã mē ato amnhĩrīt. Hāmri nē mē amã mē anhĩ nyw gō ka mē axte axà nē ri apa nē atyk kêt nē. Hāmri nē Tĩrtũm ri amex kumrêx nē ri apa ho apa. Nà kot kaj mē nhỹrmā ã amnhĩ nhĩpêx anê. Anê.

Ã Tĩrtũm Karō kot mē pakukamā mē pajarēnh anhỹr jakamā na pu htem amnhĩ tā kot mē pahto mex jatur xàm mēnh pix jamār o ri papa.

²⁴ Nom na kormã ã mē pahto mex anhỹr kêt nē. Kormã mē pamā mē panhĩ nyw nhōr kêt nē. Nom ra kot mē pahto hkra jakamā pu mē ja hã amnhĩ pumu nē pajamexpêr o:

—Nà ra Tĩrtũm kot ixto hkra jakamā koja nhỹrmā määnēn inhmã inhĩ nyw gō. Nà koja inhmã kugō.

²⁵ Anhỹr o pajamexpêr tā kormã. Na pu htem kormã amnhĩ tā hamār rāhã ho ri papa nē aa hkaga hkêt nē papa.

Mě pahte Tĩrtũm Karõ nhỹ hã Tĩrtũm mã amnhĩ jarẽnh

²⁶ Nẽ na pu htem Tĩrtũm mã amnhĩ jarẽnh kaxyw nhũm hte Karõja mẽ pahto ajuta pu mẽ ý hã pakatàt kôt kãm tanhmã amnhĩ jarẽnh to. No kot puj mẽ amnhĩ krã hkôt kãm amnhĩ jarẽnh mex kêt nẽ. Na pu htem ja kaxyw tee ri amnhĩ kukamã pajamaxpěr o:

—Kwa tanhmã kot pa Tĩrtũm mã amnhĩ jarẽnh to? Tanhmã kot pa mẽmoj tã ixàhwỳr to rỳ amnhĩ to hwỳr to? Nà kot paj amnhĩ krã hkôt ja ho anhỳr mex kêt nẽ. Hêxta waa nẽ. Anẽ.

No nhũm Tĩrtũm Karõ ra kot mẽ pahkarõ mã gjêx jakamã na hte tanhmã mẽ pahkrã hto pu mẽ ý hã kãm amnhĩ jarẽnh mex nẽ pakatàt kôt mẽmoj tã kuwỳ. Te Karõja tanhmã mẽ pakute hã mẽ pahpumunh nẽ mẽ pakamã ukaprı xàj tãm mẽ pahto hwỳr pyràk.

²⁷ Jakamã pu mẽ ý hã tanhmã Tĩrtũm mã amnhĩ jarẽnh to nhũm mẽ pamar kurê kumrêx. Ra kot mẽ pajamaxpěr kôt mẽ pahpumunh par kênã. Nhũm ra Karõ kot mẽ pahkarõ mã gjêx jakamã na pu htem kãm hprãm xà hkôt kãm amnhĩ jarẽ nẽ tanhmã amnhĩ to paxàhwỳr to.

*Tĩrtũm kot mẽ pamã mẽmoj piitã ho mex ã harẽnh
Römãn 8.37; Piripos 1.12; Wam Pêtre 5.10*

²⁸ Nẽ mẽ pamã Tĩrtũm kĩnh xwỳnhjaja. Tĩrtũm kot mẽ pahto hkra xwỳnhjaja. Koja mẽmoj mẽ pakamã tanhmã amnhĩ to htã kër pu mẽ ãm ja hã amnhĩ pumu nẽ tee ri amnhĩ kukamã pajamaxpěr kêt nẽ. Koja te mẽ pahpê omnuj pyràk tã koja nhỹrmã

hpãnhã mẽ pamã mex nẽ. Kojã Tĩrtũm nhỹrmã tanhmã mẽ pamã mẽmojta o mex to.

²⁹ Amnepê mã mẽmoj piitã hkêt ri na pre Tĩrtũm mẽ pakukamã tanhmã mẽ pajarẽnh to nẽ mẽ pajarẽnh o:

—E kot paj nhỹrmã mẽ kot Ixkra Jejus kôt amnhĩ xunhwỳr xwỳnhjê ho ixkra jakamã nhũm mẽ Jejus pyrã nẽ kêp ixkraa. Nẽ uràk nẽ ixkapêr kôt amnhĩ nhĩpêx o pa. Jao pa ra ixkra xohtô nẽ. Nà ja na inhmã hprãm. Anẽ.

³⁰ Tã pu htem pajapôj nẽ ri papa. Hãmri nẽ kapêr ma nẽ amnhĩ kaxyw Kra Jejus kôt pajamaxpêr nẽ hkôt amnhĩ xunhwỳ. Hãmri nhũm Tĩrtũm ja hã mẽ pahpumu nẽ pahto hkra nẽ amnhĩm mẽ pamex xwỳnh ã mẽ pajarẽ nẽ mẽ pahto mex nẽ. Nẽ te ho Kra Jejus nhĩpêx pyrãk o mẽ panhĩpêx. Jao nhỹrmã wa kuri mẽ pahtĩr tũm nẽ papa ho papa mã xwỳnh ã mẽ pajarẽ.

*Mẽhõ kot Tĩrtũm pê aa mẽ papytãr kêt ã harẽnh
Rômãn 5.1*

³¹ Tã ã Tĩrtũm kãm mẽ pajapê nẽ mẽ pahto mex kot anhỹr. ã kot mẽ panhĩpêx mex anhỹr jakamã ra mẽ pahkôt pa ho pa rãhãã. Jakamã mẽhõ koja ãhkra pê mẽ pahpytã? Nẽ mẽhõ koja tanhmã ri kêp mẽ pahto? Nà koja kêp mẽ papytãr rỳ tanhmã kêp mẽ pahto hkêt nẽ.

³² Tĩrtũm kãm Kra Jejus japê htỳx tã na pre mẽ pahpê nẽ hkêt nẽ mẽ pahwỳr kumẽ. Te kot mẽ pamã òr pyrãk o hipêx nhũm mẽ pahwỳr wrỳ nẽ mẽ panê ty. Tã ra Tĩrtũm kot mẽ pamã òr jakamã

koja mǎânĕn kǎm mĕ pahte Kra hkôt amnhĩ xunhwÿr xwÿnhjê japê nĕ mĕ pahto mex rǎhǎ ho ri pa. Nà koja ǎ mĕ pahto mex anĕ.

³³ Jakamǎ mĕhō koja kǎm mĕ pahte amnhĩ tomnuj xwÿnh ǎ mĕ pajarĕ? Ra tǎm kot mĕ pahto hkra nĕ mĕ pahte amnhĩ to mex xwÿnh ǎ mĕ pajarĕnh kĕnǎ kot kĕt mĕhō kǎm tanhmǎ mĕ pahto kapĕr punuj to nhŭm mĕ kuma. Koja mĕ tee ri kǎm tanhmǎ mĕ pahto kapĕr to kaprÿ.

³⁴ Na pre ra Jejus Kris mĕ pahte amnhĩ tomnuj pǎnhǎ amnhĭrer kaxyw mĕ panĕ ty nhŭm Tĭrtŭm akupÿm ho htĭr. Hǎmri nhŭm ma akupÿm kaxkwa hwÿr api nĕ Pahi Maati krĭ xà kamǎ Tĭrtŭm nhĭhkô hǎ hkrĭ ho hkrĭ. Nĕ Tĭrtŭm mǎ mĕ pakutǎ nojarĕt rǎhǎ ho kuri hkrĭ ho hkrĭ. Jakamǎ mĕhō koja kĕp mĕ kot amnhĩ xà htÿx kamǎ hamak tŭm xàta wÿr mĕ pajano? Nà amrakati kumrĕx.

³⁵ Nĕ Krisja kaxkwa kamǎ Tĭrtŭm nhĭhkô hǎ hkrĭ ho hkrĭ htǎ mǎânĕn jar mĕ pahkôt pa ho pa. Kǎm mĕ pajapĕ htÿx jakamǎ kot puj mĕ tanhmǎ pahpunuj to htǎ nhŭm arĭ kǎm mĕ pajapĕ nĕ mĕ pahkôt pa ho pa.

Rÿ nhŭm mĕ kot hkôt amnhĩ xunhwÿr kĕt xwÿnhjaja tanhmǎ hǎ mĕ pahto htǎ nhŭm arĭ kǎm mĕ pajapĕ kamǎ mĕ pahkôt pa ho pa.

Rÿ mĕ pamǎ prǎm nĕ ri papa. Rÿ mĕ paxĕ hkĕt nĕ pamǎ kry nĕ ri papa htǎ nhŭm arĭ kǎm mĕ pajapĕ kamǎ mĕ pahkôt pa ho pa.

Rÿ ra mĕ kot hǎ mĕ panhĭmex kaxyw rÿ hǎ mĕ pahpar kumrĕx. Tǎ nhŭm arĭ kǎm mĕ pajapĕ kamǎ mĕ pahkôt pa ho pa rǎhǎ nĕ.

Kãm mẽ pajapê kamã mẽ pahkôt pa ho pa rãhã jakamã pu mẽ tee ri amnhĩ kukamã pajamaxpêr kêt nê. Âm hkôt paxàmnhĩx ri pajamakêtkati nê ri papa ho papa.

³⁶ Tĩrtũm kapêr ã kagà htũm te mẽ papajaja mẽ pahte kãm tanhmã amnhĩ jarênh to pyrã nê mẽ pajarênh kot:

Pa Tĩrtũm. Na htem atã mẽ ixtomnuj tỳx o pa.

Nê ra mẽ kot mẽ inhĩmex kaxyw.

Nê mẽ inhĩpêx o te mẽ kot ôwêhti ho mõi nê hpar kaxyw tanhmã hipêx to pyrãk.

Jakamã na pa mẽ ra ixtyk kaxyw.

Anhỹr o kot mẽ pajarênh.

³⁷ Tã kwãr mẽ ã mẽ panhĩpêx anê. Arĩ Kris kãm mẽ pajapê kamã mẽ pahkôt pa ho pa rãhã jakamã mẽ kot tanhmã mẽ pahto htã pu mẽ arĩ amnhĩ kaxyw kãm pajamaxpêr tỳx rãhã ho ri papa. Nhũm arĩ mẽ kutã mẽ pahto paxihtỳx pu mẽ arĩ mẽ kãm pakuhê.

³⁸ Mẽmoj koja tanhmã mẽ pahto nhũm Tĩrtũm tee ri ja hã mẽ pahpumu nê kãm mẽ pajapê hkêt nê? Nà amrakati kumrêx. Koja mễhõ rỳ mẽmoj mẽ pahpê àmnàr kêt nê. Na hte jar pika ja kamã Kris kãm mẽ pajapê kamã mẽ pahkôt pa ho pa. Nê kot puj mẽ nhỹrmã ty nhũm arĩ kãm mẽ pajapê kamã mẽ pahkôt pa ho pa rãhã nê. Jakamã koja mẽkarõ rỳ mẽkarõmnuti rỳ jar pika ja kamã mẽ kãm Tĩrtũm prãm kêt xwỳnhjaja mẽ pahpê àmnàr kêt nê. Rỳ mẽmoj tanhmã kute. Rỳ kormã hapu hã mẽmoj tanhmã kute. Koja mẽmoj piitã tee ri tanhmã kêp mẽ pahto htã nhũm Kris arĩ kãm mẽ pajapê kamã mẽ pahkôt pa ho pa rãhã nê nhũm mẽmoj tee ri mẽ pahpê àmnàr kaprỳ.

³⁹ Nê koja kÿj rÿm mẽmoj wrÿ nê tanhmã kêp mẽ pahto japêr. Rÿ pyka rÿm mẽmoj kato nê tanhmã kêp mẽ pahto japêr. Rÿ kuwy rÿ kôk xapêr tÿx tanhmã kêp mẽ pahto. Tã nhÿm mẽ panhõ Pahihti Jejus Kris arÿ kãm mẽ pajapê kamã mẽ pahkôt pa ho pa rãhã nê. Te Tÿrtÿm kãm mẽ pajapê pyrãk o kãm mẽ pajapê htÿx kãm mẽ pahkôt pa ho pa rãhã jakamã nhÿm mẽmoj tee ri mẽ pahpê àmnàr kaprÿ.

9

Ijaew jarênh

Atre 3.25; Rômãn 3.1-2

¹⁻² Nê na pa tee ri ixkwÿ Ijaew kot tanhmã amnhÿ nhÿpêx to ho pa hã mẽ omu nê ixkaprÿ nê. Ixpyrà nê mẽ kêp Ijaew tã ixkÿnhã amnhÿ kaxyw Kris kôt hamaxpêr kêt jakamã nhÿm Kris tee ri kãm mẽ hamakêtkati nê àmnhÿx ri mẽ pa hprãm kaprÿ. Pa tee ri mẽ hkukamã ijamaxpêr nê ixkaprÿ nê ri ixpa. Nê aa ixkaprÿ ixpê kator kêt kumrêx. Mẽ kot inhmã mẽ hkÿnh kêt ã amnhÿ tã ijarênh tã inhmã mẽ hkÿnh kênã. ãm hãmri na pa ã amnhÿ jarênh anê. Tÿrtÿm Karõ kot ja hã ixpumunh mex nê inhmã:

—Nà ãm hãmri na ka amã mẽ hkÿnh ã amnhÿ jarê. Anê.

³ Mẽ kêp ixkwÿ na mẽ. Mẽ ixpàr kraxja ãm pixi mex. Tã nhÿm mẽ ixkÿnhã amnhÿ kaxyw Kris kôt hamaxpêr kêt jakamã kop ãm Tÿrtÿm kot mẽ nê kuwy hwÿr pa inhmênh ronhÿx ja inhmã mex. Nhÿx pa kãm:

—Kwa Tÿrtÿm. Amnhÿ nê kuwy hwÿr ixkwÿjê rênh kêt nê. Inhmã mẽ hapê htÿx kumrêx. Mẽ hpãnhã pa mãn mẽ nê hwÿr inhmẽ nà.

Anhÿr o nhÿx pa kām ixkapēr. Nom kot paj amnhĩ to ã ixàhwÿr anhÿr kaprÿ. Tĩrtũm kot mẽ kamã ukapri hta no nhũm mẽ amnhĩ kaxyw Kris mã hamaxpēr kêt jakamã tanhmã koja amnhĩ to nẽ mẽ hpãnhã pa mẽ nê kuwy wÿr inhmẽ nhũm mẽ ixrom kuri htĩr tũm nẽ pa ho pa? Mẽ kot hkôt amnhĩ xunhwÿre hã.

⁴ Mẽ ixpê Ijaew nhĩgêjtjaja na pre Tĩrtũm annepê mã mẽ ho mex rax nẽ. Nẽ kām mẽ ho hkra hprãm nẽ. Nhũm prem tanhmã kot amnhĩ nhĩpêx mex to hã no ho omunh o pa. Nẽ hirã htÿx kām ri pa hã omu nhũm mẽ kām:

—E kot kaj mẽ ixkapēr ma nẽ ixkôt amnhĩ nhĩpêx o ri apa. Hã kot paj mẽ akôt ixpa ho ixpa nẽ mẽ ato mex nẽ ka mẽ axpên kanrêhã axãmnar rax nẽ. Hãmri pa mẽ amã pika mex gô ka mẽ kamã ajamakêtkati nẽ axãmnhĩx ri apa ho apa.

Anhÿr o mẽ kām kapēr. Hãmri nẽ mẽ kaxyw Mojes mã tanhmã kapēr to nẽ mẽ kaxyw kām mẽmoj piitã hã karô. Mẽ kot tanhmã amnhĩ tomnuj to hãmri nẽ tee ri ja hã amnhĩ pumunh nẽ tanhmã amnhĩ to Tĩrtũm wÿr to nhũm kot mẽ mar nẽ mẽ nê ja ho hapêx par kaxyw. Finat Mojes kot amnhĩ xô ri mẽ kām ujarênh nhũm mẽ kot mar nẽ hkôt amnhĩ nhĩpêx mex o ri pa kaxyw.

⁵ Mẽ ixkukamã mẽ ixpãmjaja. Apraãw nẽ Ijak nẽ Jako kanrêhã mẽ hkra nẽ mẽ htãmnhwÿjaja na pre mẽ. Mẽ hwÿr na pre Tĩrtũmja Kra Jejus Kris mẽ nhũm mẽ hwÿr wrÿ nẽ mẽ kamã ĩ ho ĩ ho kator jakamã haxwÿja kêp Ijaew na pre. Kêp Mẽpahpãm nẽ mex o mex nẽ hihtÿx o hihtÿx tã Ijaew wÿr wrÿ nẽ mẽ kamã kato. Hãmri nhũm Ijaew kêt xwÿnhjaja harênh ma nẽ tee ri hamaxpēr nẽ hamaxpēr o:

—Hêxta waa nê. Kêp ãm Jejus mẽ papa kamã mãn kator ronhỹx mẽ pamã mex kumrêx. Anê.

⁶ No nhũm kormã Ijaew hwỳr wrỳk kêt ri nhũm Tĩrtũm ra kot mẽ ho hkra kaxyw mẽ hã amnhĩ jarẽ nhũm mẽ hkwỳja kãm ja prãm kêt nê hkaga. Tã xà na pre Tĩrtũm kot mẽ ho hkra hã amnhĩ jarẽnh ã amnhĩ to hêx? Nà aa hêx kêt kênã kot kêt ri mẽmoj tã amnhĩ jarẽ nê hã amnhĩ to hêx. Jakamã na pre mẽ hkwỳjaja hkwỳjê rom hkaga hkêt nê nhũm amnhĩ tã mẽ omu nê mẽ ho hkra. Nom mẽ piitã mẽ ho hkra hkêt nê. Mẽ hkwỳjaja kot hkaga jakamã nhũm ãm mẽ hkwỳjê pix o hkra.

⁷ Nê finat Apraãwja na pre hkanrêhã hkra nê htàmnhwỳ xohtô nê. Tã xà na pre Tĩrtũm htàmnhwỳ piitã mẽ ho hkra hã amnhĩ jarẽ? Nà mẽ piitã ã mẽ harẽnh anhỹr kêt nê. ãm mẽ hkwỳjê pix na pre mẽ ho hkra hã mẽ harẽ. Apraãw kra Ijak kôt hkanrêhã htàmnhwỳ pixjaja nhũm kot mẽ ho hkra hã mẽ harẽ.

⁸⁻⁹ Nê Apraãw kormã hprõ kamã hkra hkêt ri na pre kãm ãpênh xwỳnh kamã hkra nhũm kato nê myre nê hixi pê Ismael. Nom kêp Apraãw prõ kumrêx kamã hkra hkêt. Prõ kuprỳ kamã hkra na pre. Tã nhũm Tĩrtũm kãm hkra kumrêx kukamã harẽ nê kãm:

—E kot paj ma tẽ hãmri nê mẽmo arĩgro hã akupỳn awỳr tẽ nhũm ra aprõ hpijagri nhũm war akra myre. Anê.

Tã nhũm hprõ Saraja htujarô. Nê gaa nê hpijagri nhũm hkraja myre. Hixi pê Ijak. Kêp Apraãw prõ kamã hkra jakamã Tĩrtũm nom kêp Apraãw kra kumrêx. Jakamã hkra Ijak kanrêhã htàmnhwỳjaja

na pre Tirtūm kot mẽ ho hkra hã mẽ harẽ. Ra kot Apraãw mã ja hã amnhĩ jarẽnh xà hkôt.

¹⁰Tã nhũm Ijakja hprêk nẽ Repek o hprõ. Nẽ gaa nẽ ra haxwýja wa hkra nhũm hkraja wa ahpo nẽ kato nẽ wa hamẽ my. Kot wa pê Ejau nhũm kot hapu pê Jako.

¹¹⁻¹²Nom nhũm kormã wa kator kêt ri nhũm Tirtūm wa hkukamã tanhmã wa harẽnh to. àhpumunh xà hkôt wa katorxà mã wa harẽ nẽ kãm:

—E kot paj amã war akra wa hkukamã tanhmã wa harẽnh to ka inhma. Nà koja wa kato nẽ gaa nẽ hprêk hãmri nhũm kot haputa amnhĩ to rax o kot wa jakre. Anẽ.

Kot wata koja kot hapu kĩnhã amnhĩ to grire nẽ ri pa nhũm ã wa hkukamã wa harẽnh anẽ. Kãm wa kot tanhmã amnhĩ nhĩpêx to hprãm xà hkôt ã wa harẽnh anẽ. Kormã wa kot tanhmã amnhĩ tomnuj to rý tanhmã amnhĩ to mex to hã kot wa omunh kêt tã kãm hprãm xà hkôt ã wa hkukamã wa harẽnh anẽ.

¹³Tirtūm kapêr ã kagà htũm kot wa harẽnh nẽ wa hã kagà kot:

Ejau rom Jako kanrêhã hkra nẽ htãmnhwý pixjaja na pre Tirtūm amnhĩm mẽ ho hkra. Anẽ.

¹⁴Mãn ka mẽ Tirtūm kot ã wa harẽnh anhýrja ma nẽ ajamaxpêr o:

—Tk. Kwa ja mexti hã. Mo na pre hamẽ wa hkanrêhã wa hkra nẽ wa htãmnhwý piitã ho hkra hkêt nẽ? Anẽ.

Kwa mẽ ã ajamaxpêr anhýr kêt nẽ. Tirtūm na hte kãm hprãm xà hkôt tanhmã mẽ panhĩpêx to ho pa pu mẽ kot tanhmã mẽ panhĩpêx to hã omu nẽ ãm omu nẽ amnhĩ tã tanhmã kãm nẽ hkêt nẽ.

¹⁵ Na pre finat Mojes mã amnhĩ jarẽnh o:
 Inhmã hprãm xà hkôt na pa hte mẽ omu nẽ
 tanhmã mẽ kamã ixukaprĩ hto ho ri ixpa.
 Nẽ inhmã hprãm xà hkôt na pa hte ahpÿnhã
 tanhmã mẽ hipêx to ho ri ixpa.

Anhÿr o kãm amnhĩ jarẽ.

¹⁶ Nom tanhmã mẽ pahte amnhĩ nhĩpêx to hã mẽ
 pahpumunh kôt na hte mẽ pakamã ukaprĩ hkêt
 nẽ. ãm tãm kãm hprãm xà hkôt na hte tanhmã mẽ
 pakamã ukaprĩ hto ho pa.

¹⁷ Amnepê mã Ejit kãm mẽ õ pahihiti Paraohiti
 hwÿr na pre Mojes mẽ nhũm ma hwÿr mō nẽ kãm
 tanhmã Tĩrtũm kapêr jarẽnh to nẽ kãm:

—E Tĩrtũm na awÿr inhmẽ pa mō. Tãm na
 pre apê Ejit nhõ xwÿnhjê nhõ pahi kaxyw axãm.
 Akrã hihtÿx tã nhũm mẽ kaxyw axãm. Tã ra xatã
 àhpumunh tÿx o tanhmã anhĩpêx to. Krĩ piitã hkôt ri
 mẽ pa xwÿnhjaja kot atã harẽnh mar nẽ àhpumunh
 o àhpumunh ã omunh kaxyw. Tã ixte amã ja jarẽnh
 kaxyw na pre awÿr inhmẽ pa man awÿr mō. Anẽ.

¹⁸ ã na hte Tĩrtũm kãm hprãm xà hkôt tanhmã
 mẽ panhĩpêx anhÿr to ho pa. Jao mẽ hkwÿjê kamã
 ukaprĩ ho pa. No mẽ hkwÿjaja nhũm tee ri mẽ hkrã
 hihtÿx ã mẽ omu nẽ ãm mẽ omu nhũm mẽ amnhĩ
 krã hkôt ri tanhmã amnhĩ tomnuj to ho ri pa.

Tĩrtũm kêp mẽ pakamã ukaprĩ xwÿnh ã harẽnh

¹⁹ Nẽ kot kaj mẽ atõ Tĩrtũm kot ã mẽ hipêx
 anhÿrja ã harẽnh ma nẽ tanhmã hã ixkukjêr to nẽ
 inhmã:

—Kwa na xep hte Tĩrtũm ahpÿnhã tanhmã mẽ
 hipêx to. Nẽ mẽ hkwÿjê kamã ukaprĩ ho pa nẽ mẽ
 hkwÿjaja mẽ hkrã hihtÿx ã mẽ omu nẽ ãm mẽ omu

ně mẽ kamã ukaprĩ hkêt nẽ. Jakamã kwa mo na hte mẽ kot amnhĩ tomnuj xwýnh ã mẽ harẽ? Tãm kot ã mẽ hipêx anhỹr kênã kot kêt mẽ kot amnhĩ tomnuj xwýnh ã mẽ harẽ.

Anhỹr o ajamaxpêr japêr.

²⁰ Kwa mẽ ri ã atỳx Tĩrtũm jarẽnh anhỹr kêt nẽ. E pa mẽ amã ejêp jarẽ ka mẽ inhma. Xà kot mễhõ gwy kwỳ ho amnhĩm poti nhĩpêx nhũm tee ri amnhĩ tã omu nẽ amnhĩ tã tanhmã kãm kapêr to nẽ kãm: “Tk. Kwa mon ka ri ã inhĩpêx anẽ?” Anhỹr o amnhĩ tã kãm kapêr? Nà koja kãm tanhmã nẽ hkêt nẽ.

²¹ Hipêx xwýnh kãm hprãm xà hkôt kot ã hipêx anhỹr kênã kot kêt amnhĩ tã kãm akir. Koja amnhĩm gwy kwỳ kakwỳ nẽ ho poti ho axkrut nẽ hipêx. Nẽ hõ ho muxre. Ho mex kumrêx nhũm xa. Nhũm ihõja mã ho anẽ nẽ hipêx no ãm wamta kĩnhã ho hanhàjti nhũm omnajti nẽ xa. No ãm tãm kot hamẽ wa hipêx prãm xà hkôt wa hipêx kênã.

²² Tã na hte ã Tĩrtũm mẽ panhĩpêx anẽ. Te poti pynajre pyrã nẽ mẽ pahkwỳjê nhĩpêx nhũm mẽ kãm kapêr mar prãm kêt nẽ htỳx ri tanhmã amnhĩ tomnuj to ho ri pa. Hãmri nhũm amnhĩ tã mẽ omu nẽ te amnhĩ nẽ mẽ rẽnh kaxyw pyrãk o mẽ hipêx no ãm kormã hamaxpêr o:

—Nà kot paj nhỹrmã mẽ kot amnhĩ tomnuj mỳrapê mẽ ho ijapêx pa nhũm mẽ piitã ja hã ix-pumu nẽ inhmã ixàhpumunh o ixàhpumunh ã ijarẽ. Nẽ inhmã mẽmoj punuj piitã hkĩnh kêt kumrêx ã axpẽn mã ijarẽ. Anẽ.

²³ Nom na hte jajê rom mẽ pahkwỳjê nhĩpêx o te poti mexta nhĩpêx pyrã nẽ amnhĩ kaxyw mẽ pax-

unhwý nē mē pahto hkra kaxyw. Nē mē pajarēnh o:

—Nà koja mē amnhī kaxyw Ixkra Jejus mā hamaxpēr nē hkôt amnhī xunhwý pa ja hã mē omu nē mē kamã ixukaprī ho ri ixpa. Nē mē ho mex pē mē kutã inhnojarêr rãhã ho ri ixpa. Hãmri nhũm mē nhỹrmã Ixkra mē wa ixri htīr tũm nē mex nē pa ho pa. Kot paj ã mē ho mex anē nhũm mē amnhī tã ixpumu nē inhmã inhmex o inhmex ã ijarēnh o pa. Anē.

Ã na hte Tīrtũm ahpýnhã mē pahpiitã mē panhīpêx anē.

²⁴ Nē na hte mē ixpê Ijaew pix o hkra hkêt nē. Na hte mãânēn mē apê Ijaew kêt xwýnhjê ho hkra.

²⁵ Amnepê mã mē kãm kapēr jarēnh o ri mē pa xwýnhjê hõ pē finat Ojejja na pre te Tīrtũm tãm kot Ijaew kêt xwýnhjê jarēnh pyrã nē mē harēnh o: Amnepêm na pa pre mē ho ixkra hkêt tã kot paj mē hkwýjê ho ixkra.

Na pa pre mē kamã ixukaprī hkêt tã pa ra inhmã mē hapê nē.

²⁶ Nē ixte mē kêp ixkra hkêt ã mē harēnh tã kot paj ra mē kêp ixkra hã mē harē.

Ixpê mẽõ Tīrtũm kot paj ã mē harēnh anē. Anē.

²⁷ Hãmri nhũm finat Ijais Ojej pãnhã tanhmã Ijaew jarēnh to. Ijaisja Tīrtũm nhỹ hã kapēr jarēnh o ri pa xwýnhjê hõ na pre. Jakamã nhũm Tīrtũm kãm tanhmã mē ijarēnh to nhũm kuma nē ô ri mē ixkukamã mē inhīgêxjê mã ujarēnh o pa nē hã kagã. Nē hã kagã ho:

Ijaew na mē ohtô rax kumrêx.

Te gô xujanãr mýri pykahti grã hkryre xohtô pyrãk.

Tã koja mẽ piitã ixkôt amnhĩ xunhwỳr kêt nẽ.
 Koja mẽ ãm grêre nẽ amnhĩ kaxyw inhmã
 hamaxpêr nẽ ixkôt amnhĩ xunhwỳ.
 Jakamã mẽ tapxipixjaja koja hkwỳjê rom nhỹrmã
 inhõ krĩ hwỳr api.

²⁸ No mẽ kot amnhĩ kaxyw inhmã mẽ hamaxpêr
 kêt xwỳnhjaja kot paj tokyx tanhmã mẽ
 harênh to.

Mẽ kot amnhĩ tomnuj mỳrapê tanhmã mẽ harênh
 to nhũm mẽ ma mẽ kot amnhĩ xà htỳx kamã
 hamak tũm xàta wỳr ma pa.

Nà kot paj tokyx ã mẽ hipêx anẽ.

Anhỹr o mẽ harẽ.

²⁹ Nom nhũm kormã ã mẽ harênh anhỹr kêt ri
 nhũm ra wam tanhmã mẽ harênh to nẽ mẽ harênh
 o:

Amnepêm Sotõ mẽ Komo kamã mẽ pa xwỳnhjaja
 na prem amnhĩ tomnuj tỳx rãhã ho ri pa.

Mỳrapê nhũm Tĩrtũm xàhpumunh o àhpumunh
 xwỳnhja tee ri ja hã mẽ omu hãmri nẽ
 kaxkwa rũm mẽ õ krĩ wa hipy mẽmoj pôôta
 rẽ.

Nhũm mẽ hã rôrôk nẽ mẽ ho hkaxàr pa nhũm mẽ
 hapêx.

Tã na pu htem mẽ uràk nẽ amnhĩ tomnuj o ri papa.
 Jakamã kop ãm Tĩrtũm kot mẽ pahkwỳjê kamã
 ukaprĩ kêt ronhỹx pu mẽ ra mẽ uràk nẽ
 pahpiitã pajapêx pa. Anẽ.

*Ijaew kwỳ kot Jejus kôt amnhĩ xunhwỳr kêt ã mẽ
 harênh*

Römãn 10.1-4

³⁰ Nẽ Ijaew kêt xwỳnhjaja na prem Ijaew pyrà nẽ
 kãm Tĩrtũm prãm kêt tã Jejus jarênh ma nẽ Ijaew

rom amnhĩ kaxyw hkôt hamaxpêr nê hkôt amnhĩ xunhwÿr. Hãmri nhũm Tĩrtũm ja hã mẽ omu nê mẽ ho hkra nê mẽ kot amnhĩ to mex xwÿnhjê hã mẽ harê.

³¹⁻³² Hãmri nhũm Ijaew tee ri mẽ kot Jejus kôt amnhĩ xunhwÿr ã mẽ omu nhũm ja mẽ kãm mex kêt nê. Hãmri nhũm mẽ hamaxpêr o:

—Tk. Kwa ra mẽ ixte finat Mojes kapêr kôt amnhĩ nhĩpêx mex o ri mẽ ixpa xwÿnh jakamã koja Tĩrtũm ja hã mẽ ixpumu nê mẽ ixte amnhĩ to mex xwÿnhjê hã mẽ ijarê nê mẽ inhnê mẽ ixte amnhĩ tomnuj rênh pa. No kot paj mẽ Ijaew kêt xwÿnhjê pyrã nê Jejus kôt amnhĩ xunhwÿr kêt nê. Æm kwarĩ ho kwarĩ.

Anhÿr ã amnhĩ jarê. No ãm ã mẽ hamaxpêr anhÿrja mex kêt. Na prem htÿx Tĩrtũm noo mã kot amnhĩ to mex ã amnhĩ jarênh kaprÿ nê arĩ ri tanhmã amnhĩ tomnuj to ho ri pa. Te pry kamã kên nôr nhũm mẽ kot nhãm nê mênh kaxyw hkamnãr nê ho amnhĩ par krã hi kukênh pyrãk o na htem amnhĩ nhĩpêx. Jao amnhĩ krã hkôt tanhmã amnhĩ nhĩpêx to ho pa hprãm xàj te Jejus kapêrja nhãm amnhĩ nê rênh pyrãk o hipêx. Jakamã koja mẽ Tĩrtũm nhõ krĩ hwÿr àpir kêt nê.

³³ Tĩrtũm kapêr ã kagà htũm kot ja jarênh kot:

E mẽ inhma. Kot paj nhÿrmã Ijaewjê hwÿr mēhõ mẽ nhũm mẽ hkôt kapêr o pa.

Nom koja mẽ kapêr mar kêt nê. Koja mẽ kuma nê ãm kuma.

Te pry kamã kên nôr nhũm mẽ kot nhãm pry nê mênh kaxyw hkamnãr nê ho amnhĩ par krã hi kukênh pyrãk o koja mẽ amnhĩ nhĩpêx.

No te mẽ kot nhãm pry nê mẽnh kaxyw hkamnãr kêt pyræk xwýnhjaja koja mẽ kurom nhỹrmã ma Tĩrtũm nhõ krĩ hwýr api.

Hãmri nẽ hkĩnh nẽ pa ho pa. Anẽ.

Nom kẽn kumrẽx jarẽnh kêt nẽ. Na prem Jejus ã kuxi nẽ ã harẽnh anẽ. Ijaew te mẽ kot kẽn nhĩpêx pyræk o Jejus nhĩpêx nẽ amnhĩ kaxyw hkõt hamaxpêr kêt nẽ axtem nẽ hkaga nẽ ãm kamã gryk pix o ri pata ã nhũm mẽ harẽ. No mẽ kot amnhĩ kaxyw hkõt hamaxpêr ronhỹx Jejus te kẽn kot mẽ kêp àmnãr pyræk kêt nẽ. Jakamã ã mẽ harẽnh kot anhỹr.

10

¹ Hêxta waa nẽ. Ijaxwýja ixpê Ijaew. Mẽ kêp ixkwý jakamã kêp apu mẽ kot amnhĩ kaxyw Jejus mã hamaxpêr nẽ hkõt amnhĩ xunhwýr ronhỹx pa ixkĩnh týx kumrẽx. Inhmã mẽ kêp Tĩrtũm kra hprãm týx kumrẽx kênã. Inhmã ja prãm xàj na pa hte mẽ ho Tĩrtũm wýr rãhã ho ri ixa.

² Ra ixte mẽ omunh mex. Mẽ kãm Tĩrtũm mã tanhmã amnhĩ nhĩpêx to hprãm tã no ãm mẽ kot hprĩ hã kapêr mar kêt. Jakamã na htem tee ri tanhmã kãm amnhĩ nhĩpêx to ho ri pa hprãm kaprý.

³ Nhũm pre Tĩrtũm tee ri amnhĩ tã mẽ omu nẽ hamaxpêr o:

—Koja mẽhõ amnhĩ kaxyw Ixkra Kris kõt hamaxpêr nẽ hkõt amnhĩ xãm pa ja hã omu nẽ kot amnhĩ to mex xwýnh ã harẽ nẽ ho ixkra kurê kumrẽx. Nom na hte Ijaew ohtô nẽ ã amnhĩ nhĩpêx anhỹr kêt nẽ.

Anhÿr o mẽ harẽ. ãm hãmri na ã mẽ harẽnh anẽ. Na htem ãm axtem nẽ hamaxpẽr o:

—Tk. Kot paj amnhĩ kaxyw Kris kôt ijamaxpẽr nẽ hkôt amnhĩ xãm kêt nẽ. Kot paj ãm pam amnhĩ krã hkôt tãm ri amnhĩ nhĩpêx o ri ixpa. Mẽ ixpê Ijaewjê mẽ ixte amnhĩ nhĩpêx xà hkôt. Hãmri nhũm Tĩrtũm ja hã ixpumu nẽ amnhĩm inhmex ã ijarẽ. Nom kot paj Kris kôt amnhĩ xãm kêt nẽ. ãm kwarĩ ho kwarĩ.

Anhÿr ã amnhĩ jarẽ.

⁴Nom na htem ãm htÿx ri amnhĩ krã hkôt amnhĩ to mex o pa hã amnhĩ kamnhĩx kaprÿ. Koja mẽ tee ri kãm finat Mojes kapẽr kôt amnhĩ nhĩpêx o ri pa hprãm kaprÿ. Jejus tapxipix na pre tãm amnhĩ nhĩpêx mex rãhã ho pa. Na pre Tĩrtũm kapẽr kôt amnhĩ nhĩpêx mex o ri pa nẽ aa kapẽr õ nhĩrôp ãm nẽ hkwÿm ri tanhmã amnhĩ tomnuj to hkêt nẽ. Kot amnhĩ tomnuj kêt xwÿnh ã ãm pixi mex na. Jakamã tapxipix kukwak ri na hte Tĩrtũm amnhĩm mẽ pahte amnhĩ to mex xwÿnh ã mẽ pajarẽ.

Tĩrtũm kãm mẽ pahpiitã mẽ pahto hkra hprãm ã harẽnh

⁵Nẽ amnepêm na pre finat Mojes Tĩrtũm nhÿ hã Ijaew mã tanhmã ujarẽnh to nẽ hã kagà. Nẽ mẽ kãm ujarẽnh o:

—E kot kaj mẽ atõ Tĩrtũm nhÿ hã ixujarẽnh ma nẽ hkôt amnhĩ nhĩpêx mex o ri apa nẽ hkwÿm ri tanhmã amnhĩ nhĩpêx to hkêt nẽ. Hã koja Tĩrtũm hã apumu nẽ amnhĩm ate amnhĩ to mex xwÿnh ã ajarẽ ka nhÿrmã kuri atĩr tũm nẽ amex nẽ apa ho apa. Anẽ.

⁶ ã mẽ kãm kapêr anhÿr tã mẽ pahte Mojes kapêr xà hkôt amnhĩ nhĩpêx o papaja na mẽ pahpê hihtÿx kumrêx. Tĩrtũm kapêr tũm na. Kapêr ã kagà kamã kot mẽ pamã mẽ pahte tanhmã amnhĩ nhĩpêx to hã karõja ohtô rax kumrêx jakamã pu mẽ tee ri pamã piitã hkôt amnhĩ nhĩpêx prãm kaprÿ. Nhũm Tĩrtũm tee ri amnhĩ tã mẽ pajamã hãmri nẽ mẽ pahwÿr Kra Jejus mẽ. Jakamã na pu htem amnhĩ kaxyw hkôt pajamaxpêr nẽ hkôt amnhĩ xunhwÿ nhũm Tĩrtũm hã mẽ pahpumu nẽ kukwak ri mẽ pahto hkra kurê kumrêx. Kra kukwak ri kot mẽ pahto hkra kaxyw kot mẽ pahwÿr mẽn nhũm mẽ kot hpĩr nhũm akupÿm ho htĩr jakamã na pu htem harênhja ma nẽ pajamaxpêr o:

—Nà na xep pre Jejus ixto ixpê Tĩrtũm kra. Anẽ.

Nom xà na hte Tĩrtũmja ã mẽ pamã kapêr anẽ nẽ mẽ pamã:

—E kot kaj mẽ ma kaxkwa hwÿr api nẽ Kris japrô nẽ man amnhĩ kôt akupÿm o wrÿ pa ja hã mẽ apumu nẽ mẽ ato ixkra.

Anhÿr o mẽ pamã kapêr? Nà na hte ã mẽ pamã kapêr anhÿr kêt nẽ. Tanhmã kot puj mẽ amnhĩ to nẽ ã amnhĩ nhĩpêx anẽ?

⁷ Rÿ xà na hte ã mẽ pamã kapêr anẽ nẽ mẽ pamã:

—E na pre Krisja ty. Jakamã mẽ kam nẽ ma hwÿr mra nẽ akupÿm amnhĩm ho htĩr. Hãmri pa ja hã mẽ apumu nẽ mẽ ato ixkra.

Anhÿr o mẽ pamã kapêr? Nà na hte ã mẽ pamã kapêr anhÿr kêt nẽ. Tanhmã kot pu mẽ amnhĩ to nẽ akupÿm ho htĩr? Ja pyrà nẽ na hte Tĩrtũm mẽ pamã mẽmoj tã karõ pu mẽ kãm ho anhÿr nhũm ja hã mẽ pahpumunh kôt mẽ pahto hkra hkêt nẽ.

8 Æm mẽ pahte amnhĩ kaxyw Jejus kôt pajamxpēr nē hkôt amnhĩ xunhwÿr ã mẽ pahpumunh kôt pix mã na hte mẽ pahto hkra. Hãmri nē mẽ pahwÿr Karō rē nhũm mẽ pahkarō mã gjêx jakamã mẽ pahte Tĩrtũm kãm hprãm xà hkôt amnhĩ nhĩpêx o papaja na mẽ pahpê hihtÿx kêt. Te kapēr ra mẽ pahkrã hi kaxwÿnh kãm hikwÿ pyrak o pu mẽ piitã mẽ kãm harēnh o ri mẽ hkôt papa. Jakamã na pa hte mẽ piitã mẽ kot amnhĩ kaxyw Jejus kôt hamaxpēr kaxyw tanhmã mẽ kãm harēnh to ho ri mẽ hkôt ixpa nē mẽ kãm:

9 –Kot ka mẽ atõ Jejus kēp anhõ Pahihti hã harē nē Tĩrtũm kot akupÿm ho htĩr kôt ajamaxpēr. Hã koja Tĩrtũm ja hã apumu nē anē ate amnhĩ tomnuj o hapêx nē ato hkra. Æm ja pix ã mẽ pahpumunh kôt na hte mẽ pahto hkra. Anē.

10 Nē na pu htem mẽ pahkrãhi kaxwÿnh kãm amnhĩ kaxyw Jejus mã pajamaxpēr. Nē mẽ pajakwa ho kēp mẽ panhõ Pahihti hã harē. Hãmri nhũm Tĩrtũm ja hã mẽ pahpumu nē amnhĩm mẽ pahte amnhĩ to mex xwÿnh ã mẽ pajarē nē mẽ pahto hkra.

11-13 Tã mẽ pahte amnhĩ kaxyw Jejus kôt pajamxpēr nē hkôt amnhĩ xunhwÿr xwÿnhjaja kot puj mẽ pahkĩnh nē papa ho papa. Mẽ pahpiitã. Ijaew nē Ijaew kêt xwÿnhjaja. Mẽ pahpiitã mẽ panhõ Pahi Maatija ãm pyxi mex na. Jakamã koja Ijaewjê hõ rÿ Ijaew kêt xwÿnhjê hõ amnhĩ to kuwÿ nhũm kuma nē ho hkra. Kapēr ã kagà htũm kot ja jarēnh kot:

Mẽ kãm kēp Tĩrtũm kra hprãm xwÿnhjaja koja mẽ amnhĩ to Tĩrtũm wÿ nhũm mẽ kuma nē Jejus kot mẽ nē htyk kukwak ri mẽ nē mẽ kot

amnhĩ tomnuj o hapêx nẽ mẽ ho hkra nhũm mẽ hkĩnh nẽ pa. Anẽ.

14-15 Xà na htem kormã amnhĩ kaxyw Kris mã hamaxpêr kêt rãhã amnhĩ to Tĩrtũm wỳ nhũm mẽ kuma nẽ mẽ ho hkra? Nà tanhmã kot wem amnhĩ to nẽ amnhĩ kaxyw kãm hamaxpêr kêt rãhã amnhĩ to kuwỳ? Na hte Tĩrtũm ma mẽ hwỳr mẽ hkwyjê rẽ nhũm mẽ ma mẽ hwỳr mra nẽ Tĩrtũm kapêr o mẽ ahkre ho ri mẽ hkôt pa. Nhũm mẽ hkwyjaja mẽ kuma nẽ amnhĩ kaxyw Jejus kôt hamaxpêr nẽ amnhĩ to Tĩrtũm wỳ. Kapêr ã kagà htũm kot ja jarẽnh kot:

Koja mẽmoj mex jarẽnh xwỳnhjaja ma mẽ hwỳr mra.

Nẽ mẽ hwỳr hpôx o mỗ nhũm mẽ amỳm amnhĩ wỳr mẽ omu nẽ hkĩnh nẽ. Anẽ.

16 Tã ra mẽ piitã kot kapêr mar tã piitã amnhĩ kaxyw hkôt hamaxpêr kêt nẽ. Jakamã nhũm finat Ijais tee ri ja hã mẽ omu nẽ Tĩrtũm mã mẽ harẽnh o:

Pa Pahi Maati. Kwa ra mẽ kot akapêr mar tỳx tã akôt amnhĩ nhĩpêx kêt nẽ. Mẽ kãm akapêr kôt amnhĩ nhĩpêx o pa hprãm kêt. Na htem ãm grêre nẽ akôt amnhĩ xunhwỳ nẽ akôt amnhĩ nhĩpêx o ri pa. Anẽ.

17 Kot anhỳr tã ãm mẽ kot Kris kapêr jarẽnh mar kôt pix mã na htem amnhĩ kaxyw hkôt hamaxpêr. Koja mẽ harẽnh mar kêt tã tanhmã koja wem amnhĩ to nẽ amnhĩ kaxyw hkôt hamaxpêr nẽ hkôt amnhĩ xunhwỳ?

18 Mãn ka mẽ atõ atỳx ã ajamaxpêr anhỳr o:

—Ko mãn Ijaew kormã Jejus kot mẽ panê tanhmã amnhĩ nhĩpêx to hã harẽnh mar kêt jakamã na mẽ kormã hkôt amnhĩ xunhwỳr kêt nẽ.

Anhÿr o ajamaxpēr. Nom ja kot anhÿr kêt. Ijaew piitā ra mẽ kot harēnh mar kēnā. Tirtūm kapēr ā kagà htūm kot ja hā mẽ harēnh kot:

Na prem ma mẽ piitā mẽ kām ja jarēnh o ri mẽ hkôt pa nhūm mẽ piitā kuma. Anē.

¹⁹ Tā mǎn ka prem ra ja ma nē atÿx ajamaxpēr o:

—Kot anhÿr tā no mǎn kormā hprī hā Jejus jarēnh mar kêt jakamā mẽ hkôt amnhī xunhwÿr kêt nē. Anē.

Nom ja haxwÿja kot anhÿr kêt. Ra mẽ kot hprī hā harēnh mar mex tā kuma nē ãm kuma nē amnhī kaxyw kām hamaxpēr kêt nē. No mẽ apē Ijaew kêt xwÿnh kwÿjaja na ka mẽ kurom harēnh ma nē amnhī kaxyw hkôt ajamaxpēr nē hkôt amnhī xunhwÿr kurē kumrēx. Hāmri nhūm Ijaew tee ri ja hā mẽ apumu nē mẽ akamā gryk tÿx nē. Nom ra Tirtūm kot ā mẽ hkukamā mẽ kot amnhī nhīpēx anhÿr ā mẽ omunh nē mẽ harēnh kot anhÿr kēnā. Na pre finat Mojes mẽ kām tanhmā hā kagà hto. Te Tirtūm tām kot mẽ hā kagà pyrà nē kapēr ā kagà htūm kamā kot mẽ harēnh kot:

Mē ate mẽ kamā mẽ akahak o apa xwÿnhjaja.

Mē kot htÿx ri amnhī nhīpēx o mẽ pa hā mẽ ate mẽ harēnh tā no kot paj mẽ arom amnhīm mẽ kot amnhī to mex xwÿnhjē hā mẽ harē.

Kot kaj mẽ tee ri ja hā mẽ omu nē mẽ kamā agryk tÿx kumrēx.

Nē mǎnēn pa ixte mẽ ho mex ā ixpumu nē mẽ hā ixkamā agryk nē. Anē.

²⁰ Nē finat Ijais na pre haxwÿja ā mẽ harēnh anē. Na pre kām amnhī kwÿ pē Ijaew puma hkêt nē xatā Tirtūm nhÿ hā tanhmā mẽ kām Ijaew kêt

xwÿnhjê jarênh to ho pa. Te Tîrtûm tãm kot mẽ harênh pyrâk o mẽ kãm:

Nà Ijaew kêt xwÿnhjaja kot Tîrtûm japêr kêt tã koja tãm mẽ kãm amnhĩ to amnhĩrît nhũm mẽ hkôt amnhĩ xunhwÿ.

Mẽ kot kormã amnhĩ kaxyw kãm hamaxpêr kêt tã koja tãm mẽ kãm amnhĩ to amnhĩrît. Anê.

²¹ ã Ijaew kêt xwÿnhjê jarênh kot anhÿr. Nê axte mã tanhmã Ijaewjê jarênh to kot:

Te mẽ katorxà kot tanhmã hkrajê ho mex to kaxyw tee ri amnhĩ wÿr mẽ kãm àkjêr pyrâk o na hte Tîrtûm Ijaewjê nhîpêx o pa.

Jao tee ri kãm tanhmã mẽ ho mẽ mex to hprãm tã no nhũm mẽ amnhĩ tã kuma nê ãm kuma nê hkôt amnhĩ nhîpêx kêt nê. Anê.

11

Tîrtûm kot Ijaew kamã ukaprĩ hã harênh

Matêwre 13.10-17

¹ Tã ra Ijaew kot Tîrtûm kaga jakamã mãn ka mẽ atõ mẽ harênh ma nê ajamaxpêr o:

—Mãn pre Tîrtûm tee ri amnhĩ tã mẽ omu nê amnhĩ pyrã nê mẽ hkaga.

Anhÿr o ajamaxpêr. Nom na pre mẽ hkaga hkêt nê. Ijaxwÿja ixpê Ijaew na pa. Mẽ uràk nê ixpê Ijaew pâr krax pê finat Apraãw kanrêhã htàmnhwÿ Pêjamĩ kanrêhã hõ na pa. Tã xà na pre Tîrtûm ixkaga? Nà kot ixkaga hkêt.

² Amnepêm kormã mẽmoj piitã hkêt ri na pre mẽ ixpê Ijaew hkukamã mẽ ixto hkra hã amnhĩ jarê. Tã nhũm amgrà xohtô nê hapêx nhũm mẽ hapôj hãmri nê Tîrtûm kôt amnhĩ nhîpêx o pa hkêt nê. Hãmri nhũm finat Erisja tee ri mẽ kot amnhĩ

nhĩpêx ã mẽ omunh o pa nê Tĩrtũm mã tanhmã mẽ harênh to nê mẽ hã kagà. Nê hã kagà ho:

³ Kwa Tĩrtũm. Mẽ ixte amã amnhĩ jarênh xà hã mēsti hkwỳ na prem ra hkrakrak pa. Nê anhỹ hã akapêr jarênh o ri mẽ pa xwỳnh kwỳ nhĩmex rax nê. ãm papxipix na pa arĩ ixtĩr nê ri ixpa nom nhũm mẽ ra kot ixpĩr kaxyw ixtã amnhĩ jarê. Anê.

⁴ Tã tanhmã na Tĩrtũm kutã kãm kapêr to? Na pre kãm:

Nà kapxipix na ka arĩ atĩr kêt nê. Arĩ mẽ ohtô nê apyrà nê amnhĩ kaxyw ixkôt hamaxpêr. Mẽ ohtô. Arĩ mẽ kêp 7.000 nê akwỳjê rom ri sãnti Paaw kutã hkõnkrã ho hkrĩ nê kãm mex ã harênh kêt nê. Anê.

⁵ Tã arĩ ã jarãhã mẽ kot ã amnhĩ nhĩpêx anhỹr kênã. Tĩrtũm kãm Ijaew japê jakamã mẽ kamã ukaprĩ. Jakamã nhũm ra mẽ hkwỳjaja mẽ pahpyrà nê amnhĩ kaxyw Kris kôt hamaxpêr nhũm Tĩrtũm mẽ ho hkra.

⁶ Nom mẽ kot amnhĩ to mex ã mẽ omunh xà hkôt mẽ ho hkra hkêt nê. Amarĩ kãm mẽ hapê htũm xà hkôt na hte mẽ ho hkra. Kop apu mẽ kot amnhĩ to mex ã mẽ omunh xà hkôt kot mẽ ho hkra ronhỹx amarĩ mẽ ho hkra hkêt nê. Nhỹx mẽ kot tanhmã amnhĩ nhĩpêx to ho pa hã mẽ omunh xà hkôt pix mã mẽ ho hkra.

⁷ Ijaew piitã Tĩrtũm kot amnhĩm mẽ mex ã mẽ harênh prãm tã no ãm mẽ grêre nê hamaxpêr xà hkôt Jejus kôt amnhĩ xunhwỳ. Na htem ohtô rax nê kapêr ma nê ãm kuma nê tee ri kot amnhĩm mẽ mex ã mẽ harênh prãm xaj amnhĩ krã hkôt tanhmã amnhĩ nhĩpêx to ho ri pa. Nom ra mẽ kot Jejus

kaga jakamã ã amnhĩ nhĩpêx anhÿr kaprÿ. Mẽ kot hkaga jakamã te ri mẽ hamak kro nẽ Tĩrtũm kapêr mar kêt pyrã nẽ pa.

⁸ Tĩrtũm kapêr ã kagã htũm kot mẽ harênh kot: Tĩrtũm na hte mẽ kãm kapêr mar prãm kêt xwÿnhjê pumu nẽ ãm mẽ omu nhũm htem htÿx ri pa ho pa. Nẽ Tĩrtũm mã hamaxpêr kêt o ri pa. Mẽ kot kapêr mar tã hprĩ hã mar tÿx kêt nẽ. Nẽ mẽ kot kapêr ã kagã kamã harênh tã hprĩ hã mar tÿx kêt nẽ. Jakamã na htem amnhĩ kaxyw hkôt hamaxpêr kêt o pa.

Tã na htem arĩ jarãhã ã amnhĩ nhĩpêx anhÿr o ri pa. Te mẽ nohkre nẽ mẽ hamak kro xwÿnh kot amnhĩ nhĩpêx pyrãk. Anẽ.

⁹ Nẽ amnepêm na pre pahĩ finat Tawija amnhĩ kwÿ Ijaew jarênh o:

Na htem htÿx ri hkĩnh kãm apkur o pa.

Te tutre kãm prãm nẽ kot rapuuti hwÿr àr nẽ tee ri kãm kator prãm kaprÿ pyrãk.

Ja pyrã nẽ mẽ kot Tĩrtũm kapêr mar kêt mÿrapê koja Tĩrtũm tanhmã mẽ ho nhũm mẽ tee ri kãm mex prãm kaprÿ.

¹⁰ Te mẽ nohkre xwÿnhjaja tee ri mẽ hpa nhĩpêx o pa pyrãk.

Nẽ omnuj nẽ à nẽ ho gjêx o ri pa pyrãk o amnhĩ nhĩpêx o ri pa.

Anhÿr o mẽ harê.

¹¹ Tã arĩ Ijaew Jejus kaga nẽ kãm kapêr mar prãm kêt jakamã xà na Tĩrtũm tee ri ja hã mẽ omu nẽ mẽ hkaga kumrêx? Nà kot mẽ hkaga hkêt. ãm mẽ tãmjaja kêp Jejus prãm nõkati jakamã nhũm tee ri ja hã mẽ omu nẽ mẽ hpãnhã Ijaew kêt xwÿnhjê

mã amnhĩ to amnhĩrīt nẽ mẽ hkwỳjê ho hkra. Jakamã koja Ijaew kwỳjaja ja hã mẽ omu nẽ tee ri hamaxpêr nẽ hamaxpêr o:

—Kwa na xep Ijaew kêt xwỳnh kwỳjaja Jejus kôt amnhĩ xunhwỳ nhũm Tĩrtũm ja hã mẽ omu nẽ mẽ ho hkra. Kwa mon pu prem axtem nẽ ri Jejus kaga? E pu mẽ kuxwar amnhĩ kaxyw hkôt mãn pajamaxpêr nẽ hkôt amnhĩ xunhwỳ kê Tĩrtũm ja hã mẽ pahpumu nẽ Ijaew kêt xwỳnhjê pyrà nẽ mẽ pahto hkra. Hãmri nẽ amnhĩ mã mẽ pahte amnhĩ to mex xwỳnh ã mẽ pajarẽ. Anẽ.

Ã Ijaewjaja hamaxpêr anhỹr kaxyw na pre Tĩrtũm Ijaew kêt xwỳnhjê mã amnhĩ to amnhĩrīt.

¹² Hãmri nhũm mẽ amnhĩ tã omu nẽ hkĩnh nẽ pa. No nhũm Ijaew kwỳjaja. Mẽ kãm Jejus prãm nõkati ho mẽ pa xwỳnhjaja mẽ hkĩnhã hkaprĩ nẽ pa. Tã koja mẽ nhỹrmã amnhĩ kaprĩ hã amnhĩ pumu nẽ amnhĩ kĩnh kêt ã amnhĩ pumu hãmri nẽ Tĩrtũm kôt amnhĩ xunhwỳr nẽ amnhĩ kaxyw Kra Jejus Kris mã hamaxpêr japêr. Koja mẽ ã amnhĩ nhĩpêx anẽ hãmri nẽ Ijaew kêt xwỳnhjê pyrà nẽ hkĩnh nẽ ri pa. Hãmri nhũm Tĩrtũm ja hã mẽ omu nẽ Ijaew kêt xwỳnhjê mẽ mẽ ho hpimràatã mẽ ho mex rax nẽ nhũm mẽ hkĩnh nẽ hamakêtkati nẽ pa ho pa.

Tĩrtũm kot Ijaew kêt xwỳnhjê ho hkra hã harẽnh

¹³ E kot paj hpãnhã mẽ apê Ijaew kêt xwỳnhjê mã ixkapêr nẽ mẽ atã kagà. Na pre Jejus ma mẽ awỳr inhmẽ. ỹ hã ixte mẽ ajahkre ho ri mẽ akôt ixpa kaxyw. Pa pre ma krĩ hkwỳ kamã mẽ akwỳjê hwỳr mỗ nẽ ixkĩnh kãm mẽ kãm kapêr jarẽnh o ri mẽ hkôt ixpa. Nhũm mẽ hkwỳjaja inhma nẽ

amnhî kaxyw Jejus kôt hamaxpêr nê hkôt amnhî xunhwỳ.

14 Tã koja apu ixkwỳjaja mẽ harênh mar japêr. Ijaew tee ri mẽ apê Ijaew kêt xwỳnhjê jarênhja ma hãmri nê ra amnhî kamã gryk japêr. Jao mẽ apyrà nê Jejus kôt amnhî xunhwỳ nê nhỹrmã kuri htĩr tũm nê mex nê pa ho pa.

15 Kormã mẽ kot amnhî kaxyw kãm hamaxpêr kêt jakamã na pre Tĩrtũm hpãnhã mẽ apê Ijaew kêt xwỳnhjê mã amnhî to amnhĩrĩt. Ka mẽ ra krĩ piitã hkôt axohtô nê hkôt amnhî xunhwỳ nê hkôt amnhî nhĩpêx mex o ri apa. Tã koja Ijaew-jaja nhỹrmã amnhî kaxyw Tĩrtũm mã hamaxpêr nê mẽ apyrà nê Jejus kôt amnhî xunhwỳr japêr. Hãmri nê te mẽhõ hkra kêp htyk nhũm hkaprĩ htã nhũm hkraja tanhmã amnhî to nê akupỳm kãm htĩr nhũm kot omunh nê hkĩnh tỳx kumrêxta pyræk o amnhî nhĩpêx. Jao Tĩrtũm mẽ kot hkôt amnhî xunhwỳr ã mẽ omu nê hkĩnh nê. Pu mẽ pahpimràatã uræk nê pahkĩnh nê ri papa.

16 E pa mẽ amã mẽ ujarênhja ã ejêp kwỳ jarê. Koja mẽmo pĩ hpàr jarê mex nê hã koja pàr mex nê xa. Ja pyrà nê Ijaew pàr krax finat Apraãwja kumrêx na pre amnhî kaxyw Tĩrtũm mã hamaxpêr nhũm ho hkra. Jakamã koja nhỹrmã hkanrêhã htãmnhwỳjaja uræk nê amnhî kaxyw kãm hamaxpêr nhũm mã mẽ ho anê nê mããnên mẽ ho hkra nhũm mẽ mex nê pa. Te kot mẽmo pĩ hpàr jarê mexja nhỹ hã pàr mexta pyræk.

17 Nê na htem akunĩ kamã mẽmo pĩ hpa jakà nê hamỳ nê ma amnhî kôt o mra. Nê ixkre kapem ra mẽ kot mẽmo pĩ hkreja hpa jakàr nê rênh xwỳnh

xwakre kamã wam pĩ hpa jakàr xwỳnhhta nhô nẽ axpẽn tã hkaxpre nẽ gaa nẽ axpẽn jamỳnh mex nẽ grà hkêt nẽ. Nẽ arĩ htĩr mex nẽ. Te kệp hpa kumrêx pyràk. Tã Ijaew kwỳ kot amnhĩ kaxyw Jejus kôt hamaxpêr xwỳnhjaja te mẽ kệp ixkre kapem pĩ hpàrta pyràk. No mẽ hkwỳjaja mẽ kot Jejus kaga xwỳnhjaja te mẽ kệp mẽ kot kệp hpa jakàr nẽ rênhta pyràk. Jakamã nhũm Tĩrtũm te mẽ kot pàr pè hpa jakàr nẽ rênhta pyràk o mẽ hipêx nẽ mẽ hkaga. Nẽ axtem te mẽ kot mẽmoj pàr pa jakàr nẽ hpãnhã kamã axtem pĩ hpa janhôr nẽ hã hkaxpreta pyràk o mẽ apê Ijaew kêt xwỳnhjê nhĩpêx nẽ mẽ amã amnhĩ to amnhĩrĩt. Ka mẽ ra amnhĩ kaxyw Jejus mã ajamaxpêr nẽ hkôt amnhĩ xunhwỳ nhũm Tĩrtũm mẽ ato mex nẽ.

¹⁸ Tã kêt ka mẽ arĩ Ijaew o mex o ri apa. Tanhmã ri mẽ hipêx to mã ajamaxpêr to hkêt nẽ. Rỳ ajamaxpêr o:

—Nà ãm hãmri na Tĩrtũm mẽ hkaga nẽ ãm kãm mẽ papxipixjê japê.

Anhỹr o ajamaxpêr kêt nẽ. Ijaew te ixkre kapem pĩ hpàr mexta pyràk. No mẽ kajaja te mẽ ate akunĩ rũm pĩ hpa kot ixkre kapem pàr mex pix kukwak ri htĩr nẽ hã harirta pyràk. Kêt akunĩ rũm pĩ hpa jakàr kukwak ri na hte ixkre kapem pàrta htĩr nẽ kuhê hkêt nẽ. Kop apu pàrta mex kêt ronhỹx ra akunĩ rũm hpaja grà pa. Ja pyrà nẽ Ijaew kukwak ri kot kaj mẽ nhỹrmã Tĩrtũm ri atĩr tũm nẽ apa ho apa. Jakamã kwa kêt ka mẽ ate amnhĩ to rũnh o mẽ hakrenh ã amnhĩ to jarkrar kêt nẽ.

¹⁹ Mãn ka mẽ atô ajamaxpêr o:

—Ra Tĩrtũm kot Ijaew kaga nẽ hpãnhã mẽ pajaja mẽ ixto hkra jakamã mãn kãm mẽ ijapê ho mẽ

hakre. Ra mẽ hpãnhã mẽ ixto hkra kênã. Anẽ.

²⁰ Nã ãm hãmri na pre Tĩrtũm Ijaew kwỳ kaga. Mẽ kot Jejus kôt amnhĩ xunhwỳr kêt mỳrapê na pre te mẽmo pĩ hpa jakàr nẽ rênhta pyràk o mẽ hipêx. Ka mẽ ra mẽ kurom amnhĩ kaxyw hkôt ajamxpêr jakamã nhũm Tĩrtũm te kot akunĩ kamã pĩ hpa jakàr nẽ ho htẽm nẽ ixkre kapem pĩ hpàr mex ã hanhôt nẽ hã hkaxpre pyràk o mẽ anhĩpêx. Nom kwa kêr ka mẽ ja hã amnhĩ pumu nẽ ri hã Ijaewjê mã amnhĩ to jarkrar kêt nẽ. ãm amnhĩ to mex nẽ Tĩrtũm kapêr kôt amnhĩ nhĩpêx mex o ri apa. No kot kaj mẽ ã amnhĩ nhĩpêx anhỹr kêt nhũm amnhĩ tã mẽ apumu nẽ ra kot Ijaew kwỳ nhĩpêxta pyrà nẽ tanhmã mẽ ato nẽ mẽ akaga.

²¹ ã Ijaew jarênh kot anhỹr. Te mẽ kêp pàr mex pyràk. Tã nhũm mẽ kot Jejus kôt amnhĩ xunhwỳr kêt jakamã nhũm Tĩrtũm te kot pĩ hpa jakàr nẽ rênhta pyràk o mẽ hipêx nẽ mẽ homnuj nẽ. Kot kaj mẽ uràk nẽ ã amnhĩ nhĩpêx anẽ nhũm mã mẽ ato anẽ nẽ.

²² Ijaew kot Jejus kôt amnhĩ xunhwỳr kêt jakamã nhũm Tĩrtũm mẽ hpãnhã mẽ apê Ijaew kêt xwỳnhjê mã amnhĩ to amnhĩrĩt. Tã ka mẽ Ijaew rom amã Jejus prãm nhũm Tĩrtũm ja hã mẽ apumu nẽ amnhĩ pyrà nẽ kãm mẽ aprãm nẽ mẽ akamã ukapri rãhã nẽ pa ho pa. Tã kwa mẽ okora. Kêr ka mẽ hkôt pix mã amnhĩ nhĩpêx o ri apa rãhã ty. Kot kaj mẽ hkaga nhũm amnhĩ tã mẽ apumu nẽ te Ijaew kot hkaga xwỳnhjê nhĩpêx pyràk o mẽ anhĩpêx nẽ mẽ akaga.

²³ Koja Ijaew nhỹrmã Jejus kôt amnhĩ xunhwỳr japêr nhũm Tĩrtũm ja hã mẽ omu nẽ mẽ ho hkra.

Te mẽ kot pàr pa jakàr nê rênh nhũm grà par xwỳnh nhũm kot akupỳm amnhĩm hamỳnh nê ixkre kapem pàr wỳr o htẽm nê akupỳm hã hanhõr nê hã hkaxpre ho htỳx nhũm kukwak ri akupỳm htĩrta pyràk. Ja kêp tanhmã kute hkêt. Kot ã hipêx anhỳr kaxyw àhpumunh tỳx.

²⁴ Mẽ apê Ijaew kêt xwỳnhjaja te mẽ ate akunĩ kamã pĩ hpa jakàr nê ixkre kapem pàr ã hanhõr nê hã kaxpreta pyràk. Jao Jejus kôt amnhĩ xunhwỳ nhũm mẽ ato hkra kurê kumrêx. No Ijaew te mẽ kêp ixkre kapem pàrta pyràk jakamã Tĩrtũm kot akupỳm hanhõrta tanhmã kêp kute hkêt. Kêp Tĩrtũm kênã kot tanhmã kêp kute. Jakamã koja mẽ hkôt amnhĩ xunhwỳ nhũm amnhĩ tã mẽ omu nê mẽ ho hkra kurê kumrêx.

*Tĩrtũm kot mẽ piitã mẽ kamã ukaprĩ hã harênh
Matêwre 23.37-39; Rukre 21.24; Juãw 10.16*

²⁵ E kot paj mẽ amã mẽmoj to amnhĩrĩt ka mẽ inhma. Nà na pa ra mẽ amã Ijaew krã xihtỳx xwỳnhjê jarê ka mẽ harênh ma. Ra mẽ kot Jejus kaga hã mẽ harênhja. Tã koja mẽ ã amnhĩ nhĩpêx anhỳr o pa rãhã hkêt nê. Na hte Tĩrtũm kormã amnhĩ tã mẽ apê Ijaew kêt xwỳnhjê jamãr o pa. Amnepê m na pre amnhĩ kaxyw mẽ akukamã tanhmã mẽ akwỳjê jarênh to. Tã kot kaj mẽ kot tanhmã mẽ ajarênh to xwỳnh piitã Jejus kôt amnhĩ xunhwỳr pa nhũm rĩ Ijaew amnhĩ to hapu nê kormã hkôt amnhĩ xunhwỳ. ã mẽ kot amnhĩ nhĩpêx anhỳr kaxyw. Jakamã kwa kêr ka mẽ ri ja hã amnhĩ to jarkrar o ri mẽ hkôt apa hkêt nê. Mẽ pahpyrà nê mẽ kot Jejus kôt amnhĩ xunhwỳr mã xwỳnh kênã.

²⁶ Koja Tirtûm nhÿrmã Ijaew piitã ho hkra. Kapêr ã kagà htûm kot mẽ harênh kot:

Nhÿrmã kot mẽ ate amnhĩ tomnuj pê mẽ apytàr mã xwÿnhja Ijaew õ koja.

Jako hkanrêhã htàmnhwÿjê hõ koja.

Koja nhÿrmã wrÿ nê mẽ ate amnhĩ tomnuj pê mẽ apytà nê mẽ ate amnhĩ tomnuj o hapêx pa. Anê.

Anhÿr o kot harênh.

²⁷ Nê mãânên ja:

Kot paj mẽ nê mẽ kot amnhĩ tomnuj o ijapêx pa.

Amnepê mã ixte mẽ hkukamã mẽ hã amnhĩ jarênh xà hkôt. Anê.

²⁸ Nom arĩ mẽ kãm Jejus mar prãm kêt jakamã te mẽ kot kutã amnhĩ xunhwÿr pyràk o amnhĩ nhĩpêx. Tã ã mẽ kot amnhĩ nhĩpêx anhÿrja ri ka mẽ kamjaja mẽ hpãnhã mẽ apê Tirtûm kra. Nom nhÿm Tirtûm arĩ kãm mẽ hapêê. Na pre amnepê mã kot tanhmã mẽ ho mex to hkukamã tanhmã mẽ hã amnhĩ jarênh to. Mẽ hpàr kraxjê mã tanhmã mẽ hã amnhĩ jarênh to. Finat Apraãw mẽ Ijak mẽ Jakoja mã mẽ hkanrêhã mẽ htàmnhwÿjê hã tanhmã amnhĩ jarênh to.

²⁹ Na hte Tirtûm mẽmoj tã tanhmã amnhĩ jarênh to nê ãm hãmri hã amnhĩ jarê nê amnhĩ jarênh xà hkôt tanhmã hipêx to. No na hte mẽmoj tã amnhĩ jarênh tã gaa nê ho hamakêtkati hkêt nê. Rÿ hpãnhã axtem tanhmã hipêx to hkêt nê. Na hte mẽmoj tã amnhĩ jarênh xà hkôt tanhmã hipêx to. Tã ra amnepê mã kot Ijaew o mex ã amnhĩ jarênh jakamã koja nhÿrmã mẽ ho mex rax nê ã mẽ hipêx anhÿrja o hamakêtkati hkêt nê.

³⁰ No mẽ kajaja mẽ apê Ijaew kêt xwỳnhjaja. Amnepêm na ka prem ajaxwỳja Tĩrtũm kôt amnhĩ nhĩpêx kêt nê. Tã nhũm mẽ akamã ukapĩ nê kãm mẽ ajapê nê. Ka mẽ ra harênh ma nê hkôt amnhĩ xunhwỳ nê hkôt amnhĩ nhĩpêx mex nê. No ãm Ijaew kukwak ri. Mẽ kot kapêr kôt amnhĩ nhĩpêx o pa hkêt jakamã nhũm Tĩrtũm mẽ hpãnã nhãm mẽ amã amnhĩ to amnhĩrit nê mẽ ato mex rax nê. Jakamã te Ijaew kukwak ri mẽ amex nê ri mẽ apa pyræk.

³¹ Tã koja nhỹrmã kot mẽ anhĩpêxta pyrà nê Ijaew ho hkra. Nê mẽ apyrà nê mẽ kamã ukapĩ nê. Mẽ kot mẽ apyrà nê amnhĩ kaxyw Kra hkôt hamaxpêr xwỳnhjaja nhũm mẽ apyrà nê mẽ ho hkra nê mẽ ho mex nê.

³² Mẽ apê Ijaew kêt xwỳnhjaja nê mẽ ixpê Ijaew mẽ pahte axpên pyræk. Na pu htem pahpiitã Tĩrtũm kapêr piitã hkôt amnhĩ nhĩpêx rãhã ho ri papa hkêt nê. Tã kot puj mẽ tee ri ja hã amnhĩ pumu nê amnhĩ to kuwỳ nhũm mẽ pama nê amarĩ mẽ pakamã ukapĩ nê mẽ pahto mex nê.

*Pawre kot Tĩrtũm mex o mex ã harênh
Epes 3.20; Korosê 1.16; Wam Korit 2.9, 2.16*

³³ Tĩrtũmja àhpumunh tỳx o àhpumunh tỳx. Nê ukapĩ ho ukapĩ nê mex o mex. Mẽ pahtõ na pu uræk nê ã amnhĩ nhĩpêx anhỹr o papa? Nà amrakati kumrêx. Nê mẽ pahtõ na pahte Tĩrtũm jamaxpêr kôt omunh? Nà mẽ pahte hamaxpêr kôt omunh kêt.

³⁴ Kapêr ã kagà htũm kot ja jarênh kot: Mẽ pahte Tĩrtũm jamaxpêr kôt omunh kêt. Nê kot pu mẽ pahtõ mẽmoj tã hakre hkêt nê. Mẽ parom àhpumunh o àhpumunh xwỳnh kênã.

35 Nē mẽ pahtō kot puj we kām pakapēr nē kām:
 “Kwa Tirtūm. Ra ixte amã mẽmoj nhōrta
 pãnhã kwa amnhĩ xwar inhmã mẽmoj gō.”
 Anē.

Nà mẽmoj piitã õ kēnã kot puj kêt ri ã kām mẽmoj
 nhōr ã amnhĩ jarēnh anē. Anē.

36 Tãm na pre amnhĩ kaxyw mẽmoj piitã ho kator
 pa. Nē ãm pix kukwak ri na mẽmoj piitã htĩr nē pa.
 Jakamã kwa pu mẽ kām mex o mex ã mãn harēnh
 rãhã ho ri papa.

12

*Mẽ pahte Tirtūm mã amnhĩ nhōr ã mẽ pajarēnh
 Wam Korīt 6.20; Epes 4.1; Piripos 4.8-9; Korosē
 1.10; Wam Tesarōn 4.1-3; Wam Pētre 2.11*

¹ Kwa Jejus kôt ixkwỳjaja. Tirtūm na hte mẽ
 pahto mex nē mẽ pakamã ukapři rãhã jakamã na
 pa ã mẽ amã ixkapēr anē. Kwa mẽ tokyx kām
 amnhĩ jarē nē kām amnhĩ gō. Te mẽ ate kām hkĩnh
 xà nhōr pyræk o amnhĩ nhĩpêx nē kām amnhĩ gō.
 Jao mẽ amã kapēr kôt pix mã amnhĩ nhĩpêx o
 ri apa hprãm ã kām amnhĩ jarē. Nē kām hprãm
 xà hkôt pix mã tanhmã amã amnhĩ nhĩpêx to ho
 ri apa hprãm ã kām amnhĩ jarē. Kot kaj mẽ ã
 kām amnhĩ jarēnh anē nhũm amnhĩ tã mẽ ama nē
 hkĩnh nē. ã mẽ pahte kām amnhĩ jarēnh anhỳrja na
 kām mar prãm.

² Nē kêt ka mẽ kām Tirtūm prãm kêt xwỳnhjaja
 kot amnhĩ nhĩpêx o ri amnhĩ nhĩpêx o ri apa hkêt
 nē. Nē mẽ amnhĩ to Tirtūm mãn wỳ kê mẽ amã
 mẽ ajamaxpēr mex jagjê. Koja mẽ ama nē mẽ
 amã hagjê ka mẽ ra aprĩ hã hamaxpēr xà hkôt mẽ
 pahte amnhĩ to mex xà pumunh mex nē. Na pu

htem hkôt amnhĩ nhĩpêx o ri papa nhũm amnhĩ tã mẽ pahpumu nẽ hkĩnh nẽ. Pu mẽ pajaxwỳja ỹ hã pahkĩnh nẽ ri papa.

Kris kwỳjaja kot tanhmã axpẽn nhĩpêx to hã mẽ kãm karõ

Römãn 12.1-11; Epes 4.11-16; Wam Pêtre 4.10-11

³ Nẽ na pre Tĩrtũm ixto mex nẽ. Nẽ mẽ akaxyw ixãm. Ixte mẽ amã Kra Jejus kot tanhmã mẽ panê amnhĩ nhĩpêx to hã harẽnh o ri mẽ akôt ixpa kaxyw. Tã na pa ã kagàja kamã mẽ amã harẽnh anẽ.

Jakamã kwa kêr ka mẽ amnhĩ to jarkrar o ri mẽ kãm apa hkêt nẽ. ãm kwarĩ ho kwarĩ. Rỳ atỳx ri ajamaxpêr o:

—Nà pa na ixte amnhĩ to mex o ixte ixkwỳjê piitã mẽ hakrenh par.

Anhỹr ã amnhĩ to jarkrar o ri mẽ hkôt apa hkêt nẽ. Kêt mẽ ãm amnhĩ jarẽnh o:

—Na pa pre amnhĩ kaxyw Jejus kôt ijamaxpêr nhũm Tĩrtũm ixpumu nẽ ixto hkra. Jakamã na pa hte Jejus Kris pix kukwak ri tãm amnhĩ nhĩpêx o ri ixpa. No amnhĩ krã hkôt ã amnhĩ nhĩpêx anhỹr kêt nẽ. Anẽ.

⁴ E pa mẽ amã mẽmoj jarẽ ka mẽ inhma. Nà mẽ panhĩja pyxi htã kamã mẽmoj xohôtô. Na kamã mẽ pano nẽ mẽ pajakwa. Nẽ kamã mẽ pajamak nẽ mẽ pahte. Na pu htem mẽ pano ho rĩt nẽ mẽ pajakwa ho pakapêr. Nẽ mẽ pajamak o ri ama nẽ mẽ pahte ho ri mra.

⁵ Ja pyrà nẽ Kris kôt mẽ pahte amnhĩ xunhwỳr xwỳnhja ãm pyxi tã hkôt mẽ pahte amnhĩ xunhwỳr xwỳnhjaja mẽ paxohôtô. Jakamã na pu htem

ahpÿnhã tanhmã axpën to mex to ho ri papa. Jao Kris kôt axpën to pahtõ nẽ pahtõx o papa.

⁶ Tĩrtũm na hte mẽ pahpê hkwÿ hã ahpÿnhã mẽ pamã tanhmã mẽmoj tã karõ to nẽ kaxyw mẽ pahto mẽ paxihtÿx. Tã kêr pu mẽ ra kot mẽ pamã mẽmoj tã karõ xà hkôt kãm amnhĩ nhĩpêx rãhã ho ri papa. Jakamã koja mēhõ ate Tĩrtũm kapêr jarēnh o ri apa kaxyw axãm nẽ amã anē ka Tĩrtũm kamnàr rom mẽ kãm kapêr jarēnh mex o ri mẽ hkôt apa.

⁷ Rÿ ate akwÿjê mã tanhmã axapēnh to ho ri apa kaxyw axãm ka mẽ kãm axapēnh mex o ri mẽ hkôt apa.

Rÿ ate Tĩrtũm kapêr ho mẽ ahkre ho ri apa kaxyw axãm ka ho mẽ ahkre mex o ri apa.

⁸ Rÿ ate Tĩrtũm kapêr o ri Jejus kôt mẽ akwÿjê jamaxpêr o hihtÿx o ri apa kaxyw axãm ka mẽ kãm kapêr jarēnh pẽ mẽ ho mẽ hihtÿx mex o ri mẽ hkôt apa.

Rÿ ka mẽ atõ akukrêx rax japêr nẽ ate mẽ kêp amrakati xwÿnhjê mã mẽmoj nhõr o ri apa kaxyw axãm ka axamnhĩx ri mẽ kãm mẽmoj nhõr o ri mẽ hkôt apa.

Rÿ ate akwÿjê ho amnhĩptàr kaxyw axãm ka mẽ ho amnhĩptàr mex o ri apa.

Rÿ ate tanhmã mẽ akwÿjê ho mex to nẽ mẽmoj to mẽ kutã anojarêt o ri apa kaxyw axãm ka akĩnh kãm ã mẽ hipêx anhÿr rãhã ho ri apa nẽ tanhmã akapêr punuj to hkukamã ri ajamaxpêr o ri mẽ hkôt apa hkêt nẽ.

⁹ Nẽ kêr ka mẽ apiitã amã axpën kĩnh kãm axpën to mex rãhã ho ri apa nẽ ri axêx rom amã axpën kĩnh ã amnhĩ jarēnh o ri apa hkêt nẽ. Nẽ mẽ kot

amnhĩ tomnuj xà piitã hkaga hpa nẽ hpãnhã mẽ kot amnhĩ to mex xà pix pyr tỳx nẽ hkôt amnhĩ nhĩpêx rãhã ho ri apa.

¹⁰ Nẽ mẽ apê Kris kwỳ hã amã axpẽn kĩnh kãm tãm axpẽn nhĩpêx o ri apa. Nẽ mẽ akwỳjaja mẽ kot amnhĩ to mex xwỳnh ã mẽ harẽn h o ri mẽ hkôt apa. No mẽ ri atỳx ajamaxpêr o:

—Nà koja mẽhõ ixkumrêx ixte tãm amnhĩ nhĩpêx xwỳnh ã ijarẽ pa rĩ kormã amnhĩ xwar tãm kot amnhĩ nhĩpêx xwỳnh ã harẽ.

Anhỹr o ajamaxpêr kêt nẽ. Kêr ka akumrêx tãm kot amnhĩ nhĩpêx xwỳnh ã harẽ.

¹¹ Nẽ kêr ka mẽ Tĩrtũm mã mẽmoj to anhỹr kaxyw nẽ kamã amã kaga hkêt kãm tanhmã kãm mẽmoj to ho ri apa. Jao akĩnh kamã kãm ho anhỹr mex nẽ.

¹² Nẽ mẽ nhỹrmã Tĩrtũm kot kaxkwa kamã mẽ ato mex rax kukamã ajamaxpêr nẽ akĩnh rãhã kãm mẽmoj to anhỹr o ri apa.

Nẽ kêr ka mẽ tanhmã amnhĩ to rỳ nhũm mẽhõ tanhmã mẽ ato ka mẽ akaprĩ nẽ ri apa htã no ãm tee ri amnhĩ kukamã ajamaxpêr o Tĩrtũm kaga hkêt nẽ. Arĩ amnhĩ to hwỳr rãhã ho ri apa.

¹³ Nẽ koja Kris kôt atõjê hõ kêp amrakati ka mẽ ja hã omu nẽ anhõ mẽmoj japêr nẽ mãm rĩ kãm hkwỳ gõ. Nẽ amnhĩ wỳr awỳ nẽ tanhmã ho mex to.

¹⁴ Nẽ mẽ kot tanhmã mẽ atomnuj to xwỳnhjaja kêr ka mẽ amnhĩ tã mẽ omu nẽ agryk nẽ wajaga kot tanhmã amã ho kaxyw hwỳr atẽm nẽ kãm tanhmã hã axãmnh to hkêt nẽ. Kêt ãm ho Tĩrtũm pix wỳ nẽ kãm:

—Pa mẽ ijamãr mex xwỳnh maati. Nà na ixkwỳjê hõja ã inhĩpêx anẽ. Tã nom kêr ka ixtã tanhmã

homnuj to hkêt nê. ãm tanhmã ho mex to.

Anhÿr o mãn mẽ ho awÿ.

¹⁵ Nê koja akwÿjê hõ mẽmoj tâ hkĩnh nê. Ka omu nê uràk nê ÿ hã akĩnh nê. No koja mẽmoj tâ hkaprĩ nê mÿr o nhÿ ka omu nê ra uràk nê ÿ hã akaprĩ nê.

¹⁶ Nê kêr ka mẽ piitã mẽ hipêx o axpên pyràk o ri apa. Te mẽ ate amnhĩ to rax o akwÿjê jakrenh o te mẽmoj kamã akahak o amnhĩ nhĩpêx pyràk kêt nê. Nê axàhpumunh tÿx o ate mẽ piitã mẽ hakrenh par pyràk o ri amnhĩ nhĩpêx o ri apa hkêt nê.

¹⁷ Nê koja mẽhõ tanhmã ato htã ka ãm amnhĩ tâ omu nê tanhmã amnhĩ tâ ho hkêt nê. Nê mẽ piitã mẽ noo mã tãm ri amnhĩ nhĩpêx o ri apa.

¹⁸⁻¹⁹ Nê kêr ka mẽ tãm ri axpên mã akapêr rãhã ho ri apa.

Nê kot kaj akràmnhwÿ mẽ wa tanhmã axpên nhĩpêx to. Hãmri ka wa akupÿm tãm axpên xãm kaxyw kãm akapêr tâ nhũm ama nê ãm ama nê akaga. Ka ãm amnhĩ tâ omu nê kamã agryk kêt nê. Koja Tĩrtũm tãm tanhmã atã ho. Kapêr ã kagà htũm kot ja jarênh kot:

Kêr ka mẽ amnhĩ tâ tanhmã kot ato xwÿnh to hkêt nê. Pa kot paj mẽ atã tanhmã ho. Anê.

Nê harênh kot:

²⁰ Kêr ka mẽ amã mẽ kãm mẽ akurê xwÿnhjê o mex pix o ri apa.

Kê mẽ kãm prãm ka ja hã mẽ omu nê mẽ kamã axukaprĩ nê mẽ kãm mẽmoj kwÿ gô kê mẽ kuku.

Rÿ nhũm mẽ kãm kôr ka mẽ kãm gô hkwÿ kê mẽ ho ixkõ.

Kot kaj mẽ ã amnhĩ tâ mẽ hipêx mex anê nhũm mẽ tee ri amnhĩ tâ mẽ apumu nê amnhĩ kamã

hpijaàm jao mẽ atã amnhĩ kamã gryk nẽ.
Anẽ.

²¹ Nom kot kaj mẽ amnhĩ tã tanhmã mẽ homnuj to hãmri nẽ ajaxwỳja uràk nẽ amnhĩ tomnuj nẽ. Ja pymaj kêr ka mẽ amnhĩ rom tãm mẽ hipêx. Hãmri nhũm mẽ amnhĩ tã mẽ apumu nẽ mẽ apyrà nẽ tãm mẽ anhĩpêx japêr.

E kêr ka mẽ ã axpẽn nhĩpêx o ri apa anẽ.

13

Mẽ pahto amnhĩptàr xwỳnhjê jarẽn

Matêwre 22.21; Xitre 3.1; Wam Pêtre 2.13-17

¹ Nẽ kêr ka mẽ kot mẽ ato amnhĩptàr xwỳnhjê kapêr ma nẽ kapêr kôt ri amnhĩ nhĩpêx rãhã ho ri apa. Tĩrtũm kot mẽ pakaxyw mẽ unhwỳr kẽnã. Mẽ kot mẽ pahto amnhĩptàr o pa kaxyw na hte mẽ unhwỳ.

² Jakamã koja mẽhõ mẽ kapêr ma nẽ ãm kuma nẽ hkôt amnhĩ nhĩpêx kêt nẽ hãmri nẽ te kot Tĩrtũm kapêr mar nẽ ãm mar pyràk o amnhĩ nhĩpêx. Hãmri nhũm Tĩrtũm tee ri ja hã omu nẽ nhỹrmã tanhmã hã ho.

³ Xà na hte tãm mẽ kot amnhĩ nhĩpêx xwỳnhjaja kãm mẽ kot mẽ ho amnhĩptàr xwỳnhjê pyma ho pa? Nà na htem kãm mẽ uma hkêt kãm ri pa. ãm mẽ kot amnhĩ tomnuj xwỳnh pixjaja na amnhĩ kamã kãm mẽ uma ho pa. Tã ka mẽ amã mẽ kot mẽ ato amnhĩptàr xwỳnhjê pyma hprãm kêt xwỳnhjaja kêr ka mẽ kapêr ma nẽ hkôt amnhĩ nhĩpêx kê amnhĩ tã mẽ apumu nẽ hkĩnh nẽ. Nẽ amnhĩm mẽ ate amnhĩ to mex xwỳnh ã mẽ ajarẽ.

⁴ Tĩrtũm nhỹ hã mẽ panhõ pahi kot mẽ pahto amnhĩptàr jakamã na htem mẽ kãm mẽ pahto mex

prãm nê. Nê kot pu mẽ pahtõ axtem nê tanhmã amnhĩ tomnuj to hãmri nhũm tee ri ja hã pajarênh ma nê tanhmã hã mẽ pahto. ãm hãmri na hte ã mẽ pahto amnhĩptâr xwýnhjaja mẽ panhĩpêx anê. Tĩrtũm kãm hprãm xà hkôt.

⁵ Jakamã kwa mẽ kapêr ma nê hkôt ri amnhĩ nhĩpêx mex rãhã ho ri apa. Nom amã kot tanhmã ato pix pymaj hkôt ri amnhĩ nhĩpêx kêt nê. Mãânên ã amnhĩ kukamã ajamaxpêr anê nê ajamaxpêr o:

—Nà Tĩrtũm kot mẽ ixkaxyw unhwýr jakamã na pa hte kapêr ma nê hkôt amnhĩ nhĩpêx mex o ri ixa.

Anhýr o ajamaxpêr.

⁶ Nê mẽ pahto amnhĩptâr xwýnhjaja kot Tĩrtũm nhỹ hã tanhmã mẽ panhĩpêx to ho pa jakamã na pu htem mẽ àpênh pãnhã mẽ kãm amnhĩre. Mẽ pahpiitã axpên kaxyw kãm kàxpore ho hkryre nê kugõ. Tanhmã kot ho mẽ pamã mẽmoj to mex to kaxyw.

⁷ Jakamã kêr ka mẽ hã apijaàm o ri apa kamã mãmrĩ mẽ kãm kàxpore hkwy ho hkryre nê õr o ri apa. Mẽ kot hã àhwýr xà hkôt.

Mẽ pahte tanhmã axpên nhĩpêx to hã mẽ pamã karõ

Matêwre 22.39-40; Karatas 5.13-15; Wam Juãw 3.11-24

⁸ Nê kêr ka mẽhõ ho tewên japêr nê tokyx kãm amnhĩre. Nê mẽ amã axpên kĩnh o aa ho ajamakêtkati hkêt nê. Jao mẽmoj to axpên kutã anojarêt rãhã ho ri apa. Kot kaj mẽ ã axpên nhĩpêx anê nê Tĩrtũm kapêr piitã hkôt amnhĩ nhĩpêx mex o ri apa.

⁹ Amnepê mã na pre finat Mojesja Tirtũm nhỹ hã Ijaew mã mẽmoj tả karõ nẽ mẽ kãm:

Kêr ka mẽ aprõ pix tânopxa nẽ nhãm mẽnijê hõ kamã ri akurẽ ho apijaàm kêt o apa hkêt nẽ.

Nẽ mẽ anijaja mẽ amjên pix tânopxa nẽ nhãm ri mẽmyjê hõ kamã akurẽ ho apijaàm kêt o ri apa hkêt nẽ.

Nẽ mẽ ri axpên par kêt nẽ.

Nẽ mẽ ri axpên pê axàhkĩnh o ri apa hkêt nẽ.

Nẽ mẽ amã ri axpên kukrêx kĩnh o ri amã ho anhõ hprãm o ri apa hkêt nẽ. Anẽ.

Nẽ mãnẽn ja:

Kêr ka mẽ nhãm mẽ axpên nhĩpêx o te ka amã amnhĩ tả ma pyræk. Jao tãm axpên nhĩpêx o ri apa. Anẽ.

Ã kot mẽ kãm hã karõ kot anhỹr. Kot puj mẽ ã pamã pahkwỳjê kĩnh anẽ nẽ mãnẽn wam finat Mojes kot mẽmoj tả mẽ panhĩgêjtjê mã karõ hkôt amnhĩ nhĩpêx o ri papa rãhã nẽ. Jao axpên par kêt nẽ. Nẽ axpên pê paxàhkĩnh kêt nẽ. Nẽ axpên kutã panojarêr rãhã nẽ.

¹⁰ Koja mẽhõ kãm amnhĩ tả ma pyræk o hkwyjê nhĩpêx nẽ mẽ ho mex pix o pa. Jakamã kot kaj mẽ amã ri axpên kĩnh nẽ mẽmoj to axpên kutã anojarêr pix nẽ. Jao Tirtũm kapêr piitã hkôt amnhĩ nhĩpêx mex o ri apa.

¹¹ Amnepê mã mẽ pahte amnhĩ kaxyw Jejus kôt pajamaxpêr xà hã arĩgrota ã na pre kormã akupỹn mẽ pahwỳr hpôx xà hã arĩgro kormã hwỳr awry rax nẽ. Tã ra hwỳr ahtêp o mỗ. Koja tokyx akupỹn mẽ pahwỳr wrỳ nẽ ma akupỹm kaxkwa hwỳr mẽ pahto api. Jakamã kwa kêr pu mẽ arĩ hamãr rãhã

ho ri apa. Jao tanhmã amnhĩ tomnuj to kaxyw nẽ pajamexpêr o:

—Kwa koja Jejus tanhmã amnhĩ to nẽ jarãhã akupÿn wrÿk japêr. Tã kot pa ri ã amnhĩ nhĩpêx anẽ nhũm wrÿ nẽ tee ri ja hã ixpumu pa amnhĩ kamã ixpijaàm tÿx nẽ. Nà kot paj ã amnhĩ tomnuj anhÿr kêt nẽ. Anẽ.

Hãmri nẽ Jejus kamã ajamak pê kutêp Tirtũm kapêr kôt pix mã ri amnhĩ nhĩpêx mex rãhã ho ri papa.

¹² Na pu htem kamàt kãm gôr nẽ arĩgro jamãr pê kamã pajamak o panhĩkwÿ. Arĩgro te kêp Jejus akupÿn wrÿk pyrãk. Jakamã kwa pu mẽ kamã pajamak pê kãm panojarêr rãhã ho ri papa nẽ amnhĩ nẽ tanhmã mẽ omnu xà kute pumunh mex o ri papa. Te ho pôristi kot amnhĩ nẽ mẽ kot kãm mẽ hkurê xwÿnhjê pumunh mex pyrãk o Jejus kutêp tãm amnhĩ nhĩpêx o ri papa. Na pre tanhmã mẽ pahkrã hto pu mẽ ÿ hã tãm ri amnhĩ nhĩpêx. Tã kër pu mẽ arĩ ã amnhĩ nhĩpêx anhÿr o ri papa nẽ te mẽ pahte arĩgro hã mẽ pa xwÿnhjê kot amnhĩ nhĩpêx pyrãk o amnhĩ nhĩpêx.

¹³ Kot puj mẽ ã amnhĩ nhĩpêx anẽ nẽ mẽ pi-itã mẽ noo mã tee ri tanhmã mẽ pahte amnhĩ tomnuj to mã pajamexpêr kêt nẽ. Jao amnhĩ kamã pahpijaàm nẽ ri papa hkêt nẽ. Nẽ pajamakêtkati nẽ paxãmnhix ri papa. Te ho hirã kamã ri mẽ pa xwÿnhjê kot amnhĩ nhĩpêx pyrã nẽ ãm ri paxãmnhix tãm amnhĩ nhĩpêx o ri papa.

Nẽ mẽ pahprô pix tânopxar o ri papa.

Nẽ mẽ pahpipãnh nẽ ri papijapu ho ri papa hkêt nẽ.

Nẽ mẽmoj tã axpên mã paxàkjêr hkêt nẽ.

Ně mẽmoj tã axpẽn kãm pagryk kêt nẽ.

¹⁴ Nom kot puj mẽ axtem nẽ ã amnhĩ tomnuj anẽ nẽ mẽ pahte amnhĩ nhĩpêx tũm kôt pix mã amnhĩ nhĩpêx. Tã kêt pu mẽ ã amnhĩ nhĩpêx anhỹr pumaj hpãnhã amnhĩ to Pahihti Jejus Kris wỳ nẽ kãm:

—Pa Jejus. Nà kormã jar apa ri na ka pre mẽ kot tanhmã amnhĩ tomnuj to kutã axihtỳx o axihtỳx nẽ aa tanhmã amnhĩ tomnuj to hkêt nẽ. Tã inhmã apyrà nẽ ixte amnhĩ tomnuj kutã ixihtỳx o ixihtỳx o ixpa hprãm. Anẽ.

Jao mẽ pajamaxpěr tũmja te ra kot amnhĩ tã mẽ pahto htỳx kêt pyræk o pu mẽ amnhĩ nhĩpêx o ri papa.

14

Mẽ pahte Kris kôt pahkwỳjê mã paxàkjêr kêt ã mẽ pamã karõ

Matêwre 7.1-5; Römãn 2.1; Wam Korĩt 10.23-33; Xiakre 4.11

¹ Nẽ koja mẽhõ kormã Jejus kôt amnhĩ xãm nyw ri kormã hkôt hamaxpěr tohtuj anẽ. Hãmri nẽ htỳx tanhmã hamaxpěr to nẽ mẽmoj mex kaga. Ka mẽ ja hã omu nẽ ãm omu nẽ hã tanhmã kãm nẽ hkêt nẽ. Kwãr mãmri ã amnhĩ nhĩpêx anẽ. Koja gaa nẽ rĩ hprĩ hã Tirtũm kapêr mar tỳx nẽ hãmri nẽ hkôt mẽmojta pumunh mex nẽ.

² Jakamã koja Jejus kôt akwỳjê hõ mẽ apkur xà piitã hkur pymaj tanhmã hõ kute hã harẽ nẽ hkaga nẽ hamaxpěr o:

—Nà kot pa ja hkur kêt nẽ. Kot pa apu kuku nẽ hkur o amnhĩ tomnuj nẽ. Anẽ.

Kwãr mãmri ã hamaxpěr anẽ nẽ hkur kêt nẽ. Nom mẽ pahte Jejus kôt amnhĩ xunhwỳr tỳx

xwÿnhjaja na pu htem paxàmnhĩx Jejus kamnàr rom mẽmoj piitã kuku. Nom mẽ pahkĩnhã ham mẽ kot hkôt amnhĩ xunhwÿr xwÿnhjaja kormã kapêr piitã mar kêt jakamã kwâr mẽ mãmri anê nê mẽmoj kur kêt nê.

³ Nom kêr ka mẽ ri tanhmã hã mẽ kãm akapêr to hkêt nê. Rÿ mẽ kãm:

—Kwa mẽ ixpyrà nê mẽmoj piitã aku.

Anhÿr o mẽ kãm akapêr kêt nê. Ano ho ãm hã mẽ omu.

Nê mẽ ate mẽmoj piitã hkur kêt xwÿnhjaja kêr ka mẽ ajaxwÿja mẽ ixte mẽmoj piitã hkur ã tanhmã mẽ inhmã axàkjêr to hkêt nê. Mẽ ixte mẽmoj piitã hkur o ixpa hã mẽ ixpumu nê ãm hã mẽ ixpumu nê hã tanhmã mẽ inhmã axàkjêr to hkêt nê. Rÿ hã mẽ inhmã:

—Kwa nà kot kaj mẽ ja kur o amnhĩ tomnuj nê.

Anhÿr o hã mẽ inhmã akapêr kêt nê. Ano ho ãm ja hã mẽ ixpumu. Mẽ pahte ahpÿnhã tanhmã paxàpkur to htã Tĩrtũm kot mẽ pahte Kra Jejus kôt amnhĩ xunhwÿr xwÿnh piitã mẽ pahto hkra kênã.

⁴ Jakamã kwa mẽmoj tã tanhmã axpên mã axàkjêr to ho ri apa hkêt nê. Koja Kris kôt atõjê hõ axtem tanhmã hamaxpêr to ka mẽ tee ri ja hã omu nê tanhmã hã kãm nê hkêt nê. Rÿ ajamaxpêr o:

—Tk. Na hte ã ri amnhĩ nhĩpêx anhÿr o pa. Ja omnuj. Pa na pa hte ã amnhĩ nhĩpêx anhÿr kêt nê.

Anhÿr o ri axpên kukamã ajamaxpêr hkêt nê. Mẽ pahpê Tĩrtũm kêt kênã kot pu kêt mẽ ã ri axpên kukamã pajamaxpêr anê. Tĩrtũm pix na hte tanhmã mẽ pajarênh to xwÿnh. àhpumunh o àhpumunh xwÿnh jakamã koja tanhmã mẽ hkrã

hto nhũm mẽ rĩ kormã tãm hamaxpěr pē àmnhĩx ri tanhmã amnhĩ nhĩpêx to ho pa.

⁵ Nẽ koja Jejus kôt atōjê hō mẽmo arĩgromnu jarẽ nẽ hã àpênh kêt nẽ. Ka mẽ apê hkwỳjaja tee ri ja hã omu nẽ ajamaxpěr o:

—Nà arĩgro piitã mẽ pamã mex kênã. Kot paj mãmri arĩgro piitã hã apê.

Anhỹr o ajamaxpěr japêr. Nom kêr ka mẽ ja hã axpẽn mã tanhmã axàkjêr to hkêt nẽ. Na pu htem ahpỹnhã pamã tanhmã mẽ pahte amnhĩ nhĩpêx to hprãm xà hkôt tanhmã amnhĩ nhĩpêx to. No tanhmã ri hã axpẽn mã paxàkjêr to ho ri papa hkêt nẽ.

⁶ Kêt mẽ kot arĩgromnu jarênh xwỳnhjê mẽ mẽ pahte arĩgro piitã mex ã harênh xwỳnhjaja mẽ pahpiitã mẽ pahpê Tĩrtũm kraa. Jakamã mẽ pahpiitã na pu htem pajamaxpěr o:

—Na pa hte Tĩrtũm kãm hprãm xà hkôt ã amnhĩ nhĩpêx anhỹr o ri ixpa. Anẽ.

Nẽ mẽ pahte mẽmoj piitã hkur xwỳnhjaja nẽ mẽ kot mẽmoj kwỳ hkur kêt xwỳnh piitã mẽ pahpê Tĩrtũm kraa. Mẽ pahpiitã mẽ pamã kãm hprãm xà hkôt amnhĩ nhĩpêx prãm jakamã na pu htem paxàpkur kaxyw nẽ Tĩrtũm mã amnhĩ jarẽ nẽ kãm:

—Pa mẽ ijamār mex xwỳnh maati. Nà ãm hãmri na ka hte apkati mẽ mẽ inhmã mẽ inhō ho apa. Amex o amex Tĩrtũm.

Anhỹr o kãm amnhĩ jarẽ. Hãmri nẽ kormã hkamnār rom paxàmnhĩx ri tanhmã mẽõ kuteta ku.

⁷⁻⁸ Mẽ pahpê Tĩrtũm kra jakamã na pre ra mẽ pakukamã tanhmã mẽ pajarênh to. Mẽ pakukamã pahtyk ã arĩgro jarẽ nẽ mẽ pahte pahtĩr

ri tanhmã ri amnhĩ nhĩpêx to ho papa hkukamã hamaxpêr. No mẽ papajaja na pu htem amnhĩ krã hkôt tanhmã mẽ pahte amnhĩ nhĩpêx to kukamã paxàhpumunh kêt.

⁹ Jakamã na pre Kris ja hã mẽ pahpumu nê tãm mẽ pakaxyw amnhĩ to kêp mẽ panhõ Pahihti nê mẽ panê ty. Hãmri nê akupỹm htĩr. Kêp mẽ panhõ Pahihti hã akupỹm htĩr. Kêp mẽ pahte hkôt amnhĩ xunhwýr xwýnhjê nhõ Pahihti kaxyw. Jakamã kêp ra mẽ pahkwý htyk xwýnhjê nhõ Pahihti nê mããnên kêp arĩ mẽ pahtĩr xwýnhjê nhõ Pahihti.

¹⁰ No mẽ papajaja mẽ pahpê Kris kôt mẽ pahkwýjê nhõ pahi hkêt jakamã kêr mẽ Kris kôt akwýjê hõ tanhmã amnhĩ nhĩpêx to hã omu hãmri nê tanhmã ho akapêr to hkêt nê. Rý ajamaxpêr o:

–Kwa na ã amnhĩ nhĩpêx anê. Inhmã ja mex kêt.

Anhýr o ajamaxpêr kêt nê. Koja nhýrmã Tĩrtũm tãm mẽ pahpiitã tanhmã mẽ pahte amnhĩ nhĩpêx to hã mẽ pahpumunh xà hkôt tanhmã mẽ pajarênh to. Nom kêr pu mẽ papajaja amnhĩ hkrã hkôt ã axpên jarênh anhýr kêt nê.

¹¹⁻¹² Kot puj mẽ nhýrmã pahpiitã Tĩrtũm kutã pahkrĩ nê kãm tanhmã amnhĩ jarênh to. Kormã mẽ pahtĩr ri tanhmã mẽ pahte amnhĩ nhĩpêx to ho papa hã kãm pahprĩ hã amnhĩ jarê. Kê mẽ pama nê tanhmã mẽ pajarênh to. Kapêr ã kagà htũm kot mẽ pakukamã mẽ pajarênh kot:

Koja nhýrmã mẽ piitã ixpê mẽ õ pahi hã ixkutã hkõn krã ho rôrôk nê hkrĩ nê inhmã inhmex o inhmex ã ijarê.

Nê mẽ piitã ixpê Tĩrtũm ã ixpyxi mex ã ijarê. ãm hãmri na pa ã mẽ hkukamã mẽ harênh anê. Anê.

Mē pahte Kris kôt pahkwỳjê ho mex ã mē pamã karõ

Wam Korît 8.9-13

¹³ Nê kwa kêr ka mē akwỳ kot Jejus kôt amnhĩ xunhwỳr tohtuj anhyr xwỳnhjaja tanhmã mē kot amnhĩ nhĩpêx to ho pa hã mē omu nê ja nê tanhmã mē kãm akapêr to hkêt nê. ãm mē noo mã tãm ri amnhĩ nhĩpêx rãhã ho ri apa. Mē kot ja hã mē apumunh nê mē akôt amnhĩ nhĩpêx kaxyw. No kot ka mē kot tanhmã amnhĩ nhĩpêx toja ã kãm akapêr nhũm ama nê tee ri amnhĩ kukamã hamaxpêr nê hkaprĩ nê.

¹⁴ E kot pa hpãnhã mē paxàpkur xà hã tanhmã mē panhõ jarênh to. Ixte Pahihti Jejus jamaxpêr xà hkôt tanhmã ijamaxpêr to ho ri ixpa jakamã kot paj ixkatàt kôt mē amã tanhmã mē panhõ jarênh to nê ãm hãmri harê. Nà mē paxàpkur xàja ãm pixi nê omnu hkêt. Piitã mex o mex. Nom koja mēhõ tee ri mēmo mē apkur xà hõ pumu nê hamaxpêr o:

—Nà kot paj ja hkur kêt nê. Kot paj apu kuku nê ho amnhĩ tomnuj nê. Anê.

Hãmri nê hkur kêt nê. Tã kwãr mãmrĩ ã hamaxpêr anê nê hkur kêt nê. Nom na ãm amnhĩ krã hkôt Tĩrtũm kêp ja omnuj ã hkamnhĩx. Kêp omnuj kêt. Ra kot mēmo mē paxàpkur xà piitã mex ã harênh.

¹⁵ Tã kot kaj mē kot mēmoj kur kêt xwỳnhhta py nê o tẽ nê kot hkaga xwỳnh noo mã hkur o xa nhũm apumu nê tee ri hamaxpêr nê hkaprĩ nê. Jakamã kot ka mē ã noo mã amnhĩ nhĩpêx anhyrja o ho mex kêt nê. Kwa mē ã ri axpên nhĩpêx anhyr hkêt nê. Kot ka mē ã axpên nhĩpêx anê nê te amnhĩ pix kukamã ajamaxpêr pyræk o amnhĩ nhĩpêx. Jao

akwỳjê ho mex kukamã ajamaxpêr kêt nê. Kris kãm mẽ hapê htỳx kôt mẽ kot amnhĩ tomnuj pãnhã amnhĩrer kaxyw ra nê htyk kênã kot ka kêt mẽ axtem nê ri ã mẽ noo mã mẽ kot mẽmoj kur kêêta kur anê. Rỳ koja apu tee ri kot mẽmoj kur kêêta kur ã mẽ apumu nê tanhmã amnhĩ tomnuj to. Jao Kris kaga japêr. Jakamã kwa mẽ ã mẽ noo mã mẽmojta kur kêt nê.

¹⁶ Mẽmo mẽ apkur xàja mex tã nhũm mẽ akwỳjê hõ kãm mex kêt japêr ka mẽ noo mã hkur kêt nê. Nê tanhmã hã kãm nê hkêt nê. Kot kaj mẽ anê nhũm Kris kra hkêt xwỳnhjaja tee ri ja hã mẽ apumu nê tanhmã axpẽn mã mẽ apê Kris kwỳjê ho kapêr punuj to.

¹⁷ Mẽ pahpê Tĩrtũm krajaja na pu htem paxàpkur xà nê pahkõm xà pix kukamã pajamaxpêr o ri papa hkêt nê. Na pu htem amnhĩ mẽ pahkwỳjê mex kukamã pajamaxpêr. Nê mẽ pahte tãm amnhĩ nhĩpêx kukamã pajamaxpêr. Nê tãm axpẽn nhĩpêx kukamã pajamaxpêr. Kot puj mẽ ã amnhĩ nhĩpêx anê nhũm Tĩrtũm Karõ ja hã mẽ pahpumu nê mẽ pahto mẽ pahkĩnh nê. Pu mẽ pahkĩnh nê pajamakêtkati nê ri axpẽn kôt papa.

¹⁸ Tã kot puj mẽ ã Kris mã tanhmã amnhĩ nhĩpêx to ho ri papa anê nhũm Tĩrtũm ja hã mẽ pahpumu nhũm ja kãm mex nê. Nê Kris kôt mẽ pahkwỳjê mã haxwỳja ja mex nê.

¹⁹ Jakamã kêr pu mẽ tãm axpẽn mã pakapêr o ri papa. Nê pajamakêtkati nê axpẽn kôt ri pajapôj. Nê Kris kôt tanhmã axpẽn to paxihtỳx to ho ri papa.

²⁰ No kot ka mẽ axàpkur xà gryk ã akwỳ hkuramã ajamaxpêr kêt nê atỳx ri mẽhõ noo mã mẽmoj kur japêr. Kêp omnuj tã ka mẽ ãm amnhĩ

pix kukamā ajamaxpēr nē noo mā hkur japêr. Hāmri nhūm ja hā mẽ apumu nē ra kot Tīrtūm kaga mā. Ra kēp hkra jakamā kwa mẽ noo mā mẽ kot mẽmoj punuj ā harēnh xwŷnhta kur kêt nē. Nom mẽ paxàpkur xàja piitā mex. Tīrtūm kot mẽ pamā òr jakamā piitā mẽ panhōō. Tā koja akwŷjê hō Tīrtūm kēp mẽmoj omnuy ā hkamnhīx tā ka mẽ noo mā aku nē ho amnhī tomnuj nē.

²¹ Kêr pu mẽ pahkwŷjaja tanhmā kot amnhī tomnuj to pymaj pu mẽ pahte amnhī nhīpêx kukamā pajamaxpēr mex o papa. Mẽmo mẽō nē mẽmo kagô pê wīhtija. Tīrtūm kot mẽ pamā mẽmoj piitā òr tā no nhūm mẽ pahkwŷjaja kēp ja omnuy nē pu mẽ noo mā hkur rŷ ho pahkōm kêt nē. Mẽmo mry nē mẽmo wīhti pu mẽ noo mā hkur rŷ ho pahkōm kêt nē.

²² Nē kêr ka mẽ atō mẽmoj krêr kaxyw nē hkukamā ajamaxpēr o:

—Nà kot paj ja krê. Tīrtūm kām ja mex kênā. Anē.

Hāmri nē māmri Tīrtūm kamnàr rom axàmnhīx akrê. Kām ja mex kênā kot ka kêt ri tee ri hkrêr kaxyw hkukamā ajamaxpēr nē hkaga.

²³ No kot kaj mẽ atō mẽmoj to anhŷr kaxyw nē tee ri amnhī kukamā ajamaxpēr nē ajamaxpēr o:

—Ko kot paj apu ja ho anē nhūm Tīrtūm hā ixpumu nhūm ja kēp omnuy nē rŷ ko. Anē.

Hāmri nē tee ri amnhī kukamā ajamaxpēr. Tā ra ā amnhī nhīpêx anē nē akrê rŷ mẽmoj to anē. Hāmri nhūm Tīrtūm tee ri ā ate amnhī nhīpêx anhŷr ā apumu nhūm ja kēp omnuy nē. Ate hkamnàr rom mẽmoj to anhŷr kêt nē amarī amnhī krā hkôt ho anhŷr jakamā ho amnhī tomnuj nē.

15

Mē pahte amnhī pix kukamā pajamaxpēr kêt ā mē pamā karō

Makre 10.45; Wam Korīt 10.24; Piripos 2.3-5

¹ Nē kêt pu mē pahte ra Jejus kôt amnhī xunhwÿr tÿx xwÿnhjaja amnhī kôt kormā mē kot Jejus kôt amnhī xunhwÿr totuj janhÿr xwÿnhjê jamār mex nē. Jao mē kamā pagryk tokyx anhÿr kêt nē. Ām mē kutā panojarêt pix o papa. Jao ra amnhī pix kukamā pajamaxpēr kêt nē.

² Māānēn amnhī mē Kris kôt mē pahkwÿjê hkukamā mān mē pajamaxpēr. Jao mē kot tām amnhī nhīpêx kaxyw mē ho mex o ri papa.

³ Kris na pre jar pa ri amnhī pix kukamā hamaxpēr kêt nē. Na pre māānēn ō Papaj kukamā hamaxpēr. Jakamā Tirtūm kapēr ā kagà htūm kot kām kapēr jarēnh kot:

Pa Papaj. Na hte mē pahkurê xwÿnhjaja ixto kapēr punuj nē. Nom māānēn ā ato kapēr o pa anē.
Anē.

⁴ Mē pakaxyw na Tirtūm kapēr ā kagàja. Mē pahte kamā harēnh nē mar nē amnhī kaxyw hkôt pajamaxpēr tÿx o ri papa kaxyw. Jakamā na pu htem tanhmā pahpunuj to htā kapēr kwÿ ma nē pahkīnh nē. Jao tee ri amnhī kukamā pajamaxpēr o ri pahkaprī hkêt nē. Ām nhÿrmā Tirtūm kot mē pahto mex kukamā pajamaxpēr o akupÿm paxihtÿx nē pahkīnh nē ri papa. Mē pahkīnh nē ri papa kaxyw na Tirtūm kapēr ā kagàja.

⁵⁻⁶ Na pu htem Tirtūm kamnār rom pahkīnh nē. Nē axpēn kamā paxukaprī ho ri papa. Jakamā na pa hte tanhmā mē ato Tirtūm wÿr to nē kām:

—Pa Tĩrtũm. Apê mẽ ijamãr xwỳnh maati na ka. Nê apê mẽ inhõ Pahihtĩ Jejus Kris nhõ Papaj na ka. Nà xep ra Rõm nhõ xwỳnh kwỳjaja kãm akapêr kôt amnhĩ nhĩpêx prãm jakamã kwa tanhmã mẽ hkrã ho mex to kê mẽ hamakêtkati nê ajamaxpêr kôt hamaxpêr rãhã ho ri akôt pa. Hãmri nhũm mẽ amnhĩ tã apumu nê piitã amex o amex ã ajarê.

Anhỹr o pa hte mẽ ato kuwỳ.

Ijaew kêt xwỳnhjê jarênh

Atre 10.34; Rômãn 9.24; Karatas 3.28

⁷ Nê kwa kêr ka mẽ amã axpên tã ma ho ri apa. Te ho Kris kãm mẽ pahtã mata pyræk. Jao axpên to mex pix o apa. Kot kaj mẽ ã axpên nhĩpêx anê nhũm mẽ piitã axpên tã mẽ apumu nê mẽ anhỹ hã Tĩrtũm mã mex o mex ã harê.

⁸ Amnepêm Tĩrtũm Ijaew mã tanhmã Kris jarênh to. Kormã pika hwỳr wrỳk kêt ri nhũm hkukamã nhỹrmã mẽ hwỳr wrỳk nê mẽ kamã kator ã harê.

Tã nhũm mẽ hwỳr wrỳ nê mẽ kamã kato. Ijaew hkanrêhã htàmnhwỳjê kamã kato nê mẽ ho mex o ri mẽ hkôt pa. Mẽ kot amnhĩ tã omunh nê ã hamaxpêr anhỹr kaxyw. Nê hamaxpêr o:

—Amnepêm Tĩrtũm kot mẽ panhĩgêť mã hkukamã harênh xà hkôt na mẽ ixwỳr Kraja mẽ nhũm wrỳ nê mẽ ixto mex o ri pa. Nà ãm hãmri na pre mẽ ixwỳr kumê.

Anhỹr o hamaxpêr kaxyw.

⁹ Nê mẽ apê Ijaew kêt xwỳnhjaja mẽ ajaxwỳja mẽ ate tanhmã kot amnhĩ nhĩpêx to hã harênh mar nê Tĩrtũm mã mex o mex ã harênh kaxyw. Nê Tĩrtũm kot mẽ akamã ukaprĩ hã mẽ ate amnhĩ tã omunh nê mex o mex ã harênh kaxyw na pre

wrỳ. Tĩrtũm kapēr ā kagà htũm kot tanhmā mẽ
ixpê Ijaew jarēnh to nē mǎānēn tanhmā mẽ apê
Ijaew kêt xwỳnhjê jarēnh to nē mẽ pajarēnh kot:

Kot paj Ijaew kêt xwỳnhjê jamak mǎ amǎ amex ā
ajarēnh o ri mẽ hkôt ixpa.

Nē amex ā inhgrer o ri mẽ hkôt ixpa. Anē.

¹⁰ Nē ja:

Kwa mẽ apê Ijaew kêt xwỳnh mẽ mẽ apê Ijaew. Kêr
ka mẽ apiitǎ Tĩrtũm nhỹ hǎ akĩnh nē ri apa.
Anē.

¹¹ Nē mǎānēn ja:

E kêr ka mẽ apê Ijaew kêt xwỳnhjaja nē krĩ piitǎ
hkôt mẽ apa xwỳnhjaja mẽ apiitǎ Tĩrtũm mǎ
mex o mex ā harēnh o ri apa.

Anhỹr o kot harēnh.

¹² Nē Tĩrtũm nhỹ hǎ kapēr o pa xwỳnh finat Ijais
haxwỳja Ijaew mǎ Jėjus jarēnh o:

Koja nhỹrmǎ Jese kanrēhǎ htàmnhwỳjê hōja mẽ
pahwỳr kato.

Hāmri nē mẽ pahpê Ijaew mẽ Ijaew kêt xwỳnhjê ho
amnhĩptàr o pa.

Jakamǎ nhũm mẽ amnhĩ kaxyw hkôt hamaxpēr o
pa. Anē.

¹³ Nē na pa hte tanhmā mẽ ato Tĩrtũm wỳr to ho ri
ixpa nē kām:

—Pa Tĩrtũm. Kwa kêr ka Rôm nhō xwỳnhjê ho
mex kê mẽ amnhĩ kaxyw Akra hkôt hamaxpēr
mex o ri pa. Jao hkôt hkĩnh nē hamakêtkati nē ri
axpēn to pa. Nē kê Akarō mẽ ho mẽ hihtỳx o pa kê
mẽ amnhĩ kaxyw amǎ mǎn hamaxpēr tỳx rǎhǎ ho
ri pa. Anē.

Pawre kot hprĩ hã amnhĩ jarẽnh

Sikũn Pêtre 1.12-13

¹⁴ E Kris kôt ixkwỳjaja. Nà ra ixte mẽ ajarẽnh mar mex. Na ka xep htem amnhĩ to mex o ri apa. Nẽ mẽmoj to axpẽn kutã anojarêr rãhã ho ri apa. Nẽ mẽ kot tanhmã Tĩrtũm kapêr kôt amnhĩ nhĩpêx to xàja ka mẽ omunh mex nẽ ho axpẽn jahkre ho ri apa.

¹⁵ Tã ot pa kagà ja kamã mẽ amã ixujarẽnh kãm ixihỳx nẽ. Tĩrtũm nhỹ hã. Ra mẽ ate mẽmoj mar mex tã pa axte mẽ amã harẽ. Mẽ ate mar tỳx nẽ hã anohtỳx kaxyw. Nà ã ixte amnhĩ nhĩpêx anhỹr kaxyw na pre Tĩrtũm mẽ akaxyw ixãm.

¹⁶ Ixte Jejus Kris mã mẽ apê Ijaew kêt xwỳnhjê mã kapêr jarẽnh o ri mẽ akôt ixpa kaxyw. Nẽ mẽ ato hwỳr o ri ixpa kaxyw. Tã pa hte krĩ hkwỳ kamã ã mẽ akwỳjê mã harẽnh anhỹr o ri mẽ hkôt ixpa. Nẽ Jejus jarẽnhja pa hte mẽ hkôt mẽ kãm harẽnh o ri ixpa. Mẽ kot mar nẽ hkĩnh kãm hkôt amnhĩ nhĩpêx mex kaxyw. Hãmri nhũm Tĩrtũm Karõ mẽ kãm mẽ hamaxpêr nyw jagjê nhũm Tĩrtũm hã mẽ omu nhũm ja kãm mex nẽ nhũm hkĩnh nẽ hamaxpêr o:

—Nà ãm hãmri. Koja mẽ nhỹrmã wa ixri htĩr tũm nẽ mex nẽ pa ho pa. Anẽ.

¹⁷ Tã na pa ixte Jejus Kris nhỹ hã Tĩrtũm mã tanhmã amnhĩ nhĩpêx to ho ixpa hã amnhĩ pumu nẽ ixkĩnh nẽ.

¹⁸⁻¹⁹ Na pa hte ÿ hã mẽ apê Ijaew kêt xwỳnhjê mã Tĩrtũm kapêr jarẽnh o ri mẽ akôt ixpa. Nẽ mẽ anoo mã tanhmã ri Kris kot mẽ amã amnhĩ nhĩpêx to hã harẽ. Nẽ mẽ amã aa mẽ kot mẽmoj pumunh kêt kwỳ ho anhỹr o ri mẽ akôt ixpa. Tĩrtũm Karõ nhỹ

hã. Nhũm hte mẽ akwỳjaja amnhĩ jaêr pê omu nê kamã no puma nê. Hãmri nê mẽ pahpyrà nê Jejus kôt amnhĩ xunhwỳ. Nom pa hte ã amnhĩ nhĩpêx anhỹr ã amnhĩ pumu nê ri hã amnhĩ to jarkrar kêt nê. ãm ixte Kris pix nhỹ hã mẽ kãm ixkapêr ã mẽ kãm amnhĩ jarênh o ri mẽ hkôt ixpa. Tã pa ra Jerujarê rũm Irir wỳr krĩ piitã hkôt mẽ kãm Kris kapêr jarê. Tĩrtũm Karô kot tanhmã ixto hihtỳx to jakamã pa mẽ piitã mẽ kãm harênh mex nê.

²⁰ Na pa hte mẽ hwỳr inhnojarêr nê ã ijamaxpêr anê nê ijamaxpêr o:

—Kormã mẽ kot Kris jarênh mar kêt xwỳnhjê hwỳr kot paj mỗ. Nom ra mẽ kot harênh mar xwỳnhjê nhỗ krĩ hwỳr inhmôrja inhmã prãm kêt. Anê.

²¹ Tĩrtũm kapêr ã kagà htũm kot kapêr mar kêt xwỳnhjê jarênh kot:

Kormã mẽ kot Tĩrtũm kapêr mar kêt xwỳnhjaja koja mẽ kuma nê hprĩ hã mar tỳx nê. Anê.

*Pawre kot Rôm wỳr hkrà hã amnhĩ jarênh
Rômãn 1.8-15*

²² Hêxta waa nê. Inhmã mẽ apumunh prãm tỳx nê Rôm kãm Jejus kôt ixkwỳjaja. Na pa hte xatã mẽ awỳr ixkrà nom kormã mẽ awỳr inhmôr kêt nê. Kormã ixte krĩ hkwy kamã mẽ kãm Kris jarênh o ri ixpa jakamã kormã mẽ awỳr inhmôr kêt nê.

²³ Na pa ra xatã mẽ awỳr ixkrà hã ixtã amgrà xohtô nê. Tã ra jar mẽ kãm Kris kot mẽ panê tanhmã amnhĩ nhĩpêx toja jarênh pa.

²⁴ Jakamã kot paj tokyx ma mẽ awỳr mỗ. Hãmri nê mẽ awỳr pôi pu mẽ axpên pumu nê pahkĩnh nê axpên mã pakapêr o papa. Pa mẽ akôt ri ixpa tãmtã

hamũ pyka pê Espãnhã wỳr ma mỗ. Nễ kot paj inhnojarêť ka mẽ ixto Tĩrtũm wỳ nễ inhmã ixàpkur xà hkwỳ gỗ pa ma mẽ hwỳr pry hã hkur o mỗ.

²⁵⁻²⁶ No na pa kormã mẽ awỳr inhnojarêť kêt nễ. Kot paj ja rũm awjanã nễ akupỳm Jerujarẽ hwỳr mỗ. Kamã Kris kôt mẽ pahkwỳjaja kệp amrakati nễ ri pa nhũm pika pê Gres mẽ Masetõn kamã Kris kôt mẽ pahkwỳjaja mẽ harẽnh ma nễ mẽ kãm kàxpore hkwỳ ho akuprõ nễ mẽ kaxyw inhmã kugõ. Tã kot paj ma mẽ hwỳr o mỗ nễ mẽ kãm kure nễ rĩ kormã ma mẽ awỳr mỗ.

²⁷ Jerujarẽ kamã Kris kôt mẽ pahkwỳjaja Ijaew na mẽ. Mễ kumrẽx na prem Kris kôt amnhĩ xunhwỳ. Hãmri nhũm mẽ hkwỳjaja ma mẽ apê Ijaew kêt xwỳnhjê mã kapẽr jarẽnh o ri mẽ akwỳ hkôt pa. Hãmri nhũm pika pê Gres kamã mẽ pa xwỳnhjaja mẽ kapẽr ma nễ mẽ uràk nễ Kris kôt amnhĩ xunhwỳr kurê kumrẽx. Jakamã amnhĩ xwar kãm nhãm krĩ hõ kamã Kris kôt mẽ pahkwỳjê ho mex prãm nễ. Hãmri mẽ kãm kàxpore hkwỳ ho akuprõ nễ mẽ kaxyw inhmã kugõ.

²⁸⁻²⁹ Tã kot paj ma Jerujarẽ hwỳr mẽ kãm o mỗ nễ mẽ kãm kure hãmri nễ awjanã nễ rĩ kormã ma Rõm wỳr mẽ awỳr mỗ. Hãmri nễ mẽ awỳr pỏj pu mẽ axpẽn pumu nễ pahkĩnh nễ. Nễ axpẽn mã Jejus Kris mex o mex ã harẽ nễ kãm tanhmã amnhĩ jarẽnh to ho papa. Jao pahkĩnh nễ papa. Tã pa hpãnhã hamũ ma Espãnhã wỳr mỗ.

³⁰ Nễ na pu prem Jejus Kris o panhõ Pahihti. Jao te mẽ pahpê hkôt axpẽn to pahtõ nễ pahtõx pyràk o axpẽn nhĩpêx. Nễ Karõ nhỹ hã pamã axpẽn kĩnh nễ. Jakamã kwa Jejus kôt ixkwỳjaja. Kêr ka mẽ ixpê mẽ atõ hã ixto Tĩrtũm wỳr kãm axihtỳx nễ.

31 Kêr pa ma pyka pê Jutej kamã Jerujarê kamã Kris kôt mẽ pahkwỳjê hwỳr mỗ nễ mẽ kãm kàxporeta gõ nhũm mẽ omu nễ Ijaew kêt xwỳnhjê kot mẽ kãm òr ã mẽ omunh tâ tee ri hamaxpêr kêt nễ. ãm hkĩnh kãm mãmri ãmnhĩx hamỳ nễ ho amnhĩm awjaprô.

Nễ kêr ka mẽ ixto awỳ kê inhnê mẽ kêp mẽ pahkwỳ hkêt xwỳnhjê pumunh mex nễ.

32 E kêr ka mẽ ã ixto Tĩrtũm wỳr anễ. Kê ixte ma Jerujarê rũm ma Rõm wỳr pàr kãm inhmõrta ã kê ixpumunh mex nễ. Pa inhmex pê mẽ kurũm ma mẽ awỳr mỗn pỏj pu mẽ tokyx axpẽn pumu nễ pahkĩnh nễ. Pa mẽ ate tanhmã amnhĩ nhĩpêx to ho ri apa hã mẽ apumunh o mẽ akôt ri ixpa nễ ixkĩnh nễ.

33 Tã ãm ja pix. Kê Tĩrtũm mẽ akôt pa ho pa. Tãm na hte tanhmã mẽ pahto pu mẽ ỹ hã pajamakêtkati paxãmnhĩx ri pahkĩnh nễ ri papa.

16

Pawre kot ahpỹnhã hkrãmnhwỳjê mã kapêr

1 Ku nễ mããnên ja. Ot pa mẽ awỳr Kris kôt pahtỏx Pepreja mẽ awỳr kumễ. Na hte krĩ pê Sẻnkrej kamã Kris kôt mẽ pahkwỳjê tanhmã mẽ ho mex to ho ri mẽ hkôt pa.

2 Nễ mããnên pa na hte tanhmã ixto mex to. Tã kê mẽmo arĩgro hã mẽ awỳr pỏj ka mẽ kêp Kris kôt mẽ pahtỏx ã omu nễ ho mex nễ tanhmã ho ajuta hto.

3 Nễ kêr ka mẽ atar Kris kôt ixkrãmnhwỳjê mã ijarê. Na pa hte mẽ kãm ijamaxpêr rãhã ho ri ixpa. Nễ Akirtĩ mẽ hprỏ Prisireta ka mẽ wa kãm ijarê.

Na pre hte wa inhĩhkô hã Jejus Kris mã tanhmã amnhĩ nhĩpêx mex to ho wa pa.

⁴ Jao wa amnhĩ grônh kôt mẽ kãm ixkurê xwýnhjê pê ixpytã. Pa amnhĩ tã wa omu nê inhmã wa hkĩnh nê. No ãm papxipix inhmã wa hkĩnh kêt nê. Na pre Ijaew kêt xwýnh kwý pê Kris kwýjaja ixtã wa harênh ma nê haxwýja kãm wa hkĩnh nê.

⁵ Nê na hte Kris kwýjaja wa ôrkwy kamã axpên wýr akuprô. Mẽ kot Tĩrtũm mã amnhĩ jarênh nê kapêr ã kagà hkwy mar kaxyw axpên wýr akuprô. Tã kêr ka mẽ mẽ kãm ijarê.

Nê Kris kôt mẽ pahtô Epênre mã ijarê. Kêp ixkrãmnhwý mex na. Inhmã hkĩnh. Kumrêx na pre jar pika pê As kamã amnhĩ kaxyw Kris kôt hamaxpêr nê hkôt amnhĩ xãm.

⁶ Nê Kris kôt mẽ pahtôx Marir ka mẽ kãm ijarê. Na xep hte tanhmã mẽ ato mex to rũnh o pa.

⁷ Nê Kris kôt mẽ pahtô ãrôhti mẽ Jũhti wa kãm ijarê. Ixpyrà nê wa kêp Ijaew na wa. Kormã ixte Kris kôt amnhĩ xãm kêt ri na pre wa kumrêx hkôt amnhĩ xãm. Na hte Jejus nhỹ hã mẽ ahkre ho mẽ pa xwýnhjaja wa kot Kris kapêr jarênh mex ã wa harê. Tã ã amnhĩ nhĩpêx anhỹrja mýrapê na pre mẽ hkwyjaja wa unê nê wa haxã pa prem ixpimràatã ixpê prês nê mẽ hagjênh xà kamã ixkrĩ.

⁸ Nê Kris kôt mẽ pahtô ãpřitre mã ka mẽ ijarê. Kêp Kris kôt ixkrãmnhwý mex na.

⁹ Nê Kris kôt mẽ pahtô Upãnre mã ijarê. Na hte ixpyrà nê Kris mã tanhmã amnhĩ nhĩpêx to ho ri pa.

Nê Kris kôt mẽ pahtô Etaki mẽ ijarê. Kêp ixkrãmnhwý mex na.

10 Nē Kris kôt mē pahtō Apes ka mē kām ijarē. Na prem ra Kris ā hipêx punuj nē no nhūm mē kutā amnhī to htỳx nē Kris kaga hkêt nē.

Nē Aristopti nhōrkwỹ kamā hkwỳjê mā ijarē.

11 Nē Kris kôt mē pahtō Erojāwti mā ijarē. Ixpyrà nē kêp Ijaew na.

Nē Nasisti nhōrkwỹ kamā Kris kwỳjaja ka mē kām ijarē.

12 Nē Kris kôt mē pahtōx Xiripëre mē Xiripos wa kām ijarē. Wa kêp Pahihti Jejus mā tanhmā amnhī nhīpêx mex to xwỳnh na wa.

Nē Kris kôt mē pahtōx Pesixti mā ijarē. Haxwỳja kêp ixkràmnhwỳ na. Na hte Pahihti Jejus mā tanhmā amnhī nhīpêx mex to ho ri pa.

13 Nē Kris kôt mē pahtō Rupti mā ijarē. Na hte Kris kôt amnhī nhīpêx mex o ri pa. Nē katorxà mā ijarē. Na pre te ixpê hkra nhīpêx pyrāk o inhīpêx.

14 Nē Kris kôt mē pahtō Asĩnre mā nē Prekōxti nē Emes nē Patopas nē Emas mē. Jajê piitā mē pahkwỳ kot mē hwỳr pikuprōnh xwỳnhjê mē mē ho apimràatā mē kām ijarē.

15 Nē Kris kôt mē pahtō Pirorti mā nē mē pahtōx Juure mē Nērew wa nē htōxja nē mē pahtō Orīpti wa mē kām ijarē. Nē mē pahkwỳ kot mē hwỳr pikuprōnh xwỳnhjê mē mē ho apimràatā mē kām ijarē.

E kêt ka mē jajê piitā mē kām ijarē. Na pa hte mē kām ijamaxpêr rāhā ho ri ixa.

16 Nom mē tapxipixjaja kêt. Ā mē apiitā mā na pa hte ijamaxpêr rāhā ho ixa.

Nē ota jar Kris kwỳjaja mē awỳr hpêr mē.

17 Kwa ixkràmnhwỳjaja. Na ka mẽ ra aprĩ hã Tĩrtũm kapẽr mar tỳx nẽ. Tã kêt ka mẽ amnhĩ nẽ mẽ kot Tĩrtũm kapẽr o hêx xwỳnhjê pumunh mex o apa. Mẽ kãm axpẽn nẽ mẽ ato hpigrành par prãm. Nẽ mẽ ate Kris kaga nẽ hpãnhã mẽ kot amnhĩ nhĩpêx o amnhĩ nhĩpêxja mẽ kãm hprãm jakamã kwa mẽ amnhĩ nẽ mẽ omunh mex nẽ axkãm ajamak rom.

18 Na htem ã amnhĩ nhĩpêx anhỹr o Pahihti Kris mã tanhmã amnhĩ nhĩpêx to ho pa hkêt nẽ. ãm amnhĩ hkrã hkôt tanhmã ri hkwỳjê jahkre hto ho pa. Kot mẽ no kupyw kaxyw tanhmã mẽ kãm hêx to ho ri mẽ hkôt pa. Te mẽ ahkre mex pyræk tã mẽ ahkre mex kêt nẽ. Jakamã nhũm htỳx ri mẽ pa xwỳnhjaja mẽ kot mẽ ahkreja ma nhũm te mẽ kãm mex pyræk. Jakamã kwa mẽ okora mẽ amnhĩ nẽ mẽ omunh mex nẽ.

19 Na ka htem mẽ kurom Kris kôt amnhĩ nhĩpêx mex nẽ nhũm xep mẽ piitã mẽ apumu nẽ axpẽn mã ja hã mẽ ajarẽnh o ri pa. Pa mẽ ajarẽnh ma nẽ ixkĩnh nẽ. Tã kêt ka mẽ arĩ ajamaxpẽr mex rãhã ho ri ajamaxpẽr o apa. Nẽ amnhĩ nhĩpêx mex rãhã nẽ. No tanhmã ajamaxpẽr punuj to ho ri amnhĩ tomnuj o ri apa hkêt nẽ. ã mẽ ate amnhĩ nhĩpêx anhỹrja na inhmã hprãm.

20 Nẽ na hte Satanasti mẽ hkwỳjaja mẽ ate Jejus kaga hprãm xàj mẽ akôt tanhmã ri mẽ anhĩpêx to ho ri pa htã kêt ka mẽ amnhĩ tã mẽ omu nẽ tee ri amnhĩ kukamã ajamaxpẽr kêt nẽ. Koja gaa nhũm Tĩrtũm mẽ hipêx o te mẽ kot kagã xoprê hkrã xôm nẽ hpĩr pyræk o mẽ hipêx. Jakamã ã mẽ kot mẽ anhĩpêx anhỹr tã koja Tĩrtũm mẽ amã

mê ajamakêtkati xàja gô. Tapxipix na kot mê pajamakêtkati xà nhôr kaxyw àhpumunh tỳx.

Nê na pa hte mê ato Pahihti Jejus wỳ nê kãm:

—Pa Pahihti. Kwa kêr ka Rôm kãm akwỳjê pumu nê mê ho mex nê mêmoj to mê kutã anojarêt rãhã ho ri apa. Anê.

²¹ Nê ota mê pahtô Ximotreja mê awỳr hpêr mê. Na hte inhîhkô hã Kris mã tanhmã amnhĩ nhîpêx to ho ri pa. Nê ixtô Rusti mê Jasãwti mê Sosipa wa mê haxwỳja mê awỳr hpêr mê.

²² Nê kot inhmã ixkapêr ã kagà xwỳnh Testi haxwỳja mê awỳr hpêr mê. Kêp Kris kôt mê pahtô na.

²³ Nê Kris kôt mê pahtô Gajre haxwỳja mê awỳr hpêr mê. Ôrkwỹ kamã na hte Kris kwỳjaja axpên wỳr akuprô nê kamã Tĩrtũm mã amnhĩ jarê nê kapêr ã kagà kamã harê nê mar o hkrĩ. Ôrkwỹ kamã na pa pre pôj.

Nê mê pahtô Eras haxwỳja mê awỳr pêr mê. Na hte jar krĩ ja kamã Rôm nhô pahihti mã õ kàxpore jamâr pê ho mêmoj to anhỳr o pa.

Nê Kris kôt pahtô Kwatre haxwỳja mê awỳr hpêr mê. E jajaja piitã na mê awỳr hpêr rê.

²⁴ E kê Pahihti Jejus Krisja mê akutã nojarêt rãhã ho pa.

*Pawre kot Tĩrtũm mex o mex ã harênh
Epes 1.3, 3.20-21; Wam Ximotre 1.17; Eprêw
13.20; Jutre 24-25*

²⁵ Nê kwa kêr pu mê Tĩrtũm mã mex ã harênh rãhã ho ri papa.

Nê ixte mê amã Jejus Kris jarênhta ã ka prem ama nê hkôt amnhĩ xunhwỳ. Tã koja mê ato mê

axihtỳx ka mẽ hkôt axihtỳx kãm hkôt ri amnhĩ nhĩpêx mex o ri apa. Amnepê m na pre Tĩrtũm mẽ apê Ijaew kêt xwỳnhjê ho hkra kaxyw hã amnhĩ jarênh kêt nê. Kormã ja ho hpimxur ryy nê.

²⁶ Tã ã mẽ anhiêpêx anhỳrja o amnhĩrit nê ỳ hã mẽ kapêr jarênh o ri pa xwỳnhjê mã kapêr nê mẽ kãm:

—E Jejus kot tanhmã amnhĩ nhĩpêx to ho pata kêr ka mẽ piitã mẽ kãm hã kagà kê mẽ pyka piitã hkôt kamã harê nê kuma. Nom kê Ijaew pixjaja mar kêt nê. Kê pika piitã hkôt kamã harê nê kuma. Panhĩ nê kupê nê kupê hkà htykre nê mẽ hkà haka nê mẽ hkà kamrêkjaja. Kê mẽ piitã Jejus jarênh ma nê amnhĩ kaxyw hkôt hamaxpêr nê hkôt amnhĩ xunhwỳ. Hãmri nê hkôt amnhĩ nhĩpêx mex o ri pa. Anê.

Nhũm pre ã mẽ pakaxyw mẽ kãm kapêr anê nhũm prem kuma nê hã kagà.

²⁷ Nã Tĩrtũmja tapxipix na àhpumunh tỳx xwỳnh ã ãm pyxi mex. Nê tapxipix kêp mẽ pahpiitã Mêpahpãm. Tã kêr pu mẽ Jejus Kris kot mẽ panê htyk ã omunh xà hkôt Tĩrtũm pix mã mex o mex ã mãn harênh rãhã ho papa.

Tã ãm ja pix. Ixpê Pawre na pa ã mẽ awỳr ixpêr mẽnh anê. Na hapêx.

Tĩrtũm kapēr ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 18 Apr 2025 from source files
dated 29 Jan 2022

383a4e22-34cd-505f-9cc2-2f9921e7aa9f